

Jág₁ a₂ca₂jme₃jnia₅ Jesucristo ne₄ San Juan₅₄

Jág₁ a₂ca₂jme₃jnia₅ Diú₄

1 ¹ A₂la₂ bá₄ jág₁ a₂ca₂jme₃jnia₅ Diú₄ ne₄ Jesucristo, ia₁jaun₂ 'éi₂ ně₃ 'é₃ táng₃ dsa₂ i₂jme₂ti₃ ne₅₄, ca₂juá'₂ ca₂le₃jě₃ a₂tion₅₄ niog₅ lé₂ ŋi'₅₄ ta₁. Jaun₂ 'ŋiog₅ bá₄ 'éi₂ ca₂jmo₃ ca₂rě₃ŋi₅ ma₂ca₂jme₃jniai₂₃ tē₂le₃ quian'₅₄ ángel quiáin₅ ne₄ Juan₅₄, jan₂ dsa₂ i₂jme₂ti₃ ta₁ ne₅₄. ² Jniá₂ bá₄ 'éi₂ i₂jáng'₅ jág₁ dsau₅ la₂, ca₂le₃jě₃ lia'₂ con'₂ lé₅ a₂ca₂jág₃ ca₂tě₂ ne₃; ton'₂ jáng'₅ bá₄ jniá₂ jág₁ dsau₅ 'a₂ lia'₂ lé₅ jág₁ dse₃ quió'₅ Diú₄, quian'₅₄ 'a₂ lia'₂ lín₅ Jesucristo.

³ 'E₂ gué₄ dsen₃ i₂'i₅ si₂ la₂, a₂chi₁ton₅ jág₁ a₂'é₂ Diú₄. Le₂jaun₂ guē'₂ táng₃ jui₁lia'₂ i₂nag₅ jág₁ la₂ a₂'é₂ Diú₄; dsen₃ i₂tón'₂ jui₅ jág₁ a₂chi₁ton₅, ia₁ ma₂ja₂quián₃ jmig₄.

Jmo₅ Juan₅₄ si₂ a₂ca₂chein₃ ne₄ ta₁guion₃ guá'₅

⁴ Jniá₂ Juan₅₄ jmo₂₃ si₂ a₂dsiang'₅₄ ne₄ ta₁guion₃ guá'₅ i₂chan₂ le₂tan₅₄ 'uě₃ Asia. Jui₁jme₂gu'₅₄ Diú₄ 'nia'₂, jui₁chan'₂ bá₄ 'nia'₂ 'ei₅ tei₄ tē₂le₃ quian'₅₄ Diú₄ i₂lín₅ jmig₄ ně₃, i₂jme₁lín₄ tián₂ le₂jniá₅, i₂lén₂ ca₂lia'₂ co₂tan₅₄; ján₃ bá₄ jui₁jme₂gu'₅₄ Diú₄ 'nia'₂ tē₂le₃ quian'₅₄ ta₁guion₃ jme₂dsi₂ i₂tion'₅₄ le₃ne₄ ne₄ta₁ ja₁guá₄; ⁵ ján₃ guē'₂ jui₁jme₂gu'₅₄ Diú₄ 'nia'₂ tē₂le₃ quian'₅₄ Jesucristo, i₂tí₅ jág₁ dsau₅ quió'₅, i₂le₂ne₁ ma₂ca₂jen'₅₄ ne₄ 'mú₃, i₂gon₂ ne₄ rag₅₄ chan₂ gua'₅₄ 'uě₃. Le₃quió'₅ 'éi₂ bá₄ i₂ca₂rě₃'nio₃ jniog₄ ton'₂ ma₂ráng'₂ jniog₄ ne₄ 'uig₅₄ dsáu₁ jniog₄ quian'₅₄ jmi₂ 'ain₅₄ 'ŋiog₅; ⁶ le₃quió'₅ 'éi₂ ně₃ i₂ma₂jmo₃ a₂lág₅ jniog₄ rag₅₄, jme₂dsa₂ ně₃, a₂jme₁ti₁ jniog₄ ne₄ Diú₄ quiáin₅ i₂lín₅ Jmei₂. iLe₃quió'₅ 'éi₂ bá₄ ca₂tíin₂ jme₃juag'₂ dsa₂, ca₂tíin₂ goin₃ co₂tan₅₄! A₂méi₃.

⁷ iJag₄! iMa₂já₅ jě₄ jnei₅!

Ca₂le₃jín₃ bá₄ dsa₂ tē₃ ne₅₄,

ca₂le₂jio₅ dsa₂ juig₂ i₂ca₂'ág'₂;

ca₂le₃jín₃ dsa₂ chan₂ juig₂ ta₁caun₂ mi₂güí₃

tóin'₃ qui'₃-o₃ jě₁ma₂ca₂jág₂.

iLe₂jaun₂ lé₂, a₂méi₃!

⁸ “Jniá₂ bá₄ 'éi₂ i₂lín₅ le₂'uig₅₄ jui₁lia'₂ letra Alfa jě₁ca₂rě₃lióg₃; jniá₂ bá₄ 'éi₂ i₂lín₅ jě₁ca₂tó'₂ ně₃ jui₁lia'₂ letra Omega”, juá'₂ Te₁gui'₅₄ Diú₄. “Jniá₂ bá₄ lín₅ rě₂ně₃, i₂lín₅ ma₂i₁jaun₃, i₂lín₅ co₂tan₅₄ ne₄ jui₅,^a i₂uan'₂ gué₄ lín₃.^b”

^a8 'Nio'₂ ja₁ton₅ Éxodo 3:14; Juan 8:58.

^b8 'Nio'₂ ja₁ton₅ Isaías 41:4; 44:6; 48:12.

Jan₂ i₂lín₅ lia'₂ lín₅ Jaun₅ dsa₂ mi₂güí₃

⁹ Jniá₂ Juan₅₄, lín₅ rín'₂ 'nia'₂, ia₁ quein'₅₄ jniog₄ co₂dsia₅ ñag₄ uig₅, le₂jaun₂ chi₁jñia₁ jniog₄ ja₁gon₂ Diú₄, ton'₂ co₂dsia₅ guei'₂ bí₂ a₂tián₂ jniog₄ juin'₂ dsi₅ le₃quíó'₅ Jesús. Jme₁'eng₅₄ rē₂jní₅ caun₂ 'uē₃ a₂rē₂quí'₅ jē₄ jmi₁ñí'₄ ja₁chei₂ Patmos, ne₄ 'uig₅₄ ia₁ a₂ma₂ca₂'ē₃ jág₁ dse₃ quió'₅ Diú₄, ton'₂ ia₁ 'uig₅₄ a₂ma₂cuē₃ jniá₂ jág₁ dsau₅ 'íng₅ Jesucristo.

¹⁰ Co₂ráun₂ nē₃ co₂jmi₅ quió'₅ Te₁gui'₅₄ ja₁'eng₅₄ jaun₂, ca₂lē₃ a₂jme₁'en₅₄ jniá₂ le₃quíó'₅ Jme₂dsí₂. Jaun₂ ca₂nag₃ jág₁ a₂ca₂né'₂ le₃co'₅₄ lag₃ ca₂juá'₂ tiá₂ lín₃ jui₁lia'₂ jē₁i₂'ein₅₄ ñí₁ trompeta, ¹¹ ca₂juá'₂ tság₅ jniá₂:

—Jniá₂ bá₄ 'éi₂ i₂lín₅ le₂'uig₅₄ jui₁lia'₂ letra Alfa jē₁ca₂rē₃lió₃; jniá₂ bá₄ 'éi₂ i₂lín₅ jē₁ca₂tó'₂ nē₃ jui₁lia'₂ letra Omega. Ne₄ si₂ rē₂bin₅, tion₅ a₂jág'₂ ia₁jaun₂ qui₁dsiang'₅₄ ne₄ ta₁guion₃ guá'₅ ja₁tén₄ 'uē₃ Asia, co₂'nió'₄ le₃jua'₅₄ quió'₅ guá'₅ i₂chan₂ juig₂ Efeso, Esmirna, Pérgamo, Tiatira, Sardis, Filadelfia, quian'₅₄ Laodicea nē₃.

¹² Ca₂jen'₄ jniá₂ jaun₂ nē₃, a₂jing₅₄ 'ein₂ 'éi₂ i₂juá'₂ jág₁ tság₅ jniá₂. Jme₁ca₂jeng'₅₄, ca₂jág₃ tióng₂ guio₃ tag₄ a₂lē₅ jmá'₃ cu₄nió₄ ja₁le₁guí'₂ si₂. ¹³ Jē₄ ta₁guio₃ mi₂tag₄ si₂ jaun₂ nē₃, jme₁chén'₄ jan₂ i₂lín₅ lia'₂ lín₅ Jaun₅ dsa₂ mi₂güí₃,^c i₂qui'₂ 'mi'₂ chen'₅₄ jang₄, mei'₂ tsá₃ tsáng₂ co'₅₄ tag₁₂. A₂jme₁rē₂jén'₅ le₁dsí₅ guē'₂ nē₃, jme₁lē₄ jmá'₃ cu₄nió₄. ¹⁴ Jñi₂ dsi₅₄ guē'₂ nē₃, jme₁tio₂ lia'₂ ja₁tio₂ jñí₂ jág'₂ cha'₂, a₂tio₂ jui₁lia'₂ tio₂ 'mu₂. Jme₁ne₁₂ guē'₂ nē₃ jme₁jniá₂ tág₅ jui₁lia'₂ jniá₂ ca₂jo'₅₄ si₂.

¹⁵ Mi₂tag₅₄ guē'₂ nē₃ jme₁jniá₂ tág₅ lia'₂ lé₅ jmá'₃ ni₁ñí₁ nió₂ a₂rē₂ta₄ a₂ma₂jmág₂ né'₃ táu₃ si₂. Jág₁ quió'₅ guē'₂ nē₃ jme₁né'₂ tiá₂ lín₃ jui₁lia'₂ né'₂ caun₂ ja₁ta'₂ la'₅₄ pa₁ lín₃.^d ¹⁶ Gu₂ ne₁ guē'₂ nē₃ jme₁chan'₂ guio₃ nei₅; mi₂'o₅₄ guē'₂ nē₃ jme₁jniá₂ 'ia₂ lia'₂ lé₅ caun₂ ñi₁tág₂ chen'₂ a₂'mu₃ le₃tin₃ ton₂. Ne₅₄ guē'₂ nē₃ tág₅ jmá'₅, jui₁lia'₂ tág₅ 'iog₂.

¹⁷ Jme₁ca₂jág₃, ca₂tón₂ jniá₂ ja₁tióng₂ mi₂tag₅₄, lia'₂ tsá₃ léi₄ mei'₂. Jaun₂ ca₂quiog₂ gu₂ ne₁ ne₄ quió'₃, jaun₂ ca₂juá'₂:

—Tsá₃ jmo₂ gang'₃, ia₁ jniá₂ bá₄ lín₅ i₂le₂ne₁, ton'₂ jniá₂ bá₄ lín₅ i₂jē₁ca₂tó'₂. ¹⁸ Jniá₂ bá₄ 'éi₂ i₂chan₂; jme₁rē₂ 'lín₄ bá₄ jniá₂, la₁ i₂jag₄! ma₂chang₂ bá₄ táng₃ ca₂le₃jē₃ jmi₅, ca₂lia'₂ co₂tan₅₄.^e Jniá₂ bá₄ chan'₄ ñí₁ llaves quió'₅ 'mú₃ quian'₅₄ guē'₂ tau₂ 'ñio₅.^f ¹⁹ Jaun₂ lē₃, ne₄ si₂, tion₅ jui₁lia'₂ 'e₂ a₂nē₂jag'₅₄, 'a₂ lia'₂ niog₅ lé₅ rē₂nē₃ quian'₅₄ guē'₂ a₂nē₃ guē'₄ niog₅ lé₂. ²⁰ A₂la₂ bá₄ jág₁ dsau₅ a₂jme₁rē₂ 'ma₄ le₂jñiá₅: jui₁lia'₂ guio₃ nei₅ a₂nē₂jag'₅₄ chi₁chan'₄ gu₃ ne₁, quian'₅₄ guē'₂ ta₁guio₃ tag₄ a₂lē₅ quian'₅₄ cu₄nió₄ ja₁le₁guí'₂ si₂. Jáng'₅ jág₁ ta₁guio₃ nei₅ co₂'nió'₄ guion₃ dsa₂

^c13 'Nio'₂ ja₁ton₅ Daniel 7:13.

^d15 o₃, "lia'₂ né'₂ 'lióng₂ jmi₅."

^e18 A₂lin₅₄ chog₅₄ si₂ juá'₂ ján₃ "A₂méi₃."

^f18 griego: hades, co₂'nió'₄ a₂juá'₂, ja₁quíó'₄ 'lag₄.

i₂i₃quian₄ jág₁⁸ quián₅ ta₁guion₃ guá'₅; guio₃ tag₄ ja₁le₁guí'₂ si₂ guë'₂ né₃, co₂'nió'₄ ta₁guion₃ guá'₅.

Jág₁ a₂chen₅ ne₄ le₂guion₃ guá'₅: Jág₁ a₂ñó₃ ne₄ guá'₅ chan₂ Efeso

2 ¹Jmo₄ si₂ ne₄ dsa₂ i₂'é₂ jág₁ guá'₅ i₂chan₂ juig₂ Efeso, chei'₅₄ le₂la₂:

Le₂la₂ juá'₂ i₂chan'₂ le₃guio₃ nei₅ quian'₅₄ gu₂ ne₁, i₂ñi₅ jë₄ ta₁guio₃ tag₄ a₂lë₅ jmá'₃ cu₄nióg₄ ja₁le₁guí'₂ si₂: ²Guion₄ bá₄ jniá₂ ca₂le₃jë₃ ta₁ 'ua'₂ a₂jmo'₂ 'nia'₂, 'a₂ lia'₂ juin'₂ 'au'₂ né₃. Guion₅₄ bá₄ ján₃ a₂tsá₃ ma₃tiang'₃ quiang'₅₄ dsa₂ i₂jmo₅ a₂'lig'₅₄. Guion₅₄ bá₄ ján₃ 'a₂ lia'₂ ma₂quion'₂ 'í₁ ja₁con₂ dsa₂ i₂i₂nio₄ a₂juá'₂ lín₅ dsa₂ i₂chen₄ quián₅ Jesús, la₁ tsá₃ guë'₂ lín₅. Ma₂ca₂jme₁jniai'₂ a₂lín₅ dsa₂ të₂jín₁. ³Juin'₂ bá₄ 'au'₂ líng'₅ ma₂ja₂nóg'₅ qui₂ñag'₅₄ uig₅ jmo'₂ ta₁ 'ñio₅ lín₃ o₄quió₃ jniá₂, tsá₃ ma₂qui₂ca₂'ú'₃ 'au'₂ 'nia'₂.

⁴La₁ia₁ cha₂ guë'₄ caun₂ ja₁cong'₂, a₂tsá₃ të₅ dsi₃: ia₁ tsá₃ ma₃'nióg'₃ jniá₂ lia'₂ jme₁'nióg'₃ le₂ne₁. ⁵Jaun₂ né₃, dsá₂ 'au'₂ 'nia'₂ jmo₄, a₂já'₄ ma₂qui₂ma₂sén'₂ 'nia'₂. Jui₁dsi₂quén'₅ táng₃ 'au'₂ 'nia'₂, jmo₄ táng₃ lia'₂ jme₁jmo'₂ le₂ne₁. Ia₁ në₁jua'₂ tsá₃ le₂jaun₂ né₃, ñi'₅₄ ta₁ la₂ dsióg₄ i₁jniá'₃ tag₄ si₂ quiáng'₂ ja₁chí'₄, në₁jua'₂ tsá₃ ca₂jme₁tsíng'₄ 'au'₂. ⁶Jñia'₅₄ lia'₂ caun₂ a₂dse₃ la₂ bá₄ cha₂ ja₁cong'₂: a₂'ñia'₅₄ 'nia'₂ 'a₂ lia'₂ lë₅ jmo₅-dsáu₅ dsa₂ nicolaítas, a₂jaun₂ bá₄ 'io₄ guë'₂ jniá₂ ján₃.

⁷Jui₁lia'₂ i₂le₁dsi₅₄ rë₂gua₄, jui₁nei₅₄ a₂juá'₂ Jme₂dsí₂ tsí'₅ ca₂le₃jín₃ guá'₅. Jui₁lia'₂ i₂ca₂tió'₃, ñei₂ guë'₃ míg₂ 'ma₂ a₂chan₂ dsa₂ co₂tan₅₄, a₂chí'₅ Ja₁jlá'₁^h quió'₅ Díu₄.

Jág₁ a₂ñó₃ ne₄ guá'₅ chan₂ Esmirna

⁸Jmo₄ si₂ ne₄ dsa₂ i₂'é₂ jág₁ guá'₅ i₂chan₂ juig₂ Esmirna chei'₅₄ le₂la₂:

Le₂la₂ juá'₂ i₂le₂'uig₅₄, i₂lín₅ jë₁ca₂tó'₂ guë'₂ táng₃; i₂ca₂jón₃ 'éi₂, i₂ma₂ca₂jen'₅₄ guë'₂ táng₃: ⁹Guion₅₄ bá₄ ca₂le₃jë₃ 'a₂ lia'₂ lë₅ chang'₂ ñag'₅₄ uig₅, ton'₂ a₂te₂ñég'₂ guë'₂ ján₃. La₁ on₃jua'₅₄ a₂dsi₂jó'₃ te₂ñég'₂ jme₁né₄, ia₁ chang'₂ bá₄ dse₃ ján₃. Guion₅₄ bá₄ ján₃ 'a₂ lia'₂ 'ag₅ 'lig'₅₄ dsa₂ i₂juá'₂ lín₅ judíos, la₁ tsá₃ guë'₂ lín₅. Dsa₂ i₂tén₅ guá'₅ sinagoga quió'₅ Satanás bá₄ 'éi₂. ¹⁰Tsá₃ jmo₂ 'nia'₂ gang'₃ 'e₂ niog₅ a₂dsi₁ñíg'₂, ia₁ tsáun'₂ i₂së₃dsen₃ toin'₂ né₃ 'má₃ i₂lín₅₄ 'nia'₂ co₂'nió'₄ a₂caun₂ táu₂, jaun₂ ñag'₅₄ 'nia'₂ uig₅ guia₃ jmig₄. La₁ tiá₂ nau₂ 'nia'₂ o₁jñia'₅₄ ca₂quín₂ 'mú₃, ia₁ jniá₂ bá₄ cuë₅₄ ja₁le₃chan'₂ 'nia'₂ co₂tan₅₄ co₂'nió'₄ caun₂ corona. ¹¹Jui₁lia'₂ i₂le₁dsi₅₄ rë₂gua₄, jui₁nei₅₄ a₂juá'₂ Jme₂dsí₂ tsí'₅ ca₂le₃jín₃ guá'₅. Jui₁lia'₂ i₂ca₂tió'₃, 'i₁caun₂ uig₅ tsá₃ jén'₄ jë₁ca₂të₂ tin₂ 'mú₃.

⁸20 griego: ángeles, co₂'nió'₄ i₂quian₅ jág₁. 'Nio'₂ ja₁ton₅ “ángel” ne₄ glosario.

^h7 griego: paradeiso (Paraíso).

Jág₁ a₂ñó₃ ne₄ guá'₅ chan₂ Pérgamo

¹² 'Jmo₄ si₂ ne₄ dsa₂ i₂'é₂ jág₁ guá'₅ i₂chan₂ juig₂ Pérgamo, chei'₅₄ le₂la₂:

Le₂la₂ juá'₂ i₂'io₅ ñi₁tág₂ 'mu₃ le₃tin₃ ton₂: ¹³ Guion₄ bá₄ jniá₂ ja₁tián'₅ 'nia'₂,ⁱ ja₁lé₄ ne₄ta₁ ja₁gon₂ Satanás. La₁ lia'₂ tión'₂ jaun₂ bá₄ 'nia'₂ tiá₂ quian'₅₄ jág₁ quió₃. Tsá₃ ma₂tí'₃ a₂'éng'₂ le₃quió₃, ca₂lia'₂ jñia'₅₄ jmig₄ lia'₂ con'₂ jme₁ca₂jñi'₃ dsa₂ Antipas, dsa₂ i₂rë₂ti'₅₄ quiáng₃ i₂jme₁jáng'₅ jág₁ dsau₅, ca₂lë₃ jë₄ quián'₂ 'nia'₂, caun₂ juig₂ ja₁guá₄ Satanás. ¹⁴ La₁ia₁ cha₂ a₂lin₅₄ ja₁cong'₂, a₂tsá₃ tē₅ dsi₃: jë₄ nē₅ quián'₂ 'nia'₂ tion'₅₄ i₂lin₅₄ i₂tsá₃ tí₂ a₂'lig'₅₄ lia'₂ jme₁jmo₅ Bala'ama a₂ca₂toin'₂ jág₁ ca₂tsí'₃ Balac', ca₂jmo₃ ca₂tsi₁sén'₂ dso₄ dsa₂ israelitas a₂ca₂gué'₃ má₃ a₂rë₂jen'₅₄ ne₄ diú₄ lag₄ quiáin₅; ca₂jmo₃ ca₂can₃ dsa₂ 'éi₂ jui₅ qui₂ca₂nió'₃ jág₁ 'lig'₅₄. ¹⁵ Le₂nē₅ bá₄ ján₃, tion'₅₄ jë₄ quián'₂ 'nia'₂ i₂lin₅₄ i₂jme₂tag₅ jág₁ quió'₅ dsa₂ nicolaítas. ¹⁶ Jui₁dsi₂quén'₅ 'au'₂ jaun₂ né₃; ia₁ nē₁jua'₂ tsá₃ ca₂tion'₂ 'nia'₂ jui₅, ñi'₅₄ ta₁ la₂ dsióg₄ jniá₂ ja₁cong'₂ i₁quíng'₃ quian'₅₄ dsa₂ 'éi₂ quian'₅₄ ñi₁tág₂ a₂'ia₂ mi₂'o₃. ¹⁷ Jui₁lia'₂ i₂le₁dsi₅₄ rë₂gua₄, jui₁nei₅₄ a₂juá'₂ Jme₂dsí₂ tsí'₅ ca₂le₃jín₃ guá'₅. Jui₁lia'₂ i₂ca₂tió'₃, ñei₂ maná a₂rë₂'ma₄, ton'₂ ñei₂ jma₃ca₂míg₂ ni₁cang₁ tiog₂ ja₁chi₁ton₅ jág₁ 'mí'₂ a₂lia'₂ chein₂, a₂tsá₃ 'ein₂ cuí'₅; jmá'₃ lia'₂ con'₂ i₂gue₃ bá₄ ñí'₂.

Jág₁ a₂ñó₃ ne₄ guá'₅ chan₂ Tiatira

¹⁸ 'Jmo₄ si₂ ne₄ dsa₂ i₂'é₂ jág₁ guá'₅ i₂chan₂ juig₂ Tiatira, chei'₅₄ le₂la₂:
Le₂la₂ juá'₂ Ja₁ñi'₅₄ Diú₄ i₂tág₅ jme₁ne₁₂ lia'₂ tág₅ jo'₅₄ si₂, i₂lé₅ mi₂tag₄ lia'₂ lë₅ ñí₁ nióg₂ a₂rë₂ta₄: ¹⁹ Guion₅₄ bá₄ ca₂le₃jé₃ 'e₂ a₂jmo'₂, 'a₂lia'₂ 'nióg'₃ ríng'₂, 'a₂lia'₂ lë₅ a₂'éng'₂ né₃, ta₁ quiáng'₂ a₂jme₂tí'₁, juin'₂ bá₄ 'au'₂ chang'₂ né₃; guion₄ bá₄ jniá₂, 'ñio₅ gué₄ jmo'₂ 'nia'₂ lia'₂ con'₂ gué₄ le₂ne₁. ²⁰ La₁ia₁ cha₂ gué₄ caun₂ ja₁cong'₂ a₂tsá₃ tē₅ dsi₃: ia₁ cuè'₂ 'nia'₂ jmig₄ 'en₅₄ jin'₄ 'nia'₂ 'io₅₄ Jezabel i₂juá'₂ i₂'é₂ jág₁ o₄quió'₄ Diú₄. Jme₂tag₂₃ a₂jñia'₅₄ qui₂jme₂gain₂₃ dsa₂ quiáng₃ i₂jme₂ti₃ ne₃ ia₁jaun₂ cán₂ jui₅ jmo₃ dsáu₃ qui₃nió'₃ jág₁ 'lig'₅₄, ia₁jaun₂ ján₃ gué₄ qui₃gué'₃ má₃ a₂rë₂jen'₅₄ ne₄ diú₄ lag₄ quiáin₅. ²¹ Ma₂cué₃ jniá₂ 'io₅₄ 'éi₂ jmig₄ ne₄ tsa₁ dsi₁quén'₅ dsí₅ 'lig'₅₄ a₂jmo₂₃, la₁ tsá₃ 'nio₃. ²² ¡Jag₄! Tóin₂ jniá₂ ne₄ tsi₁cama jaun₂ le₃dso'₅₄, ján₃ gué'₂ jmo₅₄ ñág₃ uig₅ dsa₂ i₂qui₂'no₅ dso₄ quiain'₅₄, nē₁jua'₂ tsá₃ ca₂dsi₃quén'₅ dsí₅ a₂jmo₅-dsáu₅ 'io₅₄ 'éi₂, ²³ ton'₂ jme₁dsian₅ jniá₂ chi'₂ quián₅ 'io₅₄ 'éi₂ né₃. Jaun₂ bá₄ le₃ñi₅ ca₂le₃jín₃ guá'₅, jniá₂ i₂con₂ 'í₁ 'a₂lia'₂ lë₅ jme₂dsí₂ quió'₅ dsa₂, ca₂le₃jé₃ a₂qui₂dsi₂jio₅ dsí₅ dsa₂ né₃; jaun₂ jniá₂ bá₄ cué₄ 'lian'₅₄ 'nia'₂ lia'₂ con'₂ lë₅ qui₂ca₂jmo'₅₄. ²⁴ La₁ juíg₂ jniá₂ ca₂le₃jín₃ gué₄ 'nia'₂ i₂tián'₅ juig₂ Tiatira i₂tsá₃ ma₂gue₃ jág₁ a₂jme₂tag₅ 'io₅₄ 'éi₂, on₃ gué'₂ cuí'₅ a₂té'₂ dsa₂

ⁱ13 A₂lin₅₄ chog₅₄ si₂: “Guion₅₄ bá₄ ca₂le₃jé₃ 'e₂ a₂jmo'₂, ján₃ bá₄ guion₅₄ ja₁tián'₅ 'nia'₂.”

^j14 Bala'am, Balac: 'Nio'₂ ja₁ton₅ Números 23–24.

'éi₂ jág₁ ca'₅₄ a₂rë₂'ma₄ quió'₅ Satanás: co₂në₅ bá₄ guei₂ a₂cué₄ jniá₂
'nia'₂.²⁵ Jñia'₅₄ lia'₂ caun₂ jmo'₂ 'nia'₂ a₂dse₃ a₂ma₂ja₂nóg'₅ jmo'₂, ca₂lia'₂
ca₂té₂ jmig₄ i₁dsióg₄ táng₃.²⁶ Jui₁lia'₂ i₂ca₂tió'₃, i₂qui₂jmo₅ 'a₂ con'₂ 'nio₃
jniá₂ lé₂, ca₂lia'₂ i₁ca₂té₂ jmig₄ jë₁ca₂tó'₂, cué₄ jniá₂ bí₂ jaun₂ jmo₃ 'éi'₃
ne₄ juig₂ a₂te₁'i₁ gua'₅₄ 'uë₃.

²⁷ Goin₃ ne₄ quió'₅ quian'₅₄ 'ma₂'i'₅₄

a₂lé₅ quian'₅₄ ni₁ñí₁;

qui₃dsia₃ le₁juig₁ në₂jag₄ bá₄ ni₁ti'₂,^k

²⁸ lia'₂ con'₂ lé₅ ma₂gue₃ jniá₂ 'éi'₃ ma₂cuë₃ Ne'₃. Cuín₄ jniá₂ ján₃ Nei₅
'Ióg₁.^l ²⁹ Jui₁lia'₂ i₂le₁dsi₅₄ rë₂gua₄, jui₁nei₅₄ a₂juá'₂ Jme₂dsí₂ tsí'₅
ca₂le₃jín₃ guá'₅.

Jág₁ a₂ñó₃ ne₄ guá'₅ chan₂ Sardis

3 ¹ 'Jmo₄ si₂ ne₄ dsa₂ i₂'ë₂ jág₁ guá'₅ i₂chan₂ juig₂ Sardis, chei'₅₄
le₂la₂:

Le₂la₂ juá'₂ i₂jio₅ ta₁guion₃ jme₂dsí₂ quián₅ Diú₄, i₂chan'₂ guio₃ nei₅
né₃: Guion₄ bá₄ jniá₂ ca₂le₃jé₃ a₂jmo'₂, a₂dsia₅ dsa₂ a₂jén'₃ 'nia'₂, la₁ia₁
i₂rë₂'lin'₄ bá₄ 'nia'₂.² Jme₁jnio₂ ne'₅₄, tiong'₂ táng₃ bí₂ a₂jme₁ma₂i₁jón₂
quiáng'₂, ia₁ tsá₃ ma₂dsó'₂ jniá₂ jua'₅₄ a₂rë₂tán₄ a₂qui₂ma₂jmo'₅₄ 'nia'₂
le₃ne₄ Diú₄ quiáng₃.³ Dsiog'₂ 'au'₂ 'nia'₂ jmo₄ jaun₂ né₃, a₂qui₂ma₂gue'₅₄
'nia'₂, a₂qui₂ma₂nei'₂ 'nia'₂, jui₁dsi₂quén'₅ 'au'₂. La₁ në₁jua'₂ tsá₃
ca₂jme₁jnio'₂ ne'₅₄, ñi'₅₄ ta₁ dsióg₄ jniá₂ ja₁cong'₂ con'₂ tsá₃ rë₂jáng'₁,
në₂jag₄ bá₄ jan₂ 'ang₂, ca₂lia'₂ jñia'₅₄ tsá₃ ñi'₅₄ 'nia'₂ 'e₂ hora dsióg₄.⁴ La₁
chan₂ bá₄ gué₄ i₂lin₅₄ jin'₄ 'nia'₂ guá'₅ Sardis në₅ i₂tsá₃ ma₂ca₂jme₃'ióg₃
tsin'₅₄; i₂'éi₂ né₃ jme₃quiong'₅₄ jniá₂ i₃noi₅₄ le₁qui'₂ 'mí'₂ tiog₂, ia₁
le₂jaun₂ ca₂tfin₂.⁵ Jui₁lia'₂ i₂ca₂tió'₃, tsin'₅₄ tiog₂ bá₄ qui₃quí'₃, jaun₂ lia'₂
o₁líg'₂ tsá₃ 'én₄ lia'₂ chein₂ ja₁le₁toin₂₃ ne₄ si₂ a₂chan₂ dsa₂ co₂tan₅₄.
Jaun₂ 'ín₄ jniá₂ 'éi₂ jme₁jñiai₂₃ jniá₂ ne₄ Ne'₃, ne₄ ángeles quián₅ né₃.
⁶ Jui₁lia'₂ i₂le₁dsi₅₄ rë₂gua₄, jui₁nei₅₄ a₂juá'₂ Jme₂dsí₂ tsí'₅ ca₂le₃jín₃ guá'₅.

Jág₁ a₂ñó₃ ne₄ guá'₅ chan₂ Filadelfia

⁷ 'Jmo₄ si₂ ne₄ dsa₂ i₂'ë₂ jág₁ guá'₅ i₂chan₂ juig₂ Filadelfia, chei'₅₄
le₂la₂:

Le₂la₂ juá'₂ 'éi₂ i₂jñiío₅, i₂të₃dsón'₂ tí₅ jág₁ quió'₅, i₂'io₅ ñí₁ llave quió'₅
Rag₅₄ David. Jui₁lia'₂ a₂niá₅ 'éi₂, 'i₁jan₂ tsá₃ lé₂ jnéi₃; ján₃ guë'₂ le₂jaun₂,
jui₁lia'₂ a₂jnéi₅ 'éi₂, tsá₃ 'ein₂ lé₂ le₃niá₃ táng₃.⁸ Guion₅₄ bá₄ jë₂ a₂jmo'₂.
iJag₄! Caun₂ o₄'né₄ a₂rë₂na₄ ma₂ca₂tsí'₂ jniá₂ ne'₅₄; 'i₁jan₂ tsá₃ 'ein₂ lé₂
le₃jnéi₃. O₁jñia'₅₄ la₂ tsá₃ ma₃lin₄ bég'₂,^m ma₂ca₂tion'₂ jui₅ jág₁ quió₃,
on₃jua'₅₄ jaun₂ a₂tsá₃ ma₂'ag'₅₄ jniá₂.⁹ iJag₄! Jui₁lia'₂ dsa₂ quián₅ guá'₅

^k27 Salmo 2:9.

^l28 Nei₅ 'Ióg₁ lé₅ caun₂ 'a₂ lia'₂ chen₂ Jesús. 'Nio'₂ ja₁ton₅ 2 Pedro 2:21; Apocalipsis 22:16.

^m8 o₃, "tsá₃ lin₄ juín₅ 'nia'₂."

sinagoga quió'₅ Satanás, dsa₂ i₂juá'₂ lín₅ judíos la₁ tsá₃ guè'₂ lín₅, jmo₅₄ jniá₂ chi₃jné₃ 'éi₂ ne'₅₄, ia₁jaun₂ le₃ñi₅ a₂'nió₃ jniá₂ 'nia'₂.¹⁰ 'Uig₅₄ ia₁ a₂ma₂jmo'₅₄ 'nia'₂ 'í₁ 'éi'₃ quió₃ a₂tion'₅₄ 'nia'₂ juin'₂ 'au'₂, jmo₅₄ bá₄ jniá₂ 'í₁ 'nia'₂ a₂tsá₃ jióg'₂ 'í₁ ja₁cong'₂ jui₁lia'₂ a₂dsi₃ñí₂ dsa₂ i₂chan₂ ta₁caun₂ gua'₅₄ 'uë₃.¹¹ Ní'₅₄ ta₁ bá₄ guióng₄. Jmo₄ 'í₁ a₂ma₂ting'₂ ia₁jaun₂ tsá₃ 'ein₂ jniá'₂ corona quiáng'₂.¹² Jui₁lia'₂ i₂ca₂tió'₃, jmo₅₄ jniá₂ a₂léin₂ në₂jag₄ bá₄ ni₁dsi₅ a₂chí'₅ dsi₂néi₂ guá'₅ templo quió'₅ Diú₄ quiáng₃. O₁líg'₂ jmig₄ tsá₃ ma₃'uúin₃ ja₁jaun₂. Ne₄ quió'₅ 'éi₂, taun₅₄ lia'₂ chen₂ Diú₄ quiáng₃, quian'₅₄ guè'₂ 'a₂ lia'₂ chei₂ juig₂ quió'₅ Diú₄ quiáng₃ né₃: juig₂ Jerusalén 'mí₂ a₂sió₃ guei'₅₄ i₂juíg₃ quió'₅ Diú₄ quiáng₃. Ján₃ guè'₂ le₂jaun₂ taun₅₄ jniá₂ ne₄ 'éi₂ jág₁ 'mí₂ lia'₂ cheng₂.¹³ Jui₁lia'₂ i₂le₁dsi₅₄ rë₂gua₅₄, jui₁nei₅₄ a₂juá'₂ Jme₂dsí₂ tsí'₅ ca₂le₃jín₃ guá'₅.

Jág₁ a₂ñó₃ ne₄ guá'₅ chan₂ Laodicea

¹⁴ 'Jmo₄ si₂ ne₄ dsa₂ i₂'é₂ jág₁ guá'₅ i₂chan₂ juig₂ Laodicea, chei'₅₄ le₂la₂:

Le₂la₂ juá'₂ i₂lín₅ tē₃dsón'₂,ⁿ i₂jáng'₅ jág₁ dsau₅ i₂rë₂ti'₅₄, i₂lín₅ juig₅₄ ne₄ ca₂le₃jé₃ a₂ca₂jmo₃ Diú₄:¹⁵ Guion₄ bá₄ jniá₂ ca₂le₃jé₃ 'a₂ lia'₂ lé₅ jmo'₂ 'nia'₂. Guion₅₄ bá₄, a₂tsá₃ güíng'₂, on₃ guè'₂ dséng'₂ né₃. iJua'₅₄ co₂nei'₅₄ bá₄ guè'₂ güíng'₂, o₃ co₂nei'₅₄ bá₄ guè'₂ dséng'₂!¹⁶ La₁ 'uig₅₄ ia₁ a₂jñia'₅₄ dsión'₂ 'nia'₂, ia₁ tsá₃ güíng'₂ guè'₂ co₂nei'₅₄, on₃ guè'₂ dséng'₂ né₃, jaun₂ ráun₂ i₁ñí₄ jniá₂ 'nia'₂ jui₅ mi₂'o₃.¹⁷ Ia₁ juá'₂ 'nia'₂ a₂ma₂chang'₂ dse₃ a₂ma₂qui₂ma₂dsia'₅₄ 'nia'₂ 'lióng₂ rë₂má'₂, ton'₂ tsá₃ 'e₂ 'nió'₅ quiáng'₂; la₁ tsá₃ jaun₂ len'₅₄ 'nia'₂ a₂lín'₅ dsa₂ i₂lë₁ñéi₂ dsí₅, i₂te₂ñé₂, i₂ten₄, i₂rë₂cuán'₃ né₃.¹⁸ 'Uig₅₄ jaun₂ ton'₂ jniá₂ jág₁ 'nia'₂, i₂nó'₅ 'nia'₂ ja₁con₂ jniá₂ i₂liá₃ cu₄nióg₄ a₂rë₂lag₄ quian'₅₄ si₂, ia₁jaun₂ gué₄ dsón'₂ le₃chang'₂ dse₃; i₂liá₃ 'nia'₂ tsíng'₂ tiog₂ a₂qui₁qui'₅₄, ia₁jaun₂ tsá₃ le₃jniá₂ a₂o₂guí'₃ a₂rë₂cuáng'₃. I₂liá₃ mí₅ 'ág'₄ jme₁ne'₄ ia₁jaun₂ jnio₂, lé₂ jag'₅₄.¹⁹ Të₂jén₅ jniá₂ tsíng'₂ táng₃ jui₅ dse₃ ca₂le₃jín₃ i₂'nióg₃. Jui₁len'₅₄ bá₄ 'nia'₂ dsa₂ i₂dsen₅₄ dsí₅ jaun₂ né₃, jui₁dsi₂quén'₅ 'au'₂.²⁰ iJag₄! La₂ chén'₅ jniá₂ o₄'né₄ tē₅; chi₂jua'₂ chan₂ i₂ca₂nág₂ jág₁ quió₃, niá₅ o₄'né₄ né₃, jaun₂ bá₄ 'ú₄ dsi₂néi₂ quió'₅, guè'₅₄ co₂lë₅ quian'₅₄.²¹ Jui₁lia'₂ i₂ca₂tió'₃, cué₄ jma₃caun₂ ja₁tiain'₃ cau₅ quió₃ ne₄ta₁ ja₁gua₄ jniá₂, jui₁lia'₂ ca₂tió₃ jniá₂, jaun₂ ca₂gua₃ con₂ Nē'₃ ne₄ta₁ quió'₅.²² Jui₁lia'₂ i₂le₁dsi₅₄ rë₂gua₅₄, jui₁nei₅₄ a₂juá'₂ Jme₂dsí₂ tsí'₅ ca₂le₃jín₃ guá'₅.

'A₂ lia'₂ qui₂rë₂juin'₂ Diú₄ guei'₅₄ i₂juíg₃

4 ¹ Cang₂ gué₄ jaun₂, ca₂jág₃ táng₃ jniá₂ caun₂ o₄'né₄ rë₂na₄ guei'₅₄ i₂juíg₃. Jaun₂ ca₂nag₃ jág₁ jaun₂ a₂ca₂nag₃ le₂'uig₅₄ a₂né'₂ në₂jag₄ bá₄ jë₁i₂'ein₅₄ ñí₁ trompeta, ca₂juá'₂ tság₅ jniá₂:

ⁿ14 lit. "Le₂la₂ juá'₂ jui₁lia'₂ i₂té'₂ A₂méi₃."

—Uí₂ ja₁lá₃, jaun₂ 'ë₅₄ ca₂le₃jé₃ a₂nio₅ lé₂ cang₂ gué₄ jë₁ma₂lë₅
a₂ma₂në₂jag₁'₅₄ në₅.

² Jaun₂ ca₂lë₃ jme₁'en₅₄ jniá₂ le₃quió'₅ Jme₂dsí₂, jaun₂ ca₂jnia₃ caun₂
ne₄ta₁ chí'₅ guei'₅₄ i₂juíg₃. Ne₄ ne₄ta₁ jaun₂ jme₁guá₄ jan₂ dsa₂. ³ Dsa₂
i₂jme₁guá₄ 'éi₂ në₃, jme₁jniá₂ tá₅ 'ñio₅ lín₃ në₂jag₄ bá₄ ni₁cang₁ tá₅
jaspe o₃ cornalina. Le₃lág'₃ ne₄ta₁ ja₁guá₄ jaun₂ jme₁jniá₂ mi₂jo'₅₄ si₂
a₂tág₅ lín₃, në₂jag₄ bá₄ ni₁cang₁ esmeralda. ⁴ Le₃lág'₃ ne₄ta₁ ja₁guá₄ dsa₂,
ca₂jág₃ con'₂ gué₄ guió₂-quén₂ ne₄ta₁ ja₁tián'₄ guió₂-quén₂ gui'₅₄ can'₅₄
i₂le₁lín₁ le₁qui'₂ jmá'₃ 'mi'₂ tiog₂, tio'₅₄ coronas a₂lé₅ jmá'₃ cu₄nió₄ dsi₅₄.
⁵ Ja₁chí'₄ ne₄ta₁ jaun₂, qui₂lé₂ si₁ñí'₃, chí'₅ co₂mi'₅₄, quia'₂ ñí'₃ në₃. Ne₄
ja₁chí'₄ ne₄ta₁ jaun₂, jniá₂ guio₃ si₂ ni₁tsí₅ a₂cau₂. A₂jaun₂ në₃ lé₅
ta₁guion₃ jme₂dsí₂ quián₅ Diú₄. ⁶ Të₂le₃ ne₄ jui₅ ne₄ta₁ në₃, jniá₂ táng₃
lia'₂ lé₅ jmi₁ñí'₄ a₂lé₅ ui'₂ lín₃ jui₁lia'₂ ui'₂ ni₁'i₂.

Dsi₂jo₂, le₂tan₅₄ le₃lág'₃ ja₁chí'₄ ne₄ta₁, jniá₂ táng₃ quén₂ i₂lín₅ lia'₂ lín₅
já'₂ i₂rë₂can'₂ jmá'₃ mi₂ne₄ lia'₂ le₃ne₅₄ lia'₂ le₃co'₅₄ lag₁₂ në₃.

⁷ Jë₁le₂'uig₅₄ já'₂ quén₂ 'éi₂ në₃, jniá₂ lia'₂ jniá₂ dsi₂'ia'₂ león. Jë₁ca₂të₂
on₃, jme₁lín₄ lia'₂ lín₅ jan₂ guein₂ ca₁jui₅. Jë₁ca₂të₂ ún₂, jniá₂ dsi₂ne₅₄
lia'₂ jniá₂ dsi₂ne₄ dsa₂ mi₂güig₃. I₂jë₁ca₂të₂ quén₂ në₃, jniá₂ lia'₂ jniá₂
i₁mi₂g₂ i₂'en₅ güig₂. ⁸ Jë₁le₃quén₂ le₂jaun₂ në₃, le₁dsi₅₄ jma₃jñéi₂
tsi₁rë₂cu₅ le₂jain₂ le₂jain₂. Qui₂rë₂lióin₃ mi₂ne₄ le₃co'₅₄ lia'₂ le₃né'₃ në₃.
Lia'₂ 'uë₂-jmi₂ bá₄ tsá₃ 'na₂ i₁juá'₄:

Jñio₅ bá₄, jñio₅ bá₄, jñio₅ bá₄,

Te₁gui'₅₄ Diú₄ i₂'uan'₂ gué₄ lín₃,

i₂jme₁lín₄, i₂lín₅ rë₂në₃,

i₂lén₂ co₂tan₅₄ bá₄ ján₃.

⁹ Lia'₂ co₂ráun₂ cuë₅ já'₂ 'éi₂ cuë'₅ ti₁'mag'₄ jme₂juin'₂ gué₄ lín₃ i₂guá₅
ne₄ ne₄ta₁, i₂chan₂ co₂tan₅₄ në₃, ¹⁰ jaun₂ gué₄ qui₂tón₂ 'uë₃ ta₁guión₂-
quén₂ gui'₅₄ can'₅₄ 'éi₂, ne₄ i₂guá₅ ne₄ ne₄ta₁, qui₂jme₂juin'₂ i₂chan₂
co₂tan₅₄, qui₂dsia₂₃ coronas quió'₅ 'uig₅₄ ne₄ta₁, juá'₂:

¹¹ Te₁gui'₅₄ Diú₄ quián₂,

'ne₂ bá₄ ca₂tíng'₂ guéi'₁ a₂jme₃juag'₂ dsa₂,

'ne₂ bá₄ ca₂tíng'₂ 'éi'₃, jui₅bí₂ në₃.

Ia₁ co₂jaun₂ ca₂rë₃'ñio₃ 'au'₂

a₂ca₂rë₃chá₃ ca₂le₃jé₃ a₂cha₂.

Si₂ a₂rë₂bin₅ quian'₅₄ guë'₂ Guein₂ Já'₂ Cha'₂

5 ¹ Jaun₂ ca₂jág₃ jniá₂ i₂guá₅ ne₄ ne₄ta₁ 'éi₂ chi₁chan'₂ quian'₅₄ gu₂
ne₁ caun₂ mi₂si₂ a₂rë₂bin₅ tio'₅₄ jág₁ lia'₂ le₃co'₅₄ lia'₂ le₃né'₃,
a₂chi₁jñi₅ dse₃ quian'₅₄ guio₃ bë'₅₄ mi₄cuíng₅. ² Jaun₂ ca₂jíng₅₄ jan₂ ángel
i₂'uan'₂ lín₃ quián₅ Diú₄, jniá₂ chéin'₅ ñag₂₃ juá'₂ tiá₂:

—¿Ein₂ 'éi₂ i₂ca₂tín₂ niá₃ si₂ në₅, qui₃choin₃ mi₄cuíng₅ quió'₅ në₃?

³ La₁ on₃ guë'₂ guei'₅₄ i₂juíg₃, on₃ guë'₂ ne₄ gua'₅₄ 'uë₃, on₃ guë'₂
le₃né'₃ gué₄ gua'₅₄ 'uë₃, tsá₃ chan₂ 'i₁jan₂ i₂ca₂tín₂ niá₃ si₂ jaun₂, on₃

guë'₂ ca₂tín₂ jág₃.⁴ 'Nio₅ lín₃ ca₂'o₃ jniá'₂ 'uig₅₄ ia₁ a₂tsá₃ 'ein₂ ca₂dsán'₂
'i₁jan₂, i₂ca₂tín₂ jme₁niá₃ si₂ jaun₂,^o on₃ guë'₂ a₂jág₃.⁵ Jaun₂ né₃, jan₂
i₂lín₅ gui'₅₄ can'₅₄ 'éi₂ ca₂tság₃ jniá'₂:

—Tsá₃ lë'₁au₂ 'ne₂, ia₁ i₂lín₅ 'ia'₂ león quián₅ tsi₁jon₂ Judá, i₂ca₂lín₃
cho'₅₄ Rag₅₄ David, 'éi₂ bá₄ ma₂ca₂tió'₃; 'éi₂ bá₄ ca₂tín₂ niá₃ si₂, le₂jiog₅
ta₁guio₃ mi₄cuíng₅ quió'₅ né₃.

⁶ Jaun₂ ja₁lë'₄ dsi₂jo₂ ne₄ta₁, jë'₄ quió'₅ le₃quén₂ já'₂ 'éi₂, jë'₄ quió'₅ gui'₅₄
can'₅₄ né₃, ca₂jíng₅₄ jan₂ i₂lín₅ lia'₂ lín₅ Guein₂ Já'₂ Cha'₂ chéin'₅, a₂lén₄
në₂jag₄ i₂ca₂jon₃ ca₂jñag'₃ dsa₂. Le₁dsi₅₄ guio₃ mi₂juí'₁, guio₃ guë'₂
mi₂ne₅₄. Mi₂ne₅₄ jaun₂ né₃ co₂'nió'₄ guion₃ jme₂dsí₂ quián₅ Diú₄
i₂ma₂'uin₂ a₂chein₅₄ ta₁caun₂ gua'₅₄ 'uë₃.⁷ I₂lín₅ Guein₂ Já'₂ Cha'₂ 'éi₂
né₃, nóg₃ ca₂tín₂ mi₂si₂ rë₂bin₅ a₂jme₁chi₁chan'₂ le₂gu₂ ne₁ i₂guá₅ ne₄ta₁.

⁸ Jme₁ca₂can₃ mi₂si₂, jaun₂ qui₂ca₂tón₂ 'uë₃ le₃quén₂ já'₂ 'éi₂, quian'₅₄
guë'₂ ta₁guión₂-quén₂ gui'₅₄ can'₅₄ né₃, ca₂tóin₂ ne₄ Guein₂ Já'₂ Cha'₂.
Le₂jan₂ le₂jan₂ 'éi₂ né₃ le₁chan'₂ jma₃caun₃ tsi₁ton₅ arpa,^p le₁chan'₂
jma₃caun₃ guë'₂ ni₁uín₅ ji'₂ a₂lë'₅ jmá'₃ cu₄nióg₄, a₂le₁can'₂ chen₂,
a₂co₂'nió'₄ jág₁ a₂qui₂rë₂jen'₅₄ ne₄ Diú₄ a₂qui₂chi₂léi'₂ dsa₂ quiáin₅.^q

⁹ Tioin'₅₄ 'ë₂₃ caun₂ canto 'mí₂ la₂:

'Ne₂ bá₄ ca₂tíng'₂ jma'₅₄ mi₂si₂,

a₂chóng'₄ mi₄cuíng₅ quió'₅;

ia₁ 'ne₂ bá₄ i₂ca₂jñag'₃ dsa₂.

Quian'₅₄ jmi₂ 'ang'₅₄ a₂ca₂tein'₅₄,

ca₂liáng'₃ dsa₂ mi₂güíng₃ le₃quió'₅ Diú₄:

ca₂le₃jín₃ ne₅₄ dsa₂ i₂chan₂,

ca₂le₃jé₃ jág₁ jmei₅,

ca₂le₃jé₃ juig₂ te₁'i₁ mi₂güíng₃,

ca₂le₃jé₃ tsi₁jon₂ né₃.

¹⁰ Ma₂ca₂jmoi'₅₄ rag₅₄, jme₂dsa₂ né₃,

le₃quió'₅ Diú₄ quián₂.

Jaun₂ 'éi₂ bá₄ le₃gon₂ ne₄ gua'₅₄ 'uë₃.

¹¹ Jaun₂ jme₁ca₂jág₃, ca₂nag₃ jniá'₂ jág₁ quió'₅ juín₅ ángeles, i₂lë'₂ tē₂le₃
mei₅, i₂lë'₂ ca₂lia'₂ juín₅ lín₃. Jme₁tioin'₅₄ le₃lág'₃ ne₄ta₁ jaun₂, quian'₅₄
guë'₂ já'₂ quén₂ 'éi₂, gui'₅₄ can'₅₄ né₃,¹² i₁juá'₄ tiá₂ lín₃:

i₂ca₂tín₂ Guein₂ Já'₂ Cha'₂ i₂ca₂jñag'₃ dsa₂,

a₂le₂goin₂₃, 'io₃ ca₂le₃jé₃ a₂jlá'₁,

a₂tiin₂ a₂ñí'₂ dsí₅,

a₂gue₃ jui₅bí₂, a₂jme₃juag'₂ dsa₂,

a₂lén₂ tág₅ co₂'né'₅, a₂jme₃go₃ dsa₂!

^o4 A₂lín₅₄ chog₅₄ si₂ juá'₂ ján₃: “on₃ guë'₂ 'i₃.”

^p8 griego: kithara.

^q8 lit. “dsa₂ jñiós.”

¹³ Ca₂nag₃ jniá₂ já₃, ca₂le₃jín₃ i₂chan₂ i₂ca₂jmó'₂ Diú₄ guei'₅₄ mi₂güüg₃
 quian'₅₄ gua'₅₄ 'uë₃, quian'₅₄ le₃né'₃ 'uë₃; ne₄ jmi₁ñí'₄, i₂chan₂ le₃né'₃
 jmi₁ñí'₄ né₃, i₁juá'₄:

iLe₃quió'₅ i₂guá'₅ ne₄ ne₄ta₁,
 le₃quió'₅ Guein₂ Já'₂ Cha'₂ né₃,
 jui₁jme₂go₃ dsa₂ jui₁jme₂juag'₂ dsa₂;
 jui₁gue₁₂ a₂tág₅ co₂'né'₅,
 jui₁gue₁₂ jui₅bí'₂ né₃
 ca₂lia'₂ co₂tan₅₄!

¹⁴ Jaun₂ ca₂juá'₂ le₃quén₂ já'₂:

—iA₂mei₃!

Ta₁guión₂-quén₂ gui'₅₄ can'₅₄ né₃ qui₂ca₂tóin₂ 'uë₃ qui₂ca₂jme₃juag'₂.^r

Ca₂niá₃ ta₁guio₃ mi₄cuing₅

6 ¹ Ca₂jág₃ jniá₂ jme₁ca₂niá₃ Guein₂ Já'₂ Cha'₂ jë₁le₂'uig₅₄ mi₄cuing₅
 guio₃ jaun₂, ca₂né'₂ i₁juá'₄ jan₂ rin'₅₄ i₂quén₂ já'₂ 'éi₂. Né'₂ lé₅ já₃
 quió'₅ në₂jag₄ bá₄ jë₁quia'₂ ñí'₃, a₂juá'₂:

—iNia₅, jaun₂ jag'₅₄!

² Jaun₂ jme₁ca₂jág₃ jniá₂, jaun₂ ca₂jing₅₄ jan₂ i₁cua₁ tion₂.
 I₂jme₁co₂dsin₅₄ já'₂ 'éi₂ né₃ jme₁chan'₂ caun₂ ni₁'ma₂ cág'₅. Jaun₂ ca₂ñii₂
 caun₂ corona, jaun₂ ca₂o₃'ín₃ ñó₃ ne₄ 'nei₂ a₂tió'₃ a₂lí'₂ 'nei₂.

³ Jme₁ca₂niá₃ Guein₂ Já'₂ Cha'₂ jë₁ca₂té₂ tin₃ mi₄cuing₅, jaun₂ ca₂nag₃
 i₁juá'₄ jë₁ca₂té₂ on₃ já'₂ 'éi₂:

—iNia₅, jaun₂ jag'₅₄!

⁴ Jaun₂ ca₂jnia₃ ca₂o₃'ín₃ táng₃ jan₂ dsi₂cua₁ guén₂; dsa₂
 i₂jme₁co₂dsag₅₄ guë'₂ né₃, ca₂ñii₂ bí₂ a₂lé₂ jmo₃ a₂ñia'₃ a₂'ei₅ tei₄
 ta₁caun₂ gua'₅₄ 'uë₃, ia₁jaun₂ jme₃dsian₅ dsa₂ riin'₅₄. Jaun₂ 'éi₂ né₃
 ca₂ñii₂ caun₂ ñi₁tág₂ juë'₂.

⁵ Jme₁ca₂niá₃ Guein₂ Já'₂ Cha'₂ jë₁ca₂té₂ 'ni₅ mi₄cuing₅, jaun₂ ca₂nag₃
 táng₃ i₁juá'₄ i₂ca₂té₂ ún₂ já'₂:

—iNia₅, jaun₂ jag'₅₄!

Jaun₂ jme₁ca₂jág₃ táng₃ jniá₂, ca₂jnia₃ táng₃ jan₂ dsi₂cua₁ lian'₂; dsa₂
 i₂jme₁co₂dsag₅₄ né₃, caun₂ mi₂gu₂ jme₁chan'₂ caun₂ cua'₅₄ 'éi'₃. ⁶ Jaun₂
 ca₂né'₂ já₃ jë₄ quió'₅ le₃quén₂ já'₂, a₂juá'₂:

—Caun₂ kilo cui₂ bá₄ le₂caun₂ denario; 'ni₅ kilo cebada le₂caun₂
 denario. La₁ tsá₃ i₂'én₅ aceite quian'₅₄ vino.

⁷ Jme₁ca₂niá₃ Guein₂ Já'₂ Cha'₂ jë₁ca₂té₂ quén₂ mi₄cuing₅, jaun₂
 ca₂nag₃ i₁juá'₄ jë₁ca₂té₂ quén₂ já'₂:

—iNia₅, jaun₂ jag'₅₄!

⁸ Jme₁ca₂jág₃ jniá₂, ca₂jnia₃ jan₂ dsi₂cua₁ nió₂; i₂jme₁co₂dsag₅₄ né₃,
 jme₁chein₂ 'Mú₃. Chi₁co'₅₄ quió'₅ 'éi₂ guë'₂ né₃ já₅ jan₂ i₂té'₂ Tau₂ 'Njo₅.^s

^r14 A₂lin₅₄ chog₅₄ si₂ juá'₂: “qui₂ca₂jme₃juiin'₂ i₂chan₂ co₂tan₅₄.”

Le₃on₃ 'éi₂ né₃ ca₂ñi₂ bí₂ ne₄ quió'₅ gua'₅₄ 'uë₃ caun₂ qui'₅₄ quió'₅ quén₂, a₂jme₃dsiain₂₃ dsa₂ quian'₅₄ ñi₁ tág₂, quian'₅₄ a₂le₃'on₄ dsa₂, quian'₅₄ jmi₁uig₅, quian'₅₄ já'₂ tsau₂ dsí₅ né₃, i₂chan₂ gua'₅₄ 'uë₃.

⁹ Jme₁ca₂niá₃ Guein₂ Já'₂ Cha'₂ jë₁ca₂të₂ 'ñiá₂ mi₄cuing₅, ca₂jág₃ jniá₂ né'₃ ne₄chei₂ ja₁tion'₅₄ jme₂dsí₂ quió'₅ dsa₂ mi₂güí₃ i₂ca₂jme₃dsian₅ dsa₂ ne₄ 'uig₅₄ quió'₄ jág₁ dse₃ quió'₅ Diú₄, quian'₅₄ ne₄ 'uig₅₄ quió'₄ jág₁ dsau₅ a₂qui₂ca₂can₃. ¹⁰ Jaun₂ tiá₂ né'₂ jág₁ quió'₅ 'éi₂, i₁juá'₄:

—¿Con'₂ je₂líg'₂ caun'₅₄ 'í₁, Te₁gui'₅₄ i₂jñiós i₂tí₅ jág₁ quiáng'₂, ja₁con₂ dsa₂ i₂chan₂ gua'₅₄ 'uë₃, jaun₂ caun'₅₄ 'ma'₅₄ jmi₂ 'au₅₄ jnia'₅₄?

¹¹ Jaun₂ qui₂ca₂ñi₂ le₂jain₂ le₂jain₂ 'mi'₂ tiog₂. Jaun₂ ca₂né'₂ i₁juá'₄ a₂jñia₃ gué₄ co₂'na₂, tē₁lia'₂ le₃'ñia₅ riin'₅₄ i₂jme₂ti₃ ta₁ ne₄ Cristo, i₂'i₄ 'éi'₃ dsián₃ gué₄, jui₁lia'₂ ca₂dsan₃ 'éi₂.

¹² Jme₁ca₂niá₃ Guein₂ Já'₂ Cha'₂ jë₁ca₂të₂ jñéi₂ mi₄cuing₅, ca₂jág₃ jniá₂ ca₂i₁bi₅₄ 'uë₃ tiá₂ lín₃. Ca₂të₁tsi'₅₄ qui₁né'₃, ca₂rë₃liá'₃ 'iog₂ në₂jag₄ bá₄ tsi₁'mi'₂ taun₅ a₂lé₅ quian'₅₄ ni₁jñi₂, a₂quí'₅ dsa₂ ja₁ron₅ 'lag₄. Tsi'₂ guë'₂ né₃ ca₂jnia₃ guéin₂, lia'₂ jniá₂ jmi₂. ¹³ Nei₅ guë'₂ né₃ qui₂tsi₂ca₂séi'₂ 'uë₃ në₂jag₄ bá₄ tsi₂séi'₂ míg₂ higo rē'₂ jë₁ma₂ca₂guiong'₃ dsí₂ tiá₂. ¹⁴ Guei'₅₄ dsi₂güig₂ né₃ co₂dsia₅ ca₂i₃'én₂ ca₂bin₃ lia'₂ ja₁bin₅ mi₂si₂. Ca₂le₃jé₃ ni₁má'₂, ca₂le₃jé₃ 'uë₃ le₁quí'₅ jë₄ jmi₁ñi'₄ né₃, qui₂ca₂jñióg'₃ cau₅ ja₁jme₁niog₅. ¹⁵ Jaun₂ qui₂ca₂'ma₃ jui₅ né'₃ tau₂ 'lau₂, jui₅ jë₄ ni₁'lau₂ cha₂ má'₂, jui₁lia'₂ rag₅₄ i₂gon₂ gua'₅₄ 'uë₃, jui₁lia'₂ dsa₂ dsen₅₄, jui₁lia'₂ dsa₂ juig₅₄ 'lióg₂, jui₁lia'₂ dsa₂ i₂cha₂ cu₄, jui₁lia'₂ dsa₂ 'uan₂, ca₂le₃jín₃ jui₁lia'₂ i₂jme₂ti₃ ta₁ ne₄ juig₅₄, jui₁lia'₂ dsa₂ i₂tsá₃ 'ein₂ ne₄ jme₂ti₃ né₃; ¹⁶ qui₂ca₂juá'₂ ca₂tsí'₃ má'₂, ni₁'lau₂:

—Sen'₅₄ 'nia'₂ ne₄ quián₂ jnia'₅₄, 'mog₅₄ jnia'₅₄ ia₁jaun₂ tsá₃ jág₂ i₂guá₅ ne₄ta₁ ó₃, tsá₃ cuë₂ jmig₄ a₂'é₂ Guein₂ Já'₂ Cha'₂ ó₃ uig₅ a₂'nei₂. ¹⁷ Ia₁ në₃ gué₄ dsón'₂ gua₅ jmig₄ a₂'ñio₅ jaun₂ a₂'é₂ uig₅ a₂'nei₂. ¿Ein₂ bá₄ qui'₅₄ jmig₄ tió'₅?

Dsa₂ tsi₁jon₂ Israel i₂lín₅ léi₄

7 ¹ Jme₁ma₂ca₂lë₃ jaun₂, ca₂jñing₅₄ quén₂ ángeles, tióin₂ le₃quén₂ qui'₅₄ mi₂güí₃, a₂jné₅ le₃quén₂ dsí₂ quió'₅ gua'₅₄ 'uë₃, ia₁jaun₂ tsá₃ ma₃lé₂ 'ag₃ dsí₂ ta₁caun₂ ne₄ gua'₅₄ 'uë₃, on₃ guë'₂ ne₄ jmi₁ñi'₄, on₃ guë'₂ ne₄ 'i₁caun₂ ni₁'ma₂. ² Jaun₂ gué₄ ca₂jñing₅₄ jan₂ ángel sián'₂, já₅ tē₂le₃ ja₁'ia₂^t 'iog₂, já₅ 'éi₂ quian₅ sello quió'₅ Diú₄ jén'₃. Ángel 'éi₂ gué₄ né₃ ca₂tsí'₃ le₃quén₂ ángeles i₂jme₁ma₂ñi₂ bí₂ a₂jmo₃ dain₅₄ 'uë₃ quian'₅₄ guë'₂ jmi₁ñi'₄, ca₂juá'₂ tiá₂ lín₃:

⁸ griego: hades, co₂'nió'₄ a₂juá'₂, ja₁quió'₄ 'lag₄.

² Co₂'nió'₄ le₃jua'₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio'₂ ja₁ton₅ Salmo 8:3; Romanos 1:25.

³ —'A₃ lē₁jmo₂ de'₂ dain₅₄ 'uē₃, on₃ guē'₂ jmi₁ŋí'₄, on₃ guē'₂ ni₁'ma₂ a₂cha₂ né₃, ca₂lia'₂ ca₂tiong₅₄ jnia'₅₄ léi₄ quian'₅₄ sello ne₄ chi₁quí₃ dsa₂ i₂jme₂ti₃ ne₄ Diú₄ quián₂.

⁴ Jaun₂ ca₂nag₃ jniá₂ 'a₂ con'₂ tén₅ i₂ca₂lin₃ léi₄ 'éi₂; lē₂ caun₂ 'ŋiá₂-láu₂ rē₂dsí₂ tē₂láu₃-quén₂ mei₅ (144,000), jmá'₃ dsa₂ tsi₁jon₂ dsa₂ juig₂ Israel.

⁵ Guia₃-tín₂ mei₅ dsa₂ i₂ca₂lē₃ lén₄ dsa₂ tsi₁jon₂ Judá;

guia₃-tín₂ mei₅ dsa₂ tsi₁jon₂ Rubén;

guia₃-tín₂ mei₅ dsa₂ tsi₁jon₂ Gad;

⁶ guia₃-tín₂ mei₅ dsa₂ tsi₁jon₂ Aser;

guia₃-tín₂ mei₅ dsa₂ tsi₁jon₂ Neftalí;

guia₃-tín₂ mei₅ dsa₂ tsi₁jon₂ Manasés;

⁷ guia₃-tín₂ mei₅ dsa₂ tsi₁jon₂ Simeón;

guia₃-tín₂ mei₅ dsa₂ tsi₁jon₂ Leví;

guia₃-tín₂ mei₅ dsa₂ tsi₁jon₂ Isacar;

⁸ guia₃-tín₂ mei₅ dsa₂ tsi₁jon₂ Zabulón;

guia₃-tín₂ mei₅ dsa₂ tsi₁jon₂ José;

guia₃-tín₂ mei₅ dsa₂ tsi₁jon₂ Benjamín né₃.

Dsa₂ i₂juin₅ lin₃ le₁qui'₂ 'mi'₂ tiog₂

⁹ Jme₁ca₂lē₃ jaun₂, ca₂jág₃ táng₃ jniá₂, jaun₂ ca₂jnia₃ juin₅ lin₃ dsa₂, ca₂lia'₂ 'i₁jan₂ tsá₃ 'ein₂ qui'₅₄ jmi₄g₄ 'i₃ quió'₅; dsa₂ chan₂ ca₂le₃jé₃ juig₂, ca₂le₃jé₃ tsi₁jon₂, ca₂le₃jé₃ go₄ dsa₂, ca₂le₃jé₃ jág₁ jmei₅ né₃. Tióin₂ 'uig₅₄ ne₄ta₁ quian'₅₄ ne₄ Guein₂ Já'₂ Cha'₂, i₂le₁qui'₂ 'mi'₂ tiog₂, i₂le₁chan'₂ jma₃ca₂nei'₅₄ mog'₅₄ 'ma₂tsín₅. ¹⁰ Tioin'₅₄ co₂mi'₅₄ juá'₂:

Jui₁lia'₂ a₂lión₂ dsa₂,

já₅ quió'₅ Diú₄ quián₂ bá₄ jniog₄ i₂guá₅ ne₄ta₁;

já₅ quió'₅ Guein₂ Já'₂ Cha'₂ né₃.

¹¹ Jme₁tióin₂ ca₂le₃jín₃ ángeles le₃lág'₃ ne₄ta₁, le₃lág'₃ quió'₅ gui'₅₄ can'₅₄ quian'₅₄ guē'₂ já'₂ quén₂ 'éi₂. Jaun₂ qui₂ca₂tóin₂ 'uē₃ rē₂ 'éin₂ co₂ŋei'₅₄, ca₂jme₃juin'₂ Diú₄, ¹² a₂juá'₂:

iA₂méi₃!

Le₃quió'₅ Diú₄ quián₂ bá₄ ca₂tín₂

ca₂le₃jé₃ a₂jme₃go₃ dsa₂,

ca₂le₃jé₃ a₂lén₂ tág₅ co₂'né'₅,

ca₂le₃jé₃ a₂ŋí'₂ dsí₅,

ca₂le₃jé₃ ti₁'mag'₄,

ca₂le₃jé₃ a₂jme₃juag'₂ dsa₂,

ca₂le₃jé₃ a₂le₃goin₂,

ca₂le₃jé₃ jui₅bí₂,

ca₂lia'₂ co₂tan₅₄. A₂méi₃.

¹³ Jaun₂ né₃, jan₂ gui'₅₄ can'₅₄ 'éi₂ ca₂ŋag₃ jniá₂ ca₂juá'₂:

—¿Ein₂ bá₄ i₂le₁qui'₂ tsin'₅₄ tiog₂ tióin₂ ně₅? ¿Já'₄ ja₂lén₂?

¹⁴ Jaun₂ ca₂ŋag₄ jniá₂:

—Ní⁵⁴ bá⁴ 'ne₂, gui⁵⁴.
 Jaun₂ ca₂ṇag₃ táng₃ gui⁵⁴ 'éi₂:
 —I₂ně₅ bá⁴ 'éi₂ i₂ma₂ṇi₅ Jmí₁uig₅ Juë²; ma₂qui₂ca₂rang₃ tsin⁵⁴,
 ma₂jmo₃ tiog₂ ně₃ tē₂le₃ quian⁵⁴ jmi₂ 'an⁵⁴ Guein₂ Já² Cha². ¹⁵ 'Uig⁵⁴
 jaun₂ ně₃,
 tióin₂ ne₄ta₁ ně₅ quió⁵ Diú₄,
 jme₂ti₃ ne₅₄ lia² 'uë₂-jmi₂ dsi₂néi₂ guá⁵ ně₅ quió⁵;
 i₂guá₅ ne₄ ne₄ta₁ ó₃ ně₃, 'éi₂ bá⁴ jmo₃ 'í₁
 ně₂jag₄ a₂qui₃lín₂ dsa₂ quian⁵⁴ 'mí² 'én¹ quió⁵.
¹⁶ Tsá₃ ma₃qui₂i₁cón⁵ lé₂,
 on₃ guë² ma₃qui₃le₃quein₂ dsí₅, i₁'ín² jmig₂,
 on₃ guë² ma₃qui₃ṇág₂ gué⁴ uig₅
 jua⁵⁴ a₂dséi₂ 'iog₂.
¹⁷ Ia₁ Guein₂ Já² Cha²
 i₂guá₅ dsi₂jo₂ ne₄ta₁ ně₅ bá⁴
 jmo₃ 'í₁
 ně₂jag₄ dsa₂ i₂jmo₅ 'í₁ já² cha² quián₅,
 jiog₃ jui₅ tu₁ jmig₂ ja₁'ia₂ jmig₂ jén³.
 Jaun₂ qui₃chí₃ Diú₄ jme₁ne₁₂
 ca₂le₃jé₃ jmig₂ a₂le₁'ág₄.

Mi₄cuing₅ jē₁ca₂tē₂ guio₃

8 ¹ Jme₁ca₂niá₃ guë² táng₃ Guein₂ Já² Cha² jē₁ca₂tē₂ guio₃
 mi₄cuing₅ quió⁵ mi₂si₂ a₂rē₂bin₅, jaun₂ ca₂tē₁tsi⁵⁴ tei₄ guei⁵⁴
 i₂juíg₃ con² ca₂jau₅₄ hora. ² Ján₃ bá⁴ ca₂jín₄ jniá₂ ta₁guion₃ ángeles
 i₂tióin₂ ne₄ Diú₄. 'Éi₂ guë² ně₃ ca₂ṇi₂ guio₃ ṇí₂ trompetas. ³ Cang₂ jaun₂
 ca₂já₃ táng₃ jan₂ ángel ca₂o₃náu₃ ne₄chei₂, chí₁chan² caun₂ ṇí₁ tó⁵
 chen₂, a₂lé₅ jmá³ cu₄nióg₄. Jaun₂ ca₂ṇi₂ 'lióng₂ chen₂, jaun₂ jén³
 co₂dsia₅ quian⁵⁴ jág₁ a₂chi₂lí² ca₂le₃jín₃ dsa₂ i₂tén₅ le₃quió⁵ Diú₄,^u dsia₃
 ne₄ ne₄chei₂ a₂lé₅ cu₄nióg₄ a₂chí⁵ 'uig⁵⁴ ne₄ta₁. ⁴ Jaun₂ ca₂jṇáu₂ jme₁ṇi₁
 chen₂ lia² jma₃quian⁵⁴ jág₁ a₂chi₂lí² dsa₂ quián₅ Diú₄, qui₂ca₂'uë₂ o₄gú₃
 ángel le₃ne₄ Diú₄. ⁵ Jaun₂ ca₂tín₂ ángel ṇí₁ a₂tó⁵ chen₂, jaun₂
 ca₂jme₃cain² mīg₂ si₂tá³ tio⁵⁴ ne₄chei₂, jaun₂ ca₂guia³ jaun₂ ně₃, ne₄
 gua⁵⁴ 'uë₃. Jaun₂ ca₂lē₃ gau₂ ca₂quia² ṇí³, ca₂tē₁tsi⁵⁴ co₂mí⁵⁴,
 qui₂ca₂'né³ si₁ṇí³, ca₂i₁bi₅₄ 'uë₃ ně₃.

ṇí₁ trompetas

⁶ Jaun₂ ně₃, le₃guion₃ ángeles i₂le₁chan² ṇí₁ trompetas, ca₂jmo₃
 co₂jṇia₅₄ a₂jéi₂ ṇí₁ quió⁵.
⁷ Jaun₂ ca₂jéi₂ jē₁le₂'uig⁵⁴ ángel ṇí₁ quió⁵, jaun₂ dsi₂jui₅ le₂jaun₂
 ca₂séi² mi₂dsí₅ quian⁵⁴ mīg₂ si₂tá³ a₂qui₂rē₂cón⁵ jmi₂, ca₂tang₂ ne₄

^u3 lit. “ca₂le₃jín₃ dsa₂ jṇi₁ó₅.”

gua' ₅₄ 'uë₃. Jaun₂ gué₄ ca₂cáu₂ ca₂qui' ₅₄ quió' ₅ 'ni₅ quió' ₅ gua' ₅₄ 'uë₃;
qui₂ca₂cáu₂ ca₂qui' ₅₄ quió' ₅ 'ni₅ quió' ₅ ni₁'ma₂ a₂cha₂ 'ŋa₁; qui₂ca₂cáu₂
gué₄ ca₂le₃jé₃ nau₂ rë' ₂.

⁸ Jaun₂ ca₂jéi₂ jë₁ca₂té₂ on₃ ángel ní₁ quió' ₅, jaun₂ ca₂jnia₃ ŋó₃ ca₂qui' ₃
a₂lé₅ lia' ₂ lé₅ má' ₂ ne₄ jmi₁ŋí' ₄, jniá₂ chi₁guí' ₂ si₂ ŋó₃. Jaun₂ ca₂lë₃ jmi₂
ca₂qui' ₅₄ quió' ₅ 'ni₅ quió' ₅ jmi₁ŋí' ₄. ⁹ Jaun₂ ca₂dsan₃ ca₂qui' ₅₄ quió' ₅ 'ni₅
jui₁lia' ₂ já' ₂ i₂chan₂ jmi₁ŋí' ₄, jaun₂ ca₂'en₃ ca₂qui' ₅₄ quió' ₅ 'ni₅ jui₁lia' ₂
ni₁barcos ján₃.

¹⁰ Jaun₂ ca₂jéi₂ jë₁ca₂té₂ ún₂ ángel ní₁ quió' ₅, jaun₂ ca₂tá' ₂ caun₂ nei₅
pa₁a chi₁guí' ₂ si₂ ca₂tá' ₂ guei' ₅₄ dsi₂güig₂, qui₂cau₂ lia' ₂ cau₂ ni₁qui₂;
ca₂tá' ₂ ne₄ ca₂qui' ₅₄ quió' ₅ 'ni₅ ca₂le₃jé₃ cuá₃, ne₄ ca₂le₃jé₃ o₄tu₁ jmig₂
né₃. ¹¹ Nei₅ jaun₂ chei₂ Nei₅^v Dsi' ₃. Jaun₂ ca₂lë₃ dsi' ₃ ca₂qui' ₅₄ quió' ₅ 'ni₅
jui₁lia' ₂ jmig₂ cha₂ gua' ₅₄ 'uë₃. Jaun₂ juin₅ lin₃ dsa₂ i₂ca₂dsan₃ ia₁ ca₂'in' ₃
jmig₂ dsi' ₃ jaun₂, 'uig₅₄ ia₁ a₂ca₂lë₃ dsi' ₃ jmig₂.

¹² Jaun₂ ca₂jéi₂ jë₁ca₂té₂ quén₂ ángel ní₁ quió' ₅, jaun₂ ca₂i₃ba₅₄
ca₂qui' ₅₄ quió' ₅ 'ni₅ quió' ₅ 'iog₂, ca₂qui' ₅₄ quió' ₅ 'ni₅ quió' ₅ tsi' ₂, ca₂qui' ₅₄
quió' ₅ 'ni₅ jui₁lia' ₂ nei₅ né₃, ia₁jaun₂ néi₃ ca₂qui' ₅₄ quió' ₅ 'ni₅ ca₂le₃jé₃
a₂jaun₂, ia₁jaun₂ tsá₃ ma₃jnia₃ ca₂qui' ₅₄ quió' ₅ 'ni₅ a₂jmi₂, ján₃ bá₄
le₂jaun₂ a₂'uë₂.

¹³ Jaun₂ ca₂jág₃ jniá₂ táng₃, ca₂jing₅₄ jan₂ i₁mi₂ i₂ŋi₅ 'en₅ dsi₂güig₂,
ca₂né' ₂ tiá₂ jág₁ quió' ₅, i₁juá' ₄:

—iJuíg₂! iJuíg₂! iJuíg₂ gué₄ lin₃ jui₁lia' ₂ i₂chan₂ ne₄ gua' ₅₄ 'uë₃, 'uig₅₄
ní₁ trompetas a₂në₃ gué₄ dsi₃'ein₅₄ a₂jéi₂ le₃ún₂ ángeles i₂'nió' ₅ gué₄ 'éi₂!

9 ¹ Jaun₂ ca₂jéi₂ jë₁ca₂té₂ 'ŋiá₂ ángel ní₁ quió' ₅, jaun₂ ca₂jín₄ jniá₂
jan₂ nei₅ i₂ca₂tán' ₂ guei' ₅₄ i₂juíg₃ ca₂të₂ gua' ₅₄ 'uë₃.^w Ca₂ŋii₂ ní₁
llave a₂ca₂tín₂ quió' ₅ ja₁ca₂jein₃ chi₁dsio₅₄. ² Dsi₂jui₅ jme₁ca₂niá₃ 'éi₂
ja₁jaun₂, jaun₂ ca₂'ia₂ jme₁ŋi₁ 'ŋei₂ jui₁lia' ₂ jme₁ŋi₁ a₂'uë₂ tau₂ si₂ pa₁ lin₃
ja₁jme₂jmág₂ dsa₂ ni₁ŋí₁. Jaun₂ co₂dsia₅ ca₂lë₃ qui₁né' ₃ 'iog₂, dsi₄
mi₂güig₃ né₃ quian' ₅₄ jme₁ŋi₁ a₂ca₂'ia₂ ja₁jaun₂. ³ Jë₄ jme₁ŋi₁ jaun₂
ca₂'uin₂ i₁ni' ₂ ca₂i₁nioi₁₂ tsi₁co₂jé' ₂ 'uë₃. I₁ni' ₂ 'éi₂, ca₂ŋii₂ bí₂ a₂lín₅
jui₁lia' ₂ lín₅ i₁'né₅ i₂chan₂ gua' ₅₄ 'uë₃. ⁴ Jaun₂ ca₂ŋii₂ 'éi' ₃ a₂tsá₃ dain₅₄
jmo₃ jui₁lia' ₂ 'au₂ a₂cha₂ gua' ₅₄ 'uë₃, on₃ gué' ₂ 'i₁caun₂ a₂rë' ₂ jui₁lia' ₂
mog' ₅₄ 'ma₂ a₂cha₂ né₃. Bí₂ jaun₂ bá₄ ca₂ŋii₂, a₂jmo₃ dain₅₄ jmá' ₃ lia' ₂
dsa₂ i₂tsá₃ léi₄ quió' ₅ Diú₄ le₁quian₅ chi₁quí₃. ⁵ La₁ tsá₃ 'éi' ₃ jaun₂ ca₂ŋii₂
jua' ₅₄ a₂co₂dsia₅ jme₃dsiain₂₃ dsa₂; a₂jñia' ₅₄ con' ₂ 'ë₃ jmi₁uig₅ ca₂lia' ₂
ca₂dsin₃ 'ŋiá₂ tsi' ₂. Uig₅ a₂cuë₂₃ jaun₂ lé₅ lia' ₂ lé₅ caun₂ uig₅ qui' ₂ jui₁lia' ₂
ja₁'í' ₅ i₁'né₅ quió' ₅ dsa₂. ⁶ Jmig₄ jaun₂ qui₃'no' ₂ dsa₂ 'mú₃, la₁ tsá₃ a₁jaun₂
dsio' ₂. 'ín₅ dsí₅ jua' ₅₄ dsiáin₃ bá₄ co₂ŋei' ₅₄, la₁ 'mú₃ né₃, cuing₃ ja₁coin₂.

^v10,11 Co₂'nió' ₄ le₃jua' ₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio' ₂ ja₁ton₅ Salmo
8:3; Romanos 1:25.

^w1 'Nio' ₂ ja₁ton₅ Isaías 14:12-15; Lucas 10:18; Apocalipsis 12:9.

⁷ I₁ni'₂ 'éi₂ né₃, jme₁lín₄ lia'₂ lín₅ dsi₂cua₁ i₂lé₅ co₂jñia₅₄ dsi₃léin₂ ne₄ 'nei₂. Mi₂dsi₅₄ guë'₂ né₃ jme₁le₁quian₅ a₂lé₅ lia'₂ lé₅ coronas a₂lé₅ cu₄nióg₄. Dsi₂ne₄ guë'₂ jme₁lé₄ lia'₂ lé₅ dsi₂ne₄ dsa₂ mi₂güí₃. ⁸ Jñi₂ dsi₅₄ guë'₂ né₃, jme₁lé₄ lia'₂ lé₅ jñi₂ dsi₄ dsa₂ mí₂. Mi₂jan₅₄ guë'₂ jme₁lé₄ lia'₂ lé₅ mi₂jan₄ 'ia'₂ león. ⁹ Guion₅₄ guë'₂ já'₂ qui₂rè₂lióin₃ rë₂, lé₅ 'í₁ quian'₅₄ a₂lé₅ lia'₂ lé₅ ni₁ñí₁. Mi₅₄ a₂tó'₅ tsi₁rë₂cu₅ jë₁ma₂'íin₂ né₃, jme₁lé₄ jui₁lia'₂ lé₅ mi₅₄ a₂tó'₅ 'lióng₂ ñí₁ carretas a₂ín₅ dsi₂cua₁ co₂'ei₅ ne₄ 'nei₂.

¹⁰ Ne₁con₅ a₂le₁dsi₅₄ guë'₂ né₃, jme₁lé₄ jui₁lia'₂ lé₅ ne₁con₅ i₁'né₅ le₁dsi₅₄ táun₂. Jui₅ nei'₅₄ con₅ jaun₂, 'io₅ bí₂ a₂le₃jmaí'₂ dain₅₄ dsa₂, con'₂ 'ñiá₂ tsi'₂. ¹¹ Ne₄ i₁ni'₂ 'éi₂ jme₁gon₂ jan₂ rag₅₄, i₂lín₅ ángel i₂niog₅ ne₄ ja₁ca₂jein₃ chi₁dsio₅₄. Jme₁chein₂ Abadón quian'₅₄ já₁ jmei₅ hebreo. Le₃quian'₅₄ já₁ jmei₅ griego guë'₂, chein₂ Apolión, co₂'nió'₄ i₂té'₂ I₂qui₂'én₂.

¹² Le₂'uig₅₄ jmi₁uig₅ ma₂ca₂ñag₅; la₁ 'ei₅ gué₄ con'₂ gué₄ tin₃, a₂në₅ gué₄ ñág₃ dsa₂.

¹³ Jaun₂ ca₂jéi₂ jë₁ca₂té₂ jñé₂ ángel ñí₁ quió'₅. Jaun₂ ca₂ñag₃ já₁ a₂'ia₂ jë₄ ta₁quén₂ gua₄ a₂le₁dsi₅₄ ne₄chei₂ a₂lé₅ cu₄nióg₄ a₂chí'₅ ne₄ Diú₄.

¹⁴ Ca₂juá'₂ ca₂tsí'₃ ángel i₂jë₁ca₂té₂ jñé₂ 'éi₂, i₂chan'₂ ñí₁ trompeta, ca₂juá'₂:

—'Uin'₅₄ le₃quén₂ ángeles i₂le₁'ñe'₅₄ cau₅ cuá₃ juë'₂ Eufates.

¹⁵ Jaun₂ qui₂ca₂'uin'₂ le₃quén₂ ángeles 'éi₂ i₂jme₁lé₄ 'í₁ o₄quió'₄ hora la₂, jmi₄ né₃, tsi'₂ la₂, ñi₂ la₂ né₃, i₂jme₁lé₄ co₂jñia₅₄ ia₁jaun₂ i₂jme₁dsiain₂₃ ca₂qui'₅₄ quió'₅ 'ni₅ jui₁lia'₂ dsa₂ mi₂güí₃. ¹⁶ Jmá'₃ lia'₂ 'lióg₂ i₂co₁dsin₅₄ cua₁, tén₅ tin₃ 'ñiá₂-lón₂ millón. Ca₂ñag₃ bá₄ jniá₂ 'a₂ con'₂ téin₅ lé₂.

¹⁷ Le₂në₅ bá₄ ca₂jág₃ a₂lë₁ca₂jág₃ jaun₂, qui₂ca₂jñg₅₄ cua₁ quian'₅₄ dsa₂ i₂co₁dsag₅₄ 'éi₂. Le₁lióg₃ le₁dsí₅ dsa₂ jma₃cáun₃ a₂lé₅ 'í₁ a₂jniá₂ guéin₂, a₂lian₂, quian'₅₄ guë'₂ a₂nióg₂ lia'₂ nióg₂ azufre. Mi₂dsi₄ dsi₂cua₁ guë'₂ né₃, jniá₂ lia'₂ jniá₂ mi₂dsi₄ 'ia'₂ león. Jui₅ mi₂'o₅₄ guë'₂ né₃ 'ia₂ si₂, 'ia₂ jme₁ñi₁, azufre né₃. ¹⁸ Jaun₂ ca₂dsan₃ ca₂qui'₅₄ quió'₅ 'ni₅ jui₁lia'₂ dsa₂ mi₂güí₃ quian'₅₄ 'ni₅ jmi₁uig₅ a₂qui₂ca₂'uë₂ mi₂'o₄ dsi₂cua₁ 'éi₂; a₂lé₅ si₂, jme₁ñi₁, quian'₅₄ azufre né₃. ¹⁹ Ia₁ bí₂ a₂jme₁le₁quian₅ dsi₂cua₁ jme₁'io₂₃ jui₅ mi₂'o₅₄ quian'₅₄ jui₅ ne₁con₅ né₃. Ia₁ jme₁lé₄ nei'₅₄ con₅ 'éi₂ lia'₂ lín₅ dsi₂mi'₂, a₂qui₂le₁dsi₅₄ mi₂dsi₅₄. Quian'₅₄ a₂jaun₂ jmo₂₃ dain₅₄.

²⁰ Dsa₂ i₂ca₂chón₂, i₂tsá₃ ca₂dsan₃ quian'₅₄ jmi₁uig₅ a₂qui₂ca₂lë₃ jaun₂, tsá₃ jua'₅₄ jaun₂ qui₂ca₂tí₂ 'e₂ jmo₅-dsáu₅ gu₂-tag₅₄, jua'₅₄ a₂tsá₃ ma₃chi₂léin'₂ je₂na'₅₄, on₃ guë'₂ qui₂ca₂tí₂ a₂tsá₃ ma₃jme₂juiin'₂ diú₄ lag₄ i₂lín₅ quian'₅₄ cu₄nióg₄ quian'₅₄ cu₄tio₂, quian'₅₄ ni₁ñí₁ nióg₂, quian'₅₄ ni₁cang₁, quian'₅₄ ni₁'ma₂ né₃; on₃ i₂lé₂ ñi₃, on₃ i₂lé₂ dsia₃ já₁, on₃ i₂lé₂ já₃, on₃ guë'₂ lé₂ nag₃ né₃. ²¹ On₃ guë'₂ qui₂ca₂tí₂ jua'₅₄ a₂tsá₃ ma₃jme₃dsiain₂₃ dsa₂ mi₂güí₃ riin'₅₄, on₃ guë'₂ qui₂ca₂tí₂ ta₁

a₂jme₁jmo₂₃ mí₅ a₂chan₂ dsí₅.^x On₃ guë'₂ qui₂ca₂tí₂ jua'₅₄ tsá₃ ma₃nió'₅
jág₁ a₂tsá₃ dsi₂ten₅₄ nió'₃, on₃ guë'₂ qui₂ca₂tí₂ jua'₅₄ a₂tsá₃ ma₃'ang₃ ně₃.

Mi₂si₂ pí'₁ rě₂bin₅

10 ¹ Jaun₂ ca₂jing₅₄ táng₃ jan₂ ángel sián'₂, i₂'uan'₂ lín₃, ca₂jniai₃
já₅ ca₂sióin₃ guei'₅₄ i₂juíg₃, rě₂lióin₃ jnei₅ rě₂lag₄ lí₁ lia'₂ jniá₂
mi₂jo'₅₄ si₂ mi₂dsi₅₄. Jme₁tág₅ dsi₂ne₅₄ lia'₂ tág₅ 'iog₂; mi₂tag₅₄ guë'₂ ně₃,
jme₁lě₄ lia'₂ lě₅ tag₄ dsi₅ ni₁'ia'₂, a₂tág₅ si₂. ² Jme₁chi₁chan'₂ caun₂ mi₂si₂
pí'₁ a₂rě₂bin₅, a₂rě₂na₄. Jaun₂ ca₂chi'₃ mi₂tag₅₄ ne₁ ne₄ jmi₁ńí'₄, tag₅₄ jen₅
guë'₂ ca₂chi'₃ ne₄ 'uě₃. ³ Jaun₂ ca₂guió'₃ tiá₂, lia'₂ jě₁'ńióg₁ 'ia'₂ león.
Jaun₂ dsi₂jui₅ jme₁ca₂guió'₃, ca₂quia'₂ ta₁guio₃ ńí'₃, qui₂ca₂'uě'₃ jág₁
quió'₅. ⁴ Jme₁ma₂ně₂dsia₃ jág₁ ta₁guio₃ ńí'₃, jaun₂ guě₄ jme₁ma₂taun₅₄
ne₄ si₂. La₁ ca₂né'₂ jág₁ a₂já₃ guei'₅₄ i₂juíg₃, ca₂juá'₂ tság₅ jniá₂:

—'Ma₄ jág₁ a₂ně₂juá'₂ guio₃ ńí'₃ ně₅, 'a₃ lě₁taun₂ de'₂ ne₄ si₂.

⁵ Jaun₂ ángel i₂ca₂jing₅₄, i₂chén'₅ chí'₅ caun₂ tag₅₄ ne₄ jmi₁ńí'₄ caun₂
guë'₂ tag₅₄ ne₄ 'uě₃, ca₂chóg'₃ gu₂ ne₁ jui₅ guei'₅₄ i₂juíg₃. ⁶ Jaun₂ ca₂juá'₂
ca₂'iin₃ i₂chan₂ co₂tan₅₄, i₂ca₂jmo₃ ca₂dsia₃ mi₂güíg₃, quian'₅₄ ca₂le₃jě₃
a₂tio'₅₄ ja₁jaun₂, i₂ca₂jmo₃ guei'₅₄ mi₂güíg₃ quian'₅₄ ca₂le₃jě₃ a₂tio'₅₄
ja₁jaun₂, i₂ca₂jmo₃ jmi₁ńí'₄, quian'₅₄ ca₂le₃jě₃ a₂tio'₅₄ ja₁jaun₂; ca₂juá'₂:

—Tsá₃ ma₂uě'₂ le₃'ag₄. ⁷ La₁ jě₁ma₂tě₂ jmi₄g₄ jě₁ma₂ca₂jéi'₂ ángel i₂ca₂tě₂
guion₃ 'éi₂ ńí₁ trompeta quió'₅, jmi₄g₄ jaun₂ dé₄ dsón'₂ le₃ti₃ jág₁
a₂rě₂'ma₄ quió'₅ Diú₄, a₂ca₂'ě₂ ne₄ dsa₂ i₂jme₁'ě₂ jág₁ quiáin₅, i₂ca₂jme₃ti₃
ta₁ ne₅₄.

⁸ Jaun₂ jág₁ a₂ca₂nag₃ a₂já₅ guei'₅₄ i₂juíg₃ jaun₂, ca₂juá'₂ táng₃ ca₂tság₃
jniá₂:

—Gua₂, o₂quian₂ mi₂si₂ pí'₁ a₂rě₂na₄ a₂chi₁chan'₂ ángel i₂chén'₅ ne₄
jmi₁ńí'₄, ne₄ gua'₅₄ 'uě₃.

⁹ Jaun₂ ńó₃ jniá₂ ja₁chén'₄ ángel, jaun₂ ca₂juíg₂ jniá₂ a₂cuě₃ mi₂si₂ pí'₁.
Jaun₂ ca₂juá'₂ 'éi₂ ca₂tság₃ jniá₂:

—Ján'₅, tio'₂ mi₂'o'₅₄ co₂dsia₅ jme₁dsia₂ qué'₂. A₂jma₂ rau₂ bá₄ ně₅, la₁
jě₁ma₂dsióg₃ tě₂'au'₂, le₃dsi'₃ bá₄.

¹⁰ Jaun₂ ca₂tíng₂ si₂ a₂ca₂cuě₃ ángel 'éi₂. Jaun₂ ca₂tó'₃ mi₂'o₃. Dsón'₂
bá₄ ráu₂ 'ńio₅ lín₃, lě₅ lia'₂ lě₅ jmi₁tá'₄. La₁ jme₁ma₂ně₂nág'₃ jniá₂ ně₃,
ca₂rě₃léi₄ 'e₂ bá₄ dsi'₃ ca₂dsióg₃ tě₂dsi₃. ¹¹ Jaun₂ ca₂juá'₂ ca₂tság₃ jniá₂:

—Tion₅₄ 'nió'₅ o₁'ě'₃ bá₄ táng₃ 'ne₂ jág₁ ne₄ ca₂le₃jín₃ ne₅₄ dsa₂, ne₄
'lóng₂ juig₂, ne₄ 'lóng₂ jág₁ jmei₅, ne₄ juín₅ rag₅₄ ně₃.

Le₃on₃ dsa₂ i₂jáng'₅ jág₁ dsau₅

11 ¹ Jaun₂ ca₂ńig₂ ca₂'nau₅₄ 'ma₂ta₅ a₂lě₅ lia'₂ lě₅ ni₁'ma₂ a₂quio₂
dsa₂ 'éi'₃. Jaun₂ ca₂nag₃ ca₂juá'₂:

^x21 griego: farmakeía.

—Nau₂, o₂quiog₂ 'éi'₃ quió'₅ guá'₅ quió'₅ Diú₄, o₂quiog₂ 'éi'₃ ne₄chei₂ né₃. O₁'én₁ dsa₂ i₂tón'₅ jme₂juin'₂ Diú₄ ja₁jaun₂. ² Tsá₃ cán'₁ 'éi'₃ i₁dsi₅ guá'₅ a₂lé₅ le₃ca₁'né₄, ia₁ a₂ma₂lé₅ quió'₅ dsi₂nau₂ bá₄ ja₁jaun₂; jaun₂ 'éi₂ bá₄ dsa₂ i₂qui₃tsó'₃ ta₁caun₂ juig₂ jñi₅ jaun₂ con'₂ ca₂dsin₃ të₂láu₃-tin₃ tsi'₂. ³ Tsin₅₄ bá₄ jniá₂ on₃ dsa₂ i₂jáng'₅ jág₁ dsau₅ o₄quió₃, a₂qui₃'é₂ jág₁ caun₂ mei₅ rē₂dsí₂ tin₃ 'ñiá₂-láu₂ rē₂dsí₂ 'nag'₂ ne₂guióg₂ (1260) jmi₄, le₁qui'₂ 'mi'₂ lia'₂ jui₁lia'₂ a₂quí'₅ dsa₂ ja₁ron₅ 'lag₄.

⁴ Co₂'nió'₄ dsa₂ on₃ i₂jáng'₅ jág₁ dsau₅, lé₅ co₂'nió'₄ tin₃ ni₁'ma₂ olivos, quian'₅₄ guē'₂ tin₃ tag₄ ja₁le₁guí'₂ si₂, a₂tióng₂ ne₄ Te₁gui'₅₄ i₂lín₅ juig₅₄ gua'₅₄ 'uē₃. ⁵ Nē₁jua'₂ 'ein₂ 'nio₃ jmóg'₂ dain₅₄, la₁ quian'₅₄ si₂ a₂'uē'₅ 'o₄ bá₄ 'éi₂ co₂dsia₅ dság'₂ dsín'₂ ca₂le₃jín₃ i₂'iog₅₄. Jaun₂ le₂nē₅ bá₄ ca₂tín₂ dsián₃ jui₁lia'₂ i₂'nio₃ jmá'₂ dain₅₄ 'éi₂. ⁶ I₂jáng'₅ jág₁ dsau₅ 'éi₂ né₃ 'io₃ bí₂ a₂lé₂ jnéi₂ guei'₅₄ mi₂güí₃ ia₁jaun₂ tsá₃ ma₃lé₂ téin₃ jmí₅ ca₂le₃jé₃ jmi₄ të₁lia'₂ të₂i₃nioi₅₄ qui₃'é₂ jág₁ o₄quió'₄ Diú₄. Jaun₂ 'io₃ bí₂ ján₃ a₂lé₂ le₃jmo₃ lé₂ jmi₂ jui₁lia'₂ jmi₂, a₂lé₂ qui₃cuē₃ ca₂le₃jé₃ ne₅₄ jmi₁uig₅ ne₄ gua'₅₄ 'uē₃ i₂gú'₃ ráun₂ 'a₂ con'₂ jñia'₅₄ 'nio₃. ⁷ La₁ jē₁ma₂dsan₃ ta₁ quió'₅ 'éi₂ né₃ a₂qui₃jáng'₃ jág₁ dsau₅, jaun₂ guē'₄ o₃'in₅ Já'₂ 'Lin'₅₄^y ja₁ca₂jein₃ chi₁dsio₅₄. 'Éi₂ guē'₄ cuē₃, jo₅₄, jme₃dsiog₂₃. ⁸ Jē₄ calle juig₂ dsen₅₄ jaun₂, le₁gain'₅₄ le₁'lín₁₂ lé₂, co₂'nió'₄ ja₁chei₂ quian'₅₄ jág₁ jáng'₅ léi₄, Sodoma quian'₅₄ Egipto, ján₃ bá₄ ja₁ca₂tion₃ dsa₂ cróg₄ Te₁gui'₅₄ quiáin₅.^z ⁹ Con'₂ 'ni₅ jmi₄ rē₂tón₂ con'₂ dsi₃ñí'₃, ca₂le₃jín₃ dsa₂ chan₂ le₂con₂ juig₂, ca₂le₃jín₃ ne₅₄ dsa₂, ca₂le₃jé₃ ne₅₄ jag₄ dsa₂, jág₃ jín₂ 'lag₄ 'éi₂. La₁ tsá₃ 'ein₂ ñe₂ jmi₄ jua'₅₄ a₂dsi₃'ó₃. ¹⁰ Ca₂le₃jín₃ dsa₂ i₂chan₂ guē'₄ gua'₅₄ 'uē₃, 'ñio₅ tóin'₃ jmo₃ 'io'₂ o₄quió'₄ 'éi₂, jmo₃ jmi₄ a₂cha₂ qui₂dsi₃can₅ cuē'₃ riin'₅₄. La₁ dsa₂ on₃ quián₅ Diú₄ i₂ca₂dsan₃ 'éi₂, 'ñio₅ lín₃ jme₁le₁quian₅ jmi₁uig₅ ja₁con₂ dsa₂ i₂chan₂ gua'₅₄ 'uē₃. ¹¹ La₁ jme₁ca₂dsin₃ 'ni₅ jmi₄ tón₂ con'₂ dsi₃ñí'₃ jaun₂, Diú₄ né₃ ca₂tó'₂ táng₃ jme₂dsí₂ quió'₅ dsa₂ 'éi₂, jaun₂ qui₂ca₂nau₂ táng₃. Jaun₂ ca₂i₃gó'₃ dsí₅ 'ñio₅ lín₃ dsa₂ i₂ca₂jág₂.

¹² Jaun₂ qui₂ca₂nág₂ jág₁ tiá₂ a₂já₅ jui₅ guei'₅₄ i₂juí₃ a₂ca₂juá'₂:

—I₂nó'₅ 'nia'₂ guei'₅₄ la₂.

Jaun₂ ca₂i₃lén₂ jui₅ guei'₅₄ i₂juí₃ rē₂lióin₃ jnei₅, të₃ jág₅ jaun₂ dsa₂ i₂jme₁'iog₅₄. ¹³ Hora jaun₂ dé₄ ca₂i₁bi₅₄ 'uē₃ tiá₂ lín₃. Jaun₂ qui₂ca₂gon₃ ca₂qui'₅₄ quió'₅ guia₃ juig₂ ciudad. Guio₃ mei₅ dsa₂ i₂ca₂dsan₃ jme₁ca₂jé'₂ 'uē₃. Dsa₂ i₂ca₂chón₃ guē'₄ né₃, qui₂ca₂can₃ jué'₅ dsí₅ 'ñio₅ lín₃.

Ca₂jme₂juin'₂ Diú₄ i₂guá₅ guei'₅₄ i₂juí₃.

¹⁴ Jaun₂ co₂nē₅ ca₂lē₃ jē₁ca₂té₂ tin₃ jmi₁uig₅ a₂ca₂i₃ñí₂ dsa₂ jaun₂. La₁ ñi'₅₄ ta₁ jiá₃ táng₃ jē₁ca₂té₂ 'ni₅.

^{y7} 'Í₂ Apocalipsis 13; 'Nio'₂ ja₁ton₅ Apocalipsis 20:2-3 ján₃.

^{z8} A₂lín₅₄ chog₅₄ si₂: "Te₁gui'₅₄ quián₂."

Jë₁ca₂té₂ guio₃ trompeta

¹⁵ Jaun₂ ca₂jéi₂ táng₃ jë₁ca₂té₂ guion₃ ángel ní₁ quió'₅, jaun₂
qui₂ca₂né'₂ jág₁ guei'₅₄ i₂juíg₃ qui₂i₁juá'₄ tiá₂ lín₃:

Ja₁gon₂ dsa₂ mi₂güí₃ ne₄ gua'₅₄ 'uë₃,
ma₂ca₂lë₃ ja₁gon₂ Te₁gui'₅₄ quián₂ jniog₄,
ja₂gon₂ dsa₂ I₂rë₂ 'ín₁ quiáin₅ né₃.

Jaun₂ 'éi₂ bá₄ i₂gon₃ ca₂lia'₂ co₂tan₅₄.

¹⁶ Jaun₂ ta₁guión₂-quén₂ i₂lín₅ dsa₂ can'₅₄ i₂tián'₅ ne₄ta₁ quió'₅ ne₄
Diú₄, qui₂ca₂tóin₂ tē₂ 'uë₃ rē₂ 'éin₂ co₂nei'₅₄, ca₂jme₃juin'₂ Diú₄,

¹⁷ qui₂ca₂juá'₂:

Cuë₂ jnia'₅₄ ti₁'mag'₄ 'ne₂,
Te₁gui'₅₄ Diú₄ i₂'Uan'₂ gué₄ lín₃,
'ne₂ bá₄ i₂lín₅, 'ne₂ i₂jme₁lín₄'^a
ia₁ ma₂ca₂jme₁'ñi₂ 'ne₂ bí₂ juë'₂ quiáng'₂,
ma₂ca₂jme₁lióg'₄ gong'₂.

¹⁸ Jme₁qui₂nau₂ 'nei₂ jui₂g₂ gua'₅₄ 'uë₃,
la₁ nē₃ gué₄ já₅ 'nei₂ a₂'i₄ 'au'₂,
ia₁ ma₂ca₂té₂ jmi₂g₄ a₂qui₁dsi'₂ 'éi'₃ ja₁con₂ 'lag₄.

Ton'₂ ca₂té₂ jmi₂g₄ ja₁qui'₅₄ 'lian'₅₄ dsa₂ quiáng'₂
i₂ca₂jme₃ti₃ ta₁ ne'₅₄
i₂qui₂ma₂'é₂ jág₁ quiáng'₂.

Le₂jaun₂ guë'₂ i₂jme₂go₃ 'a₂ lia'₂ lín'₅ 'ne₂
lia'₂ dsa₂ can'₅₄, lia'₂ dsa₂ me'₂.

Ján₃ guë'₂ ca₂té₂ jmi₂g₄ a₂'éng'₄
jui₁lia'₂ i₂qui₂'én₂ ne₄ gua'₅₄ 'uë₃.

¹⁹ Jaun₂ gué₄ ca₂niá₃ dsi₂néi₂ guá'₅ quió'₅ Diú₄ guei'₅₄ i₂juíg₃. Ca₂jnia₃
tsi₁gu₅ quió'₅ jág₁ a₂l'i'₅₄ quian'₅₄ Diú₄ dsi₂néi₂ guá'₅ quió'₅. Tē₃jē₄ jaun₂
qui₂ca₂lë₃ si₁ñí'₃, qui₂ca₂né'₂ jág₁, qui₂ca₂quia'₂ ñí'₃, qui₂ca₂i₁bi₅₄ 'uë₃,
qui₂ca₂séi'₂ dsí₅ ca'₅₄.

Jan₂ dsa₂ mí₂ quian'₅₄ cua₁ dragón

12 ¹ Jaun₂ ca₂jnia₃ guei'₅₄ i₂juíg₃ caun₂ léi₄ juë'₂ a₂dsi₃gó'₃ dsi₅:
jan₂ 'io₅₄ i₂rē₂lión₃ co₂tág₅ lia'₂ jniá₂ 'iog₂. Le₃né'₃ ja₁chéin'₄
ton₅ tsi'₂. Caun₂ guë'₂ corona 'i₄ dsi₅₄, le₁ton₅ guia₃-tín₂ nei₅. ² 'Io₅₄ 'éi₂
quiain₂₃ guein₂, a₂guió'₅ co₂mi'₅₄ a₂chain₂ uig₅ a₂le₃chan₂ guein₂. ³ Jaun₂
gué₄ ca₂jnia₃ léi₄ siá'₂ táng₃ guei'₅₄ i₂juíg₃: jan₂ cua₁ dragón^b guén₂
i₂pan₅₄ lín₃ i₂quian₅ guio₃ mi₂dsi₄ quian'₅₄ guia₃ mi₂juí₁. Jma₃cáun₃
corona tio'₅₄ lia'₂ ca₂míg₂ mi₂dsi₅₄. ⁴ Quian'₅₄ ne₁con₅ já'₂ 'éi₂ qui₂ca₂tsé'₃
ca₂qui'₅₄ quió'₅ 'ni₅ jui₁lia'₂ nei₅ i₂jme₁le₁'ín₄ guei'₅₄, jaun₂

^a17 A₂lin₅₄ chog₅₄ si₂ juá'₂ ján₃: “'ne₂ bá₄ i₂lén'₂ ján₃.”

^b3 griego: drakón (dsi₂mi'₂).

qui₂ca₂guiain'₃ ne₄ gua'₅₄ 'uë₃. Jaun₂ ca₂nau₂ cua₁ dragón ne₄ 'io₅₄
 i₂jë₁ca₂rë₃chán₃ guein₂, ia₁jaun₂ quiin'₂ guein₂ dsi₂jui₅
 jë₁ma₂ca₂rë₃chán₃.⁵ Ca₂rë₃chán₃ rë'₂ guein₂ quiáin₅, jan₂ guein₂ dsa₂
 ñe'₂ i₂'i₄ 'éi'₃ gon₃ ne₄ ca₂le₃jé₃ juig₂ quian'₅₄ 'ma₂'i'₅₄ a₂lé₅ ni₁ñí₁ 'ua'₂.^c
 Jaun₂ ca₂ñia'₃ bá₄ guein₂ 'éi₂ ca₂tág₃ Diú₄ i₃guá₃ ne₄ta₁ quió'₅.⁶ Jaun₂
 ca₂cuing₃ 'io₅₄ jui₅ 'uë₃ quein₂ co₂'ñiog₅ ja₁ma₂lé₅ co₂ñia₅₄ quió'₅ Diú₄,
 ia₁jaun₂ le₃tain₅₄ ca₂lia'₂ ca₂dsin₃ caun₂ mei₅ rë₂tón₂ tin₃ 'ñiá₂-láu₂
 rë₂dsí₂ 'nag'₂ ne₂guióg₂ (1260) jmig₄.

⁷ Jaun₂ ca₂lë₃ 'nei₂ guei'₅₄ i₂juíg₃: ca₂jmo₃ 'nei₂ Mi₂gue₅₄ quiain'₅₄
 ángeles quiáin₅, ca₂quíin'₂ ca₂cué'₃ cua₁ dragón. Ján₃ guë'₂ le₂jaun₂
 ca₂jéin'₃ dragón quiain'₅₄ ángeles quiáin₅.⁸ La₁ tsá₃ ca₂tió'₃, jaun₂ tsá₃
 ma₃ja₁ca₂rë₃chá₃ gué₄ ja₁cuin₅ jmig₄ tóin'₃ guei'₅₄ i₂juíg₃.⁹ Jaun₂
 ja₁jaun₂ ca₂ñia'₃ cau₅ dragón juin'₂ 'éi₂, dsi₂mi'₂ gui'₅₄ i₂jme₁chan₂
 ma₂líg'₂, i₂të'₂ i₂së₃dsen₃, i₂chen₂ Satanás né₃, i₂jme₂gan₅ dsa₂ ta₁caun₂
 mi₂güí₃. Ca₂i₃gain'₅₄ ca₂të₂ gua'₅₄ 'uë₃, lia'₂ jma₃quiain'₅₄ ángeles
 quiáin₅.^d

¹⁰ Jaun₂ ca₂né'₂ jág₁ tiá₂ guei'₅₄ i₂juíg₃, i₁juá'₄:

Në₃ gué₄ ca₂të₂ jmig₄ quió'₅ Diú₄ a₂lión₂ dsa₂,
 ca₂dsióg₃ jmig₄ ja₁lé₂ jui₅bí₂ 'éi'₃ quió'₅ Diú₄ quián₂
 a₂gon₂ 'éi₂ quiain'₅₄ I₂rë₂'ín₁ quiáin₅.

Ia₁ ca₂guiain'₃ 'uë₃ i₂jme₁bóg'₂ dso₄ quió'₅ rin'₅₄ jniog₄
 le₃ne₄ Diú₄ lia'₂ 'uë₂-jmi₂.

¹¹ Ca₂tió'₃ bá₄ 'éi₂

të₂le₃ quian'₅₄ jmi₂ 'an₅₄ Guein₂ Já'₂ Cha'₂,

të₂le₃ quian'₅₄ jág₁ dsau₅ né₃

a₂ma₂qui₂ma₂jáng'₃ 'éi₂;

ia₁ tsá₃ ca₂dsán₃ dsí₅ jme₂dsí₂ quió'₅

o₁ñia'₅₄ ca₂dsain₃.

¹² Jaun₂ lë₃, 'io'₂ jmo₄ 'nia'₂ i₂juíg₃,

quian'₅₄ guë'₂ 'nia'₂ i₂tián₅ ja₁jaun₂.

iLa₁ 'e₂ gué₄ juíg₂ jui₁lia'₂ i₂chan₂ gua'₅₄ 'uë₃,

quian'₅₄ guë'₂ i₂chan₂ né₃ jmi₁ñí₄!

Ia₁ ma₂sión₃ i₂së₃dsen₃ ja₁con'₂ 'nia'₂;

ma₂'i₄ 'nei₂ dsí₅, ia₁ ma₂ñi₅ rë₂ bá₄,

ca₂juíg₄ jmá'₅ jmig₄ cha₂ gué₄ quió'₅.

¹³ Jme₁ca₂rë₃lí'₄ dragón a₂ma₂ñó₅ jui₅ gua'₅₄ 'uë₃, jaun₂ 'éi₂ né₃

ca₂'ein₃ 'io₅₄ i₂ca₂rë₃chán₃ guein₂ dsa₂ ñe'₂ quián₅.¹⁴ La₁ 'io₅₄ 'éi₂ né₃,

ca₂ñi₂ tsi₁rë₂cu₅ ca₁ca'₅₄ a₂lé₅ lia'₂ lé₅ tsi₁rë₂cu₅ i₁mig₂, ia₁jaun₂ 'iin₃ jui₅

ja₁quió'₄, ja₁lé₄ 'uë₃ quein₂ co₂'ñiog₅, ja₁lé₄ 'í₁ 'ni₅ ñi₂ të₂ ca₂jau₅₄ le₃ne₄

dsi₂mi'₂.¹⁵ Jaun₂ ca₂'ué₃ dsi₂mi'₂ jmig₂ jui₅ mi₂'o₅₄, në₂jag₄ bá₄ caun₂

^c5 'Nio'₂ ja₁ton₅ Salmo 2:9.

^d9 'Nio'₂ ja₁ton₅ Isaías 14:12-15; Lucas 10:18; Apocalipsis 9:1.

cuá₃ juë'₂, ia₁jaun₂ dsi₃ñi₃ 'io₅₄ 'éi₂ quian'₅₄ jmig₂.¹⁶ La₁ ca₂jme₃'o₅₄
 gua'₅₄ 'uë₃, ca₂jme₃'oin₅₄ 'io₅₄, ca₂niá₃ 'uë₃ ca₂nág'₃ jmig₂ cuá₃ jaun₂
 a₂ca₂'uë'₃ dragón jui₅ mi₂'o₅₄.¹⁷ Jaun₂ ca₂rë₃'né₃ dragón le₃ja₁con₂ 'io₅₄,
 jaun₂ ñei₅₄ i₁quiin'₅₄ quiaín'₅₄ tsi₁jon₂ i₂ca₂chón₃ quián₅ 'io₅₄, co₂'nió'₄
 i₂jme₂ti₃ 'éi'₃ quió'₅ Diú₄ i₂le₁quian₅ jág₁ dsau₅ quió'₅ Jesús né₃.

¹⁸ Jaun₂ ca₂nau₂ 'éi₂ chei'₅₄ jmi₁ñí'₄.^e

Le₃on₃ Já'₂ 'Lin'₅₄

13¹ Jaun₂ ca₂jág₃ ca₂'ñio₂ ne₄ jmi₁ñí'₄ jan₂ já'₂ i₂jniá₂ gau₂ jmá'₅,
 i₂le₁dsi₅₄ guio₃ mi₂dsi₄, guia₃ guë'₂ mi₂juí₁. Ne₄ mi₂juí₁ né₃,
 jme₁le₁dsi₅₄ guia₃ coronas. Ne₄ mi₂dsi₅₄ né₃, jme₁le₁ton₅ jág₁ lia'₂ chein₂
 a₂jmo₂₃ a₂lín₅ Diú₄.² Jme₁lín₄ já'₂ i₂ca₂jing₅₄ 'éi₂ lia'₂ lín₅ dsi₂'ia'₂
 leopardo. Le₁dsi₅₄ mi₂tag₅₄ lia'₂ lé₅ gu₂-tag₄ oso. Mi₂'o₅₄ guë'₂ lé₅ lia'₂ lé₅
 mi₂'o₄ 'ia'₂ león. Ca₂cuë₃ dragón jui₅bí₂ ca₂cuë'₃ já'₂ 'éi₂ lia'₂
 jma₃quian'₅₄ ne₄ta₁ quió'₅ né₃, a₂qui₃dsi₂₃ 'éi'₃ a₂'uain'₂ lín₃.³ Ca₂míg₂
 mi₂dsi₄ Já'₂ 'Lin'₅₄ 'éi₂, lé₅ lia'₂ lé₅ a₂rë₂cuí'₃ 'ñio₅ lín₃, lé₅ nē₂jag₄ bá₄
 a₂chain₂ join₅₄. La₁ia₁ ca₂'láu₂ bá₄. Ta₁caun₂ mi₂güí₃ bá₄ ca₂i₃gó'₃ dsí₅
 dsa₂, ca₂'ein₃ Já'₂ 'Lin'₅₄ 'éi₂.⁴ Jaun₂ ca₂jme₃juag'₂ dsa₂ ca₂jme₃juiin'₂
 dragón, ia₁ ca₂cuë₃ 'éi'₃ ca₂cuë'₃ Já'₂ 'Lin'₅₄. Ca₂jme₃juiin'₂ Já'₂ 'Lin'₅₄
 né₃, qui₂ca₂juá'₂ ca₂tóin'₂:

—¿Ein₂ chan₂ i₂lín₅ lia'₂ lín₅ i₂nē₅? —'iin₂₃ Já'₂ 'Lin'₅₄ 'éi₂—. ¿Ein₂
 bá₄ tió'₅ jmo₃ 'nei₂ ja₁coin₂?

⁵ Ján₃ bá₄ ca₂ñii₂ jág₁ a₂le₃róin₂ a₂qui₃jmo₃ a₂lín₅ Diú₄; ca₂ñii₂ bí₂ né₃
 a₂qui₃dsi₂₃ 'éi'₃ con'₂ tē₂láu₃-tín₃ tsi'₂.⁶ Jaun₂ ca₂jáin₃ mi₂'o₅₄, ca₂ton₃
 'lig'₅₄ le₃quió'₅ Diú₄. Ca₂ton₃ rē'₂ 'lig'₅₄ ca₂'ë₃ ja₁guá₄ Diú₄; ca₂'iin₃ rē'₂
 ca₂lia'₂ i₂tion'₅₄ guei'₅₄ i₂juí₃ né₃.⁷ Ca₂ñii₂ bá₄ jmig₄ a₂jmo₃ 'nei₂ ja₁con₂
 dsa₂ i₂tén₅ le₃quió'₅ Diú₄,^f a₂jmo₃ né₃; ca₂ñii₂ bí₂ a₂qui₃dsi₂₃ 'éi'₃ ne₄ quió'₅
 ca₂le₃jé₃ tsi₁jon₂, ca₂le₃jé₃ go₄ dsa₂, ca₂le₃jé₃ jág₁ jmei₅, ca₂le₃jé₃ juig₂
 né₃.⁸ Jme₃juag'₂ ca₂le₃jín₃ dsa₂ i₂chan₂ gua'₅₄ 'uë₃ jme₃juiin'₂ Já'₂ 'Lin'₅₄
 'éi₂; ca₂le₃jín₃ i₂con'₂ tsá₃ le₁ton₅ ne₄ si₂ rē₂bin₅ a₂le₃chan₂ dsa₂, a₂ron₅
 quió'₅ Guein₂ Já'₂ Cha'₂, i₂jme₁ma₂'i₄ 'éi'₃ a₂jñag'₃ dsa₂, ca₂le₃ ca₂nio₃
 mi₂güí₃.

⁹ Nē₁jua'₂ 'ein₂ le₁dsi₅₄ rē₂gua₄, rē₂ jui₁nei₅₄.

¹⁰ Jui₁lia'₂ i₂jñia₅ dsa₂ jui₅ né'₃ má₃,

ján₃ bá₄ jui₅ né'₃ má₃ dsi₃léin₂;

jui₁lia'₂ dsa₂ i₂jme₂dsian₅ dsa₂ quian'₅₄ ñi₁tág₂,

quian'₅₄ ñi₁tág₂ dsiáin₃.^g

^e18 A₂lin₅₄ chog₅₄ si₂, 'nió'₄ a₂jme₁ton₅ versículo 18, juá'₂ le₂la₂: “Jaun₂ ca₂no₃ chei'₅₄
 jmi₁ñí'₄”, a₂chi₁ton₅ jē₁le₂'uig₅₄ Capítulo 13.

^f7 lit. “ja₁con₂ dsa₂ jñi₅.”

^g10 o₃, “Chi₂jua'₂ chan₂ i₂'i₄ 'éi'₃ jnéi₂ dsa₂, jui₅ né'₃ 'má₃ bá₄ dsó₃; chi₂jua'₂ chan₂ i₂'i₄ 'éi'₃
 jñag'₃ dsa₂ quian'₅₄ ñi₁tág₂, quian'₅₄ ñi₁tág₂ guë'₂ jñag'₃ dsa₂.”

'Uig₅₄ nē₅ nē₃, ca₂le₃jín₃ i₂tén₅ le₃quíó'₅ Diú₄, 'nió'₅ jmo₃ tió'₃ dsí₅, a₂tsá₃ qui₂dsi₃uín₂ a₂'éin₂.

¹¹ Cang₂ jaun₂ ca₂jín₄ táng₃ jniá₂ jan₂ já'₂ 'lín'₅₄ sián'₂, ca₂'ñioi₂ ne₄ gua'₅₄ 'uē₃. 'Éi₂ nē₃ jme₁le₁dsi₅₄ tin₃ mi₂juí₁ lia'₂ lé₅ mi₂juí₁ jan₂ guein₂ já'₂ cha'₂. La₁, lia'₂ lé₅ jág₁ quió'₅ dragón bá₄, jme₁lé₄ jág₁ quió'₅.

¹² Co₂jaun₂ bá₄ jme₁'io₂₃ bí₂ ján₃, jui₁lia'₂ Já'₂ 'Lín'₅₄ i₂le₂'uig₅₄, a₂qui₃dsi₂₃ 'éi'₃ o₄quíó'₄; chi₃quíóng₂ jmig₄ jme₃juag'₂ ta₁caun₂ mi₂güí₃ quian'₅₄ i₂chan₂ ja₁jaun₂, jme₃juin'₂ Já'₂ 'Lín'₅₄ i₂le₂'uig₅₄ i₂ca₂'lón₂ i₂jme₁rē₂cuín'₃ 'éi₂. ¹³ 'Lióng₂ léi₄ juē'₂ a₂o₂dsain₂ ca₂jmo₃ ján₃. Ca₂jmo₃ ca₂tá'₂ si₂ guei'₅₄ mi₂güí₃ nē₃, ca₂jmo₃ tē₃ne₄ dsa₂ mi₂güí₃. ¹⁴ Tē₂le₃ quian'₅₄ léi₄ juē'₂ a₂ca₂jmo₃ o₄quíó'₄ i₂'lín'₅₄ i₂le₂ne₁ 'éi₂, ca₂jme₃gain₂₃ dsa₂ i₂chan₂ gua'₅₄ 'uē₃. Ca₂jmo₃ 'éi'₃ a₂chi'₃ dsa₂ caun₂ nió'₄ quió'₅ Já'₂ 'Lín'₅₄ i₂jme₁rē₂cuín'₃ quian'₅₄ ñi₁tág₂ i₂ca₂'lón₂ 'éi₂. ¹⁵ Ca₂ñi₂ bí₂ a₂toin'₂ jme₂dsí₂ nió'₄ quió'₅ Já'₂ 'Lín'₅₄, ia₁jaun₂ juá'₂ jág₁, ia₁jaun₂ jme₃dsiain₂₃ ca₂le₃jín₃ i₂tsá₃ gue₃ jme₃juin'₂ nió'₄ quió'₅ 'éi₂. ¹⁶ Ca₂chi₃quiáin₂ jmig₄ lia'₂ dsa₂ can'₅₄ lia'₂ dsa₂ me'₂, lia'₂ dsa₂ i₂cha₂ cu₄ lia'₂ dsa₂ te₂ñé₂, lia'₂ dsa₂ i₂jme₂ti₃ ta₁ ne₄ juig₅₄ lia'₂ dsa₂ i₂tsá₃ 'ein₂ ne₄ jme₂ti₃ nē₃, a₂guein₃ léi₄ dso'₂ gu₂ ne₁, o₃ chi₁quí₃ 'e₂. ¹⁷ Jaun₂ tsá₃ ma₃lé₂ lá₃ 'i₁jan₂, on₃ guē'₂ ma₃lé₂ 'nag₃, jua'₅₄ tsá₃ lín₅ léi₄, o₃ tsá₃ le₁quian₅ jág₁ lia'₂ chen₂ Já'₂ 'Lín'₅₄, o₃ tsá₃ le₁quian₅ número quió'₅ lia'₂ chein₂. ¹⁸ Le₂la₂ bá₄ jág₁ a₂ñí'₂ dsí₅: jui₁lia'₂ dsa₂ i₂'i₄ jág₁, jui₁chein'₄ cuentas 'a₂ lia'₂ lé₅ número quió'₅ Já'₂ 'Lín'₅₄. Ia₁ número quió'₅ dsa₂ mi₂güí₃ bá₄ jaun₂. Le₂la₂ lé₅ número quió'₅: jñéi₂ 'ñiá₂-láu₂ rē₂dsí₂ 'nag'₂ ne₂guióg₂ rē₂dsí₂ jñéi₂ (666).

**Canto a₂ca₂'ē₃ caun₂ 'ñiá₂-lón₂ rē₂dsí₂
tē₂láu₃-quén₂ mei₅ (144,000) dsa₂**

14 ¹ Cang₂ jaun₂ ca₂jing₅₄ táng₃ Guein₂ Já'₂ Cha'₂ jniá₂ chéin'₅ ne₄ Má'₂ Sión, quiaín'₅₄ caun₂ 'ñiá₂-lón₂ rē₂dsí₂ tē₂láu₃-quén₂ mei₅ dsa₂ i₂jme₁le₁quian₅ léi₄, i₂le₁ton₅ chi₁quí₃ lia'₂ chen₂ Guein₂ Já'₂ Cha'₂ quian'₅₄ 'a₂ lia'₂ chen₂ Jmei₂ nē₃. ² Jaun₂ gué₄ ca₂nag₃ caun₂ mi'₅₄ a₂jás guei'₅₄ i₂juí₃, a₂lé₅ nē₂jag₄ bá₄ caun₂ la'₅₄ juē'₂ lín₃,^h ton'₂ nē₂jag₄ bá₄ ja₁dein₅ quia'₂ tiá₂ lín₃ ñí'₃. Mi'₅₄ a₂ca₂nag₃ jaun₂ ca₂né'₂ jui₁lia'₂ ja₁jmo₅ dsa₂ son₅₄ quian'₅₄ tsi₁ton₅ arpasⁱ quió'₅. ³ Qui₂i₁'ē₂₃ caun₂ canto 'mí₂ ne₄ ne₄ta₁, ne₄ le₃quén₂ já'₂, ne₄ gui'₅₄ can'₅₄ nē₃. Ca₂lia'₂ 'i₁jan₂ dsa₂ sián'₂ tsá₃ 'ein₂ lé₂ le₃tin₂ son₅₄ a₂'ē₅ dsa₂ jaun₂, jmá'₃ lia'₂ dsa₂ 'ñiá₂-lón₂ rē₂dsí₂ tē₂láu₃-quén₂ mei₅ i₂rē₂'lian'₅₄ ne₄ gua'₅₄ 'uē₃ 'éi₂ bá₄. ⁴ Ca₂le₃jín₃ dsa₂ 'éi₂ i₂tsá₃ ca₂rē₃'iog₅ jme₂dsí₂ quió'₅ quian'₅₄ 'io₅₄ 'lín'₅₄, ia₁ qui₂ma₂ca₂rē₃cháin₃ ja₂léin₂ le₁jín₃. Quiaín'₅₄ bá₄ Guein₂ Já'₂ Cha'₂ jui₁'a₂ gué₃ ja₁dsó₃ 'éi₂. Qui₂le₁'liain₅₄ tē₂le₃ jin₄ dsa₂ mi₂güí₃, co₂'nió'₄

^h2 o₃ "lia'₂ né'₂ 'lióng₂ jmig₂."

ⁱ2 griego: kithara.

i₂le₂'uig₅₄ i₂rē₂jen'₅₄ le₃ne₄ Diú₄, le₃ne₄ Guein₂ Já'₂ Cha'₂ ně₃.⁵ 'I₁caun₂
jág₁ tē₂jág₁ tsá₃ ca₂'uē₂ mī₂'o₄ 'éi₂; tsá₃ dso₄ qui₂rē₂cáin'₄.^j

Jág₁ quió'₅ le₃ún₂ ángeles

⁶ Jaun₂ ca₂jing₅₄ táng₃ jan₂ ángel sián'₂ a₂ñi₂₃ dsi₂jo₂ dsi₄ güig₂,
i₂quian'₅₄ jág₁ dse₃ a₂le₃chan₂ dsa₂ co₂tan₅₄, já₅ ja₂'ě₃ ja₂chi'₅₄ dsa₂
i₂tián'₅ ne₄ gua'₅₄ 'uē₃; ca₂le₃jě₃ juig₂, ca₂le₃jě₃ tsi₁jon₂ dsa₂, ca₂le₃jě₃ jág₁
jmei₅, ca₂le₃jě₃ go₄ dsa₂; ⁷ i₁juá'₄ tiá₂:

—Jme₁gan₃ 'nia'₂ Diú₄; jme₁juin'₂ 'nia'₂ 'éi₂. Ia₁ ma₂gua₅ hora
a₂qui₃dsi₂₃ 'éi'₃. Jme₁juin'₂ 'nia'₂ i₂ca₂jmo₃ guei'₅₄ mī₂güig₃ quian'₅₄
gua'₅₄ 'uē₃, jmi₁ñí'₄ ně₃, quian'₅₄ gué₄ ca₂le₃jě₃ o₄tu₁ jmi₂.

⁸ Chi₁quín₃ gué₄ jaun₂ ján₃, ca₂já₃ jan₂ ángel sián'₂ i₂ca₂juá'₂:

—Ma₂ca₂i₃'én₂, ma₂ca₂i₃'én₂ Babilonia juē'₂, 'uig₅₄ ia₁ a₂ca₂jmo₃
a₂qui₂ca₂'in'₃ ca₂le₃jě₃ juig₂ vino a₂ca₂jme₃cón₂ dsí₅ a₂qui₂nió'₃ jág₁
'lig'₅₄ quió'₅.

⁹ Jaun₂ ca₂guan₃ táng₃ jē₁ca₂tē₂ ún₂ ángel, ján₃ guē'₂ tiá₂ ca₂juá'₂:

—Chi₂jua'₂ 'ein₂ ca₂guen₃ jme₃juin'₂ Já'₂ 'Lin'₅₄, quian'₅₄ nió'₄ quió'₅,
o₃ ně₁jua'₂ ca₂guein₃ cán₂ léi₄ dso'₂ chi₁quí₃, o₃ co'₅₄ gú₃ 'e₂, ¹⁰ ján₃ bá₄
'ín'₂ 'éi₂ vino a₂'i₄ 'nei₂ dsí₅ Diú₄ a₂ma₂i₂tang₄ a₂tsá₃ 'e₂ qui₂rē₂cón'₅
'ñió'₃ copa a₂cha₂ 'uig₅₄ a₂le₃'nei₂; qui₃ñág₃ uig₅ quian'₅₄ si₂ quian'₅₄
azufre tē₃ne₄ ángeles jñió₅ quián₅ Diú₄ quian'₅₄ guē'₂ le₃ne₄ Guein₂ Já'₂
Cha'₂. ¹¹ Jme₁ñi₁ a₂tsáu₃ ja₁ñág₃ uig₅ ně₃, dsi₅₄ co₂tan₅₄ lé₂, on₃ guē'₂
'uē₂-jmi₂ bá₄ lé₂ jua'₅₄ a₂le₃jñia₃ a₂tsá₃ ñág₃ ca₂tiá₂ uig₅ ca₂le₃jín₃
i₂jme₃juin'₂ Já'₂ 'Lin'₅₄ 'éi₂ quian'₅₄ nió'₄ quió'₅, ca₂le₃jín₃ i₂ca₂guen₃
cán₂ léi₄ lia'₂ chein₂ ně₃.

¹² Ja₁nē₅ bá₄ 'nió'₅ jmo₃ juin'₂ dsí₅ dsa₂ i₂tén₅ le₃quió'₅ Diú₄,^k dsa₂
i₂tión₂ tiá₂ jme₂ti₃ 'éi'₃ quió'₅, a₂'éin₂ le₃quió'₅ Jesús ně₃.

¹³ Jaun₂ ca₂né'₂ táng₃ jág₁ a₂já₅ guei'₅₄ i₂juíg₃, ca₂juá'₂ tság₅ jniá₂:

—Jmo₄ si₂ tiong₅ ca₂le₃jě₃ a₂nē₅ a₂juá'₂: “'E₂ gué₄ 'ñio₅ dsen₃ dsa₂
i₂dsián₃ le₃ne₄ jui₅ la₂, i₂'én₂ le₃quió'₅ Te₁gui'₅₄.” Ján₅, juá'₂ Jme₂dsí₂,
ia₁jaun₂ jñia₃ ca₂le₃jě₃ ta₁ quió'₅, jaun₂ qui₃le₃quen₅ 'i₄ ta₁ ca₂le₃jě₃
a₂ca₂jmo₃.”

A₂ráu₃ ne₄ gua'₅₄ 'uē₃

¹⁴ Jaun₂ ca₂jág₃ táng₃ ca₂jñia₃ caun₂ jnei₅ tiog₂ jmá'₅. Ne₄ jnei₅ jaun₂,
guá₅ jan₂ i₂lín₅ lia'₂ lín₅ Jaun₅ dsa₂ mī₂güig₃.^l Chi₁'i₁ caun₂ corona a₂lé₅
jmá'₃ cu₄nióg₄ mī₂dsi₅₄, chi₁chan'₂ caun₂ ñí₁ hoz a₂'mu₃. ¹⁵ Jaun₂ o₂'ín₃
táng₃ jan₂ ángel dsi₂néi₂ guá'₅ templo, ca₂juá'₂ tiá₂ ca₂tsí'₃ i₂guá₅ ne₄
jnei₅:

^j5 A₂lin₅₄ chog₅₄ si₂ juá'₃ ján₃: “le₃ne₄ ne₄ta₁.”

^k12 lit. “dsa₂ jñió₅.”

^l14 'Nio'₂ ja₁ton₅ Daniel 7:13.

—Tiá₃ njí₁ hoz quiáng'₂, cag'₅₄; ia₁ ma₂gua₅ hora cag'₅₄, ia₁ ma₂ca₂ron₂ a₂ráu₃ ne₄ gua'₅₄ 'uë₃. ¹⁶ Jaun₂ ca₂tiá₂ hoz ne₄ gua'₅₄ 'uë₃, dsa₂ i₂guá₅ ne₄ jnei₅ 'éi₂, ca₂cág'₃ a₂ma₂ca₂rau₂ ja₁jaun₂.

¹⁷ Jaun₂ ca₂o₃'ín₃ táng₃ jan₂ ángel sián'₂ dsi₂néi₂ guá'₅ chí'₅ guei'₅₄ i₂juíg₃; ján₃ bá₄ chi₁chan'₂ caun₂ njí₁ hoz a₂'mu₃. ¹⁸ Jaun₂ ca₂o₃'ín₃ táng₃ ne₄chei₂ jan₂ ángel sián'₂ gué'₄ táng₃, i₂'io₅ bí₂ ne₄ si₂. Jaun₂ ca₂juá'₂ tiá₂ ca₂tsí'₃ i₂chan'₂ njí₁ hoz 'mu₃, ca₂juá'₂:

—Tiá₃ njí₁ 'mu₃ quiáng'₂; chi₁lo'₂ cag'₅₄ ni₁'mu'₂ a₂qui₂le'₁ág₄ ni₁uing₂ a₂cha₂ gua'₅₄ 'uë₃, ia₁ ma₂ca₂juig₂ míg₂ uvas quió'₅.

¹⁹ Jaun₂ ca₂tiá₂ 'éi₂ hoz quió'₅ ne₄ gua'₅₄ 'uë₃, ca₂cág'₃ míg₂ uvas quió'₅ gua'₅₄ 'uë₃. Ca₂tó'₂ caun₂ ja₁jué'₂ ja₁qui₂jlen'₃ dsa₂, co₂'nió'₄ le₃jua'₅₄, ja₁'i₄ 'nei₂ dsí₅ Diú₄. ²⁰ Jaun₂ ca₂rē₂tso'₄ a₂jaun₂ 'ni'₂ juig₂, ca₂'io₂ jmi₂. Jmi₂ jaun₂ nē₃ ca₂i₃'o₅₄ a₂jí'₂ con'₂ 'ei₅ rē₂'o₄ dsi₂cua₁, a₂jué'₂ ja₁ca₂'a₃ tí₅ con'₂ 'ni₅ 'ñiá₂-láu₂ (300) kilómetros.

Guion₃ ángeles i₂le₁quian₅ guio₃ jmi₁uig₅ jē₁ca₂tó'₂

15 ¹ Ca₂jág₃ jniá₂ guei'₅₄ i₂juíg₃ caun₂ léi₄ jué'₂ a₂dsi₂gó'₃ dsí₅: guion₃ ángeles i₂quian₅ guio₃ gué'₄ jmi₁uig₅ ja₁con₂ dsa₂. Co₂'nió'₄ a₂jaun₂ gué'₄ lé₅ jē₁ca₂tó'₂, ia₁ co₂jaun₂ ca₂'ñia₅ a₂'i₄ 'nei₂ dsí₅ Diú₄.

² Jaun₂ ca₂jág₃ jniá₂ jui₁lia'₂ caun₂ jmi₁ñí'₄ a₂lé₅ ni₁'i₂ a₂rē₂cón'₅ quian'₅₄ si₂. Ne₄ jmi₁ñí'₄ a₂lé₅ ni₁'i₂ jaun₂, jme₁tió₂ dsa₂ i₂ca₂tió'₃ ne₄ Já'₂ 'Lin'₅₄, ne₄ nió'₄ quió'₅, ne₄ número quió'₅ lia'₂ chein₂ nē₃. Qui₂le₁chan'₂ tsi₁ton₅ arpas^m a₂ca₂cuē₃ Diú₄. ³ Tióin₂ 'ē₂₃ canto quió'₅ Moisésⁿ dsa₂ i₂ca₂jme₂ti₃ quián₅ Diú₄, quian'₅₄ canto quió'₅ Guein₂ Já'₂ Cha'₂, a₂juá'₂:

'E₂ gué'₄ jué'₂ a₂jlá'₁ lin₃ ca₂le₃jé₃ a₂ma₂jmo'₅₄ 'ne₂,

Te₁gui'₅₄ Diú₄ i₂'Uan'₂ gué'₄ lin₃.

A₂dsau₅, a₂tí₅ lin₃ bá₄ jui₅ quiáng'₂,

'Ne₂ Rag₅₄ quián₅ ca₂le₃jé₃ juig₂.

⁴ ¿'Ein₂ bá₄ 'éi₂ i₂tsá₃ jme₃gon₃ 'ne₂, Te₁gui'₅₄?

¿'Ein₂ bá₄ i₂tsá₃ jme₃juag'₂ gué'₂ ján₃?

Ia₁ jan'₂ 'ne₂ bá₄ líng'₅ i₂jñi₅.

Ca₂le₃jé₃ juig₂ qui₂ja₃léin₂ qui₂jme₃juin'₂ 'ne₂,

ia₁ ma₂ca₂rē₃jniá₂ 'éi'₃ a₂qui₂dsí'₂ 'ne₂.

⁵ Cang₂ jaun₂ ca₂jág₃ jniá₂ guei'₅₄ i₂juíg₃, ca₂niá₃ guá'₅, co₂'nió'₄ le₃jua'₅₄ ja₁jñi₅ gué'₄, ja₁rē₂'ma₄ jág₁ dsau₅ a₂lí'₅₄ quian'₅₄ Diú₄. ⁶ Guá'₅ jaun₂, ca₂'uin₂ guion₃ ángeles i₂le₁quian₅ le₃guio₃ jmi₁uig₅. Le₁qui'₂ 'mi'₂ lino jlá'₁, a₂tág₅ lin₃. A₂jme₁rē₂jén'₅ le₁dsí₅ gué'₂ nē₃, jme₁lé₄ jmá'₃ cu₄nió₄. ⁷ Jaun₂ gué'₄ jan₂ já'₂ quén₂ i₂tió₂ ne₄ ne₄ta₁, ca₂cué'₃ le₂jan₂

^m2 griego: kithara.

ⁿ3 canto quió'₅ Moisés: 'Nio'₂ ja₁ton₅ Éxodo 15; Deuteronomio 32.

le₂jan₂ ta₁guion₃ ángeles jma₃cáun₃ ni₁uĩng₅ ji'₂ a₂lé₅ cu₄nióg₄, le₁'a₁
co₂'nió'₄ a₂'nei₂ a₂'i₄ dsí₅ Diú₄ i₂chan₂ ca₂lia'₂ co₂tan₅₄.⁸ Jaun₂ ca₂can'₂
dsi₂néi₂ guá'₅ quian'₅₄ jme₁ñi₁ a₂já₅ ja₁con₂ a₂jlá'₁ a₂'uan'₂ Diú₄. Ca₂lia'₂
'i₁jan₂ tsá₃ lé₂ dsi₃ton'₅₄ ja₁jaun₂, ca₂lia'₂ ca₂rē₃'ñia₅ le₃guio₃ jmi₁uig₅
a₂le₁quian₅ ta₁guion₃ ángeles.

Ta₁guio₃ jmi₁uig₅ a₂'é₂ Diú₄

16 ¹ Jaun₂ ca₂nag₃ jniá₂ jág₁ tiá₂ lín₃ i₁juá'₄ dsi₂néi₂ guá'₅, a₂tsí'₅
le₃guion₃ ángeles 'éi₂:

—O₂nó'₅ 'nia'₂ o₂jen₄ ne₄ gua'₅₄ 'uē₃ 'nei₂ a₂'i₄ dsí₅ Diú₄ a₂le₁'a₁
ni₁uĩng₅ nē₅.

² Jaun₂ ca₂o₃'ín₃ jē₁le₂'uig₅₄ ángel, jaun₂ ca₂jein₃ a₂chi₁'a₄ ni₁uĩng₅
quíó'₅ ne₄ gua'₅₄ 'uē₃. Jaun₂ ca₂le₃jín₃ dsa₂ i₂le₁quian₅ léi₄ quíó'₅ Já'₂
'Lín'₅₄, i₂jme₂juin'₂ nió'₄ quíó'₄ né₃, qui₂ca₂'ñiai₂ 'mé'₅ 'lig'₅₄ a₂qui'₂ gué₄
lín₃.

³ Jaun₂ ca₂jen₃ jē₁ca₂tē₂ on₃ ángel a₂'a₄ ni₁uĩng₅ quíó'₅ ne₄ jmi₁ñí'₄.
Jaun₂ ca₂lē₃ jmi₂, nē₂jag₄ bá₄ jmi₂ 'an₅₄ jan₂ 'lag₄. Ca₂dsan₃ ca₂le₃jín₃ já'₂
i₂jme₁chan₂ jmi₁ñí'₄ jaun₂.

⁴ Ján₃ bá₄ le₂jaun₂ ca₂jen₃ jē₁ca₂tē₂ ún₂ ángel a₂'a₄ ni₁uĩng₅ quíó'₅, ne₄
jmi₂guá₃, ne₄ o₄tu₁ jmi₂guá₃ né₃; jaun₂ jmá'₃ jmi₂ bá₄ qui₂ca₂lē₃ ján₃.

⁵ Jaun₂ ca₂nag₃ juá'₂ ángel i₂nio₅ gu₂ jmi₂guá₃, ca₂juá'₂:

Rē₂ bá₄ cáun'₂ 'ne₂ 'í₁, Diú₄ Jñi₂ó₅;

'ne₂ i₂lín₅, i₂jme₁lín₄,^o

ia₁ a₂nē₂qui₁dsi'₂ 'éi'₃ le₂nē₅.

⁶ Ia₁ ca₂tein₃ 'éi₂ jmi₂ a₂jme₁'an₅₄

dsa₂ i₂jme₁tén₄ le₃quíáng'₂,

dsa₂ i₂jme₁qui₂ca₂'é₂ jág₁ quíáng'₂ né₃.

Nē₃ gué₄ né₃, nē₂'ein'₅₄ jmi₂,

ia₁ le₂nē₅ 'en₄ quíó'₅ bá₄.

⁷ Ca₂nag₃ jniá₂ ján₃ jē₄ ne₄chei₂, i₁juá'₄:

Dsón'₂ le₂nē₅, Te₁gui'₅₄ Diú₄ i₂'Uan'₂ gué₄ lín₃,

dsón'₂ bá₄ qui₂dsí'₁ 'ne₂ 'éi'₃ lia'₂ con'₂ dsi₂ten₅₄.

⁸ Jaun₂ ca₂jen₃ jē₁ca₂tē₂ quén₂ ángel a₂'a₄ ni₁uĩng₅ quíó'₅ ne₄ 'iog₂,
jaun₂ ca₂ñi₂ 'iog₂ bí₂ a₂dsín'₂ dsa₂ mi₂güí₃ quian'₅₄ si₂.⁹ Jaun₂ ca₂dsin'₂
ca₂le₃jín₃ dsa₂ quian'₅₄ a₂dséi₂ gau₂ lín₃. Jaun₂ qui₂ca₂'ag₃ dsa₂ 'lig'₅₄
qui₂ca₂'iin₃ Diú₄ i₂'io₅ bí₂ ne₄ jmi₁uig₅ jaun₂. Tsá₃ ca₂jme₃tsín₃ dsí₅,
jua'₅₄ ca₂jme₃juin'₂ 'éi₂.

¹⁰ Jaun₂ ca₂jen₃ jē₁ca₂tē₂ 'ñiá₂ ángel a₂'a₄ ni₁uĩng₅ quíó'₅ ne₄ ta₁
quíó'₅ Já'₂ 'Lín'₅₄, jaun₂ ca₂tē₁tsí'₅₄ qui₁né'₃ ja₁goin₂ jaun₂. Dsa₂ né₃
qui₂ca₂quig'₂ le₁tsí'₂ a₂ca₂jme₃uí'₃.¹¹ Con'₂ siá'₂ ca₂'iin₃ 'lig'₅₄ Diú₄

^o5 A₂lín₅₄ chog₅₄ si₂ chi₁ton₅ ján₃: “i₂lén₂ co₂tan₅₄.”

i₂quió'₅ guei'₅₄ i₂juíg₃, ne₄ 'uig₅₄ a₂le₁quian₂₃ jmi₁uig₅, 'uig₅₄ ia₁ a₂lín₅ 'mé'₅ né₃. La₁ tsá₃ ca₂dsi₃quéin'₅ dsí₅ jua'₅₄ ca₂tí₂ a₂jmo₂₃-dsáu₅.

¹² Jaun₂ ca₂jen₃ jë₁ca₂té₂ jné₂ ángel a₂'a₄ ni₁uing₅ quió'₅ ne₄ cuá₃ juë'₂ Eufra₂tes. Jaun₂ co₂dsia₅ ca₂rë₃quéin₃ cuá₃ jaun₂, ia₁jaun₂ ma₂lé₅ co₂jia₅₄ caun₂ jui₅ quein₂ ja₁i₃nio₄ rag₅₄ i₂ja₃lén₂ të₂le₃ ja₁'ia₂^p 'iog₂.

¹³ Jaun₂ ca₂jág₃ ca₂'uin₂ ún₂ jme₂dsí₂ 'lín'₅₄, i₂jniá₂ lia'₂ jniá₂ i₁jé'₅, ca₂'uün₂ jma₃ján₃ jui₅ mi₂'o₄ já'₂ dragón, mi₂'o₄ Já'₂ 'Lín'₅₄, quian'₅₄ mi₂'o₄ i₂té'₂ dsa₂ i₂'é₂ jág₁ a₂jui₁gain₂ né₃. ¹⁴ Jme₂dsí₂ i₂lín₅ je₂na'₅₄ bá₄ 'éi₂, i₂qui₃jmo₃ léi₄ juë'₂, i₂qui₂dsi₃lén₂ uíng₂ ja₁con₂ rag₅₄ quián₅ dsa₂ i₂chan₂ ta₁caun₂ mi₂güí₃, ia₁jaun₂ chi₃lo'₃ a₂dsia₃ 'nei₂ jmi₂g₄ juë'₂ jaun₂ quió'₅ Diú₄ i₂'Uan'₂ gué₄ lín₃.

¹⁵ “Rë₂ján'₁ 'nia'₂ ia₁ guió'n'₄ jniá₂ con'₂ tiá₂, në₂jag₄ bá₄ jan₂ 'ang₂. 'E₂ gué₄ dsen₃ jui₁lia'₂ i₂rë₂jnio₄ ne₄, i₂lé₅ 'í₁ tsin'₅₄, con'₂ tsá₃ nõ₅ në₁jua'₂ i₃jñi₅₄ rë₂jñi₅ të₃ jág₅ dsa₂ o₂quí'₃ quió'₅.”

¹⁶ Jaun₂ qui₂ca₂liain'₃ rag₅₄ caun₂ ja₁chei₂ Armagedón quian'₅₄ jág₁ jmei₅ hebreo.

¹⁷ Jaun₂ ca₂jen₃ jë₁ca₂té₂ guion₃ ángel a₂'a₄ ni₁uing₅ quió'₅, ca₂'éin₂ dsi₂güig₂. Jaun₂ ca₂né'₂ dsi₂néi₂ guá'₅ a₂chí'₅ guei'₅₄ i₂juíg₃, jág₁ a₂juá'₂ tiá₂, a₂já₅ ne₄ta₁, i₁juá'₄:

—iMa₂ca₂lë₃ bá₄!^q

¹⁸ Jaun₂ qui₂ca₂lë₃ si₁ñí'₃, ca₂të₁tsí'₅₄ co₂mi'₅₄, ca₂quia'₂ ñí'₃. Ta₁caun₂ gua'₅₄ 'uë₃ qui₂ca₂jé'₂ ca₂i₁bi₅₄ 'uë₃ tiá₂ lín₃, ca₂lia'₂ 'i₁cón'₂ tsá₃ le₂jaun₂ jua'₅₄ a₂ma₂i₁bi₅₄ 'uë₃ ca₂le₃ ca₂rë₃chán₃ dsa₂ ne₄ gua'₅₄ 'uë₃, ia₁ a₂ñí₄ lë₃ gau₂ ca₂lë₃. ¹⁹ Ca₂lë₃ 'ni₅ dso'₅₄ ciudad dsen₅₄ jaun₂, jaun₂ qui₂ca₂i₃lé₂ jui₅ 'uë₃ ca₂le₃jé₃ juig₂ ciudad jme₁te₁'i₁ mi₂güí₃. Jaun₂ gué₄ ca₂dsáu'₃ dsí₅ Diú₄ Babilonia juë'₂; ca₂cué'₃ copa a₂'a₄ vino a₂'i₄ 'nei₂ dséi₂ dsí₅.

²⁰ Jaun₂ qui₂ca₂cuíng₃ ca₂le₃jé₃ 'uë₃ a₂qui₂le₁quí'₅ jë₄ jmi₁ñí'₄; ca₂le₃jé₃ ni₁má'₂ né₃, co₂dsia₅ ca₂i₃có'₂. ²¹ Qui₂ca₂tang₂ ne₄ quió'₅ dsa₂ mi₂güí₃ dsí₅ ca₁ca'₅₄ 'ñio₅ lín₃, a₂guei₂ jma₃të₂láu₃ kilo lia'₂ ca₂míg₂.^r Ján₃ bá₄ le₂jaun₂ qui₂ca₂'ag₃ dsa₂ 'lig'₅₄ 'iin₂₃ Diú₄, 'uig₅₄ ia₁ a₂ca₂séi'₂ dsí₅ jaun₂, ia₁ a₂ñí₄ lë₃ ca₂i₁juín₅₄ gau₂ jmi₁uig₅ a₂ca₂lë₃.

Jë₁ca₂i₃'én₂ 'io₅₄ juín'₂ i₂'nag₅ quió'₅

17 ¹ Jaun₂ ca₂já₃ jan₂ ángel i₂lé₂ guion₃ i₂jme₁le₁chan'₂ ni₁uing₅ 'éi₂, ca₂tság₃ jniá₂:

—Ñia₅, la₂ 'ë₅₄ 'a₂ lia'₂ lé₅ jmi₁uig₅ a₂'é₂ Diú₄ ne₄ 'io₅₄ juín'₂ i₂'nag₅ quió'₅, i₂guá₅ ne₄ ja₁te₁'i₁ 'lóng₂ jmi₂g₂. ² Ca₂le₃jín₃ bá₄ rag₅₄ i₂chan₂ ne₄ gua'₅₄ 'uë₃ ma₂qui₂ca₂nió'₄ jág₁ quian'₅₄ 'io₅₄ 'éi₂; ján₃ bá₄ le₂jaun₂

^p12 Co₂'nió'₄ le₃jua'₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio'₂ ja₁ton₅ Salmo 8:3; Romanos 1:25.

^q17 'Nio'₂ ja₁ton₅ Juan 19:30.

^r21 lit. “a₂guei₂ caun₂ talento lia'₂ ca₂míg₂.”

ma₂qui₂ca₂rë₃'en₅ dsa₂ i₂tián'₅ ne₄ gua'₅₄ 'uë₃, quian'₅₄ vino a₂co₂'nió'₄
dso₄ a₂ca₂jmo₃-dsáu₅ 'io₅₄ 'éi₂.

³ Jaun₂ ca₂jio₃ ángel, të₁lia'₂ 'eng₅₄ le₃quió'₅ Jme₂dsí₂, caun₂ 'uë₃
quein₂ co₂'ñiog₅. Ja₁jaun₂ ca₂të₂ ne₃ ca₂jing₅₄ jan₂ 'io₅₄, co₂dsiin₅₄ jan₂
já'₂ guén₂ i₂jniá₂ gau₂ jmá'₅, i₂le₁dsi₅₄ guio₃ mi₂dsi₄, guia₃ guë'₂ mi₂juí₁,
i₂jme₁quian₅ 'lióng₂ jág₁ 'lig'₅₄ lia'₂ chein₂ a₂jmo₂₃ a₂lín₅ Diú₄ nē₃. ⁴ 'Io₅₄
'éi₂ nē₃ rē₂lín₅₄ qui'₂ tsin'₅₄ guén₂ si₂, quian'₅₄ a₂'ui'₃. A₂lě₅ jlá'₁, tio'₅₄
cu₄nióg₄, ni₁cang₁ jlá'₁ quian'₅₄ mīg₂ perlas nē₃. Ján₃ gué₄ chi₁chan'₂
caun₂ copa a₂lě₅ jmá'₃ cu₄nióg₄, rē₂'a₄ a₂'lig'₅₄ a₂jmo₅-dsáu₅, quian'₅₄
jág₁ 'lig'₅₄ a₂nió'₅. ⁵ Le₁ton₅ jág₁ ne₄ chi₁quí₃, a₂juá'₂: JÁ₁ A₂RĒ₂'MA₄
BABILONIA JUIN'₂ CHOG₅₄ 'IO₅₄ I₂'NAG₅ QUIÓ'₅ CHOG₅₄ CA₂LE₃JĒ₃
NE₅₄ A₂LĪ₁'IOG₅ NE₄ GUA'₅₄ 'UĒ₃.

⁶ Jaun₂ ca₂jín₄ jniá₂ 'io₅₄, a₂'ein₅ guá₅, quian'₅₄ jmi₂ 'an₅₄ i₂tén₅
le₃quió'₅ Diú₄, ^s quian'₅₄ guë'₂ jmi₂ 'an₅₄ i₂ma₂jáng'₃ jág₁ dsau₅ le₃quió'₅
Jesús. Jaun₂ ca₂i₃gó'₃ dsi₃ gué₄ lín₃ jme₁ca₂të₂ ne₃ a₂jaun₂. ⁷ Jaun₂
ca₂juá'₂ ángel tság₅ jniá₂:

—¿E₂ lē₃ dsi₂gó'₃ 'au'₂? La₂ juá'₄ jniá₂ jág₁ rē₂'ma₄, co₂'nió'₄ 'e₂ léi₄
jáng'₅ 'io₅₄ ó₃, 'e₂ guë'₂ léi₄ jáng'₅ táng₃ Já'₂ 'Lín'₅₄ i₂jio₃ i₂cha₂ guio₃
mi₂dsi₄, i₂le₁dsi₅₄ guio₃ mi₂juí₁ nē₃. ⁸ Já'₂ 'Lín'₅₄ i₂nē₂jing'₅₄ nē₅,
jme₁chan₂ le₂jniá₅, rē₂nē₃ nē₃ tsá₃ ma₃chain₂. La₁ jē₁ma₂o₃'iin₅ uíg₂
ja₁ca₂jein₃ chi₁dsio₅₄, jaun₂ dsióg₄ ja₁dsi₃'éin₂. Dsi₃gó'₃ dsí₅ dsa₂ i₂chan₂
ne₄ gua'₅₄ 'uë₃, ca₂le₃jín₃ i₂con'₂ tsá₃ le₁ton₅ ne₄ si₂ ca₂le₃ ca₂nio₃
mi₂güí₃, mi₂si₂ a₂rē₂bín₅ a₂le₃chan₂ dsa₂; dsi₂qui₂dsi₃gó'₃ dsí₅
jē₁ma₂jín₂ Já'₂ 'Lín'₅₄, 'uig₅₄ ia₁ a₂jme₁chain₂, tsá₃ ma₃chain₂ rē₂nē₃,
la₁ia₁ a₂guáin₂ táng₃.

⁹ 'Jág₁ la₂ cha₂ a₂lě₂ le₃ñí'₂ jui₁lia'₂ dsa₂ i₂ñí'₂ dsí₅: jáng'₅ jág₁ dsau₅
guio₃ mi₂dsi₄ já'₂, co₂'nió'₄ guio₃ dsi₂con'₂ ja₁guá'₄ 'io₅₄ 'éi₂. ¹⁰ Ján₃ bá₄
co₂'nió'₄ guion₃ rag₅₄ a₂jaun₂. Ma₂i₃gan'₅₄ cau₅ 'ñiá₂ rag₅₄ 'éi₂; jan₂ bá₄
i₂gon₂ rē₂nē₃; jan₂ guë'₂ i₂tsá₃ ma₂guan₅ gué₄. Jē₁ma₂tē₂ rē₁guá₃ 'éi₂
guë'₂ nē₃, ca₂tiá₂ bá₄ ca₂tíin₂ guá₃. ¹¹ Já'₂ 'Lín'₅₄ i₂jme₁chan₂, i₂tsá₃ chan₂
rē₂nē₃ 'éi₂ guë'₂ nē₃, lén₂ i₂gon₂ i₂ca₂tē₂ jñia₃ i₂co₂'nió'₄ rin'₅₄ i₂guion₃
'éi₂ bá₄. Ján₃ bá₄ dsióg₄ ja₁dsi₃'éin₂.

¹² 'A₂lě₅ guia₃ mi₂juí₁ a₂nē₂jag'₅₄ nē₃, co₂'nió'₄ guian₃ rag₅₄ i₂tsá₃
ma₂ñi₂ ja₁le₃goin₂. La₁ nei₃ bí₂ 'éi'₃ ca₂tiá₂ le₂jaun₂, nē₂jag₄ caun₂ hora,
lia'₂ ma₂quian'₅₄ Já'₂ 'Lín'₅₄. ¹³ Tóin'₃ caun₂ ta₁ co₂dsia₅, 'ei₅ caun₂ jág₁,
ton'₂ qui₃cuë₃ jui₅bí₂ quian'₅₄ 'éi'₃ quió'₅ cué'₃ Já'₂ 'Lín'₅₄. ¹⁴ Qui₃jmo₃
'nei₂ quín'₂ quian'₅₄ Guein₂ Já'₂ Cha'₂. La₁ Guein₂ Já'₂ Cha'₂ bá₄ i₂lí'₂,
ia₁ 'éi₂ bá₄ lín₅ Juig₅₄ quián₅ ca₂le₃jín₃ juig₅₄ dsa₂; ton'₂ lín₅ Rag₅₄
quián₅ ca₂le₃jín₃ rag₅₄. Ca₂le₃jín₃ i₂quian'₅₄ Guein₂ Já'₂ Cha'₂ nē₃, lín₅
i₂ma₂quióin'₂ i₂ma₂tē₂ Diú₄, tióin₂ lín₅ dsa₂ i₂rē₂ti'₅₄ quiáin₅.

¹⁵ Jaun₂ ca₂tság₃ jniá₂:

^s6 lit. “quian'₅₄ jmi₂ 'an₅₄ dsa₂ jñi₅.”

—Jui₁lia'₂ a₂lě₅ 'lióng₂ jmi₂g₂ ja₁guá'₄ 'io₅₄ 'lin'₅₄ a₂ně₂jag'₅₄ ně₅,
 co₂'nió'₄ ca₂le₃jě₃ go₄ dsa₂, ca₂le₃jě₃ nió'₃ dsa₂, ca₂le₃jě₃ jui₂g₂, ca₂le₃jě₃
 jág₁ jmei₅ ně₃. ¹⁶ Jaun₂ jme₃'iog₅₄ dsa₂ i₂co₂'nió'₄ a₂lě₅ guia₃ mi₂juí'₁
 i₂ně₂jag'₅₄, jme₃'iog₅₄ Já'₂ 'Lin'₅₄ guē'₂ ně₃, jme₃'ŋiai₅₄ 'io₅₄ 'éi'₂. Co₂dsia₅
 qui₃téi₂ co₂'nió'₄ tē₃tsiin'₅₄ rē₃ŋí₅; qui₃quí₃'₃ ni₁ŋi₁₂, jaun₂ guē'₄ dság'₂
 quian'₅₄ si₂. ¹⁷ Ia₁ Diú₄ ně₃ ma₂jmo₃ dsí₅ dsa₂ 'éi'₂ jui₁jmo₁₂ ca₂le₃jě₃ 'e₂
 niog₅ dsí₅ jmo₃, ia₁jaun₂ jmo₃ caun₂ jág₁ a₂cuē₃ jui₅bí₂ a₂goin₂, cuē'₃ Já'₂
 'Lin'₅₄, ca₂lia'₂ ca₂dsióg₃ jmi₂g₄ a₂le₃ti₃ jág₁ quió'₅ Diú₄ a₂ma₂ron₅. ¹⁸ 'Io₅₄
 i₂ně₂jing'₅₄ ně₃, co₂'nió'₄ ciudad juē'₂ ja₁o₂'ag₅ 'éi'₃ ne₄ quió'₅ ca₂le₃jín₃
 rag₅₄ i₂chan₂ mi₂güí₃.

Jē₁ca₂ŋó₃ 'uē₃ bí₂ quió'₅ Babilonia

18 ¹ Cang₂ jaun₂, ca₂jing₅₄ táng₃ jan₂ ángel sián'₂, ca₂sióin₃ guei'₅₄
 i₂juíg₃ i₂'io₅ bí₂ 'éi'₃ a₂'uain'₂ lín₃. Ta₁caun₂ mi₂güí₃ bá₄
 ca₂tág'₃ a₂co₂tág₅ co₂'né₅ quió'₅. ² Quian'₅₄ jág₁ tiá₂ lín₃, ca₂juá'₂:
 Ma₂ca₂i₃'én₂, ma₂ca₂i₃'én₂ Babilonia juē'₂,
 'ne₄ ca₂le₃jín₃ ne₅₄ je₂na'₅₄ bá₄ ca₂lě₃;
 'né₅ 'má₃ ja₁ŋi'₂ ca₂le₃jín₃ ne₅₄ jme₂dsí₂ 'lin'₅₄,
 ca₂le₃jín₃ ne₅₄ i₁tan₅ 'lin'₅₄ lē₁'ŋio₅.
³ Ia₁ ma₂qui₂ma₂'in'₃ ca₂le₃jě₃ jui₂g₂
 vino a₂ca₂jme₃cón₂ dsí₅ a₂qui₂nió'₃ jág₁ 'lig'₅₄ quió'₅.
 Ma₂qui₂ca₂nió'₃ jág₁ rag₅₄ i₂chan₂ gua'₅₄ 'uē₃
 quiaín'₅₄ 'io₅₄ 'éi'₂.
 Ca₂le₃jín₃ jui₁lia'₂ dsa₂ i₂i₂nió₄ jmo₂₃ 'ma'₅₄,
 ma₂qui₂ca₂rē₃chá₃ cu₄ 'ŋio₅ lín₃
 tē₂le₃ quian'₅₄ jui₅bí₂ a₂ma₂i₁juín₅₄ ŋag₅₄
 a₂jlá'₁ jmo₂₃ róin₂.
⁴ Jaun₂ ca₂nag₃ táng₃ caun₂ jág₁ a₂já₅ guei'₅₄ i₂juíg₃, a₂juá'₂:
 'Uin'₂ 'nia'₂ jē₄ jui₂g₂ ně₅,
 con'₂ 'nia'₂ i₂lín₅ dsa₂ jui₂g₂ quiáng₃,
 ia₁jaun₂ tsá₃ le₃quen'₄ 'nia'₂ dso₄ a₂'no₅ 'io₅₄ ně₅,
 on₃ guē'₂ tīn'₃ 'nia'₂ jmi₁uig₅ a₂já₅ ja₁coin₂.
⁵ Ia₁ 'lióng₂ lín₃ dsáu₁ 'io₅₄ ně₅ ma₂rē₂juí'₄,
 ně₂jag₄ bá₄ ma₂tē₂ ca₂tē₂ guei'₅₄ i₂juíg₃.
 Jaun₂ Diú₄ ně₃ ma₂dsáu'₅ dsí₅
 ca₂le₃jě₃ a₂'lig'₅₄ a₂ma₂rē₂cáin'₄.
⁶ A₂le₂jaun₂ cuē'₅₄ 'nia'₂ 'io₅₄ ně₅
 jui₁lia'₂ lē₅ a₂ma₂qui₂ma₂cuē'₃ dsa₂ 'ŋiog₅.
 Qui'₄ 'nia'₂ tīn₃ ju'₂
 lia'₂ con'₂ guē'₄ a₂ma₂jmo₃.
 Co₂güin'₅₄ 'nia'₂ tīn₃ ráun₂ a₂'ŋio₅ guē'₄
 ŋió'₂ copa quió'₅ 'ŋiog₅,
 con'₂ guē'₄ a₂ma₂cuē'₃ i₂sián'₂.

- ⁷ Jui₁lia'₂ a₂ŋí₄ lë₃ ma₂qui₂ma₂chain₂ jlá'₁ a₂róin₂,
 co₂jaun₂ cuë'₅₄ 'nia'₂ jmi₁uig₅ a₂qui'₂ dsí₅.
 Ia₁ ma₂juá'₂ bá₄ jui₅ tē₂dsí₅:
 “La₂ gua₅₄ a₂lín₅ jan₂ 'io₅₄ rag₅₄,
 tsá₃ dsa₂ 'nág₂ lín₅.
 Tsá₃ o₁líg'₂ ŋag₅₄ uig₅ le₃qui'₂ dsi₃.”
- ⁸ 'Uig₅₄ jaun₂ né₃,
 co₂nio₄ co₂jmig₄ bá₄ ja₃lé₂ jmi₁uig₅ ja₁coin₂;
 'mú₃, qui'₃-o₃, le₃oin₅₄ né₃;
 jaun₂ gué₄ dsiin'₂ co₂nei'₅₄.
 Ia₁ i₂'uan'₂ lín₃ bá₄ Te₁gui'₅₄ Diú₄
 i₂qui₃dsi₅ 'éi'₃ ja₁coin₂ jmig₄ jaun₂.
- ⁹ 'Cán₂ go₂'i₃, qui'₃-o₃ ca₂le₃jín₃ rag₅₄ quián₅ gua'₅₄ 'uë₃ i₂qui₂ca₂nió'₄
 jág₁ quiaín₅₄ 'io₅₄ 'éi₂, i₂qui₂ma₂ca₂rë₃cháin₃ jlá'₁ quiaín₅₄,
 jë₁ma₂ca₂jág₃ tsau₂ jme₁ŋi₁ guei'₅₄ a₂ma₂qui₂cau₂ quió'₅ 'io₅₄. ¹⁰ La₁ uíng₂
 bá₄ qui₂dsi₃náu₃, qui₃jág₃ gó'₃ 'ŋio₅ lín₃, jaun₂ juá'₂:
 'E₂ gué₄ juíg'₂, 'e₂ gué₄ juíg'₂,
 'ne₂ ciudad juë'₂,
 'ne₂ Babilonia i₂jme₁'uang'₂ lín₃ né₃!
 iQuian'₅₄ ca₂tiá₂ co₂lág₂ bá₄
 gua₅ uig₅ a₂rë₂'é₂ ja₁cong'₂!
- ¹¹ 'Cán₂ go₂'i₃, qui'₃-o₃ dsa₂ i₂jme₁i₂nio₄ jmo₅ 'ma'₅₄ ne₄ gua'₅₄ 'uë₃,
 o₄quió'₄ 'éi₂; ia₁ tsá₃ ma₂'ein₂ le₃chan₂ qui₃lá₃ gué₄ 'e₂ lio₅₄ i₂quian₅₄:
¹² lio₅₄ a₂lé₅ cu₄nióg₄, cu₄tio₂, cang₄ jlá'₁, míg₂ perlas, ca₂le₃jé₃ ne₅₄
 jui₁lia'₂ 'mi'₂ jlá'₁, jui₁lia'₂ lino quian'₅₄ seda a₂'lióng₂ ne₅₄ jniá₂, a₂'ui'₃,
 a₂guéin₂ né₃; ca₂le₃jé₃ ne₅₄ 'ma₂ jlá'₁ né₃ a₂ja₂ mi₂jui₂g₂ ma₂ro₂; líóng₂
 ne₅₄ cosas jlá'₁ né₃, jui₁lia'₂ a₂lé₅ ni₁mu₅, a₂lé₅ ni₁'ma₂ jlá'₁ a₂'mu'₅₄, a₂lé₅
 ni₁ŋí₁ 'ua'₂, a₂lé₅ ni₁ŋí₁ nióg₂ né₃, ni₁cang₁ mármol táng₃; ¹³ lio₅₄ canela,
 ca₂le₃jé₃ gué₄ a₂ja₂ mi₂jui₂g₂ ma₂ro₂ jui₁lia'₂ chen₂, mirra, no'₅₄ mi₂jui₂g₂
 né₃; vino quian'₅₄ no'₅₄ olivo; cuig₂ dse₃ quian'₅₄ trigo; já'₂ né₃, jui₁lia'₂
 ca₁jui₅, já'₂ cha'₂ quian'₅₄ cua₁; ni₁ŋí₁ carrozas né₃. Ca₂le₂jio₅ dsa₂
 mi₂güí₃ rin'₅₄ dsa₂ i₂jme₂ti₃ ta₁ ne₅₄. ¹⁴ 'La₁ jmig₄ jaun₂ gué₄ né₃, juá'₂
 tsí'₃ ciudad jaun₂:
 iMa₂ca₂ŋia'₃ ja₁cong'₂, míg₂ jlá'₁
 a₂ŋí₄ lë₃ jme₁'ín₅ 'au'₂ quë'₅₄!
 iA₂co₂dsia₅ ca₂i₃'én₂ jaun₂ bá₄
 ca₂le₃jé₃ a₂jlá'₁
 a₂jme₁quen₅ cu₄ a₂jme₁cha₂ quiáng'₂!
 Tsá₃ ma₃o₁líg'₂ jmig₄ dsiang'₂.
- ¹⁵ 'Dsa₂ i₂qui₂ma₂jmo₃ 'ma'₅₄ ca₂le₃jé₃ a₂në₅, i₂qui₂ca₂rë₃chá₃ cu₄ 'ŋio₅
 lín₃ tē₂le₃ quian'₅₄ 'io₅₄ 'éi₂, qui₂dsi₃náu₃ uíng₂, qui₃jág₃ gó'₃ 'uig₅₄
 jmi₁uig₅ a₂go₂'i₃ jaun₂. ¹⁶ Jaun₂ juá'₂ tiá₂:
 'E₂ gué₄ juíg'₂, 'e₂ gué₄ juíg'₂,

'ne₂ ciudad juë'₂!
 iIa₁ jme₁lě₄ jui₁lia'₂ lín₅ jan₂ 'io₅₄ jlán'₁
 i₂jme₁qui'₂ tsin'₅₄ jlá'₁ lin₃
 a₂jme₁jniá₂ 'ui'₃ quian'₅₄ a₂guéin₂,
 i₂jme₁rě₂lin₄ jlán'₁ quian'₅₄ cu₄nióg₄,
 ni₁cang₁ jlá'₁, mīg₂ perlas né₃!
 17 iQuian'₅₄ ca₂tiá₂ co₂lág₂ bá₄,
 qui₂ca₂dsa₃ ca₂ag₂ a₂jlá'₁ a₂quen₅ 'lióng₂ lin₃!
 'Ca₂le₃jín₃ jui₁lia'₂ i₂i₂quian₅ ni₁barcos, ca₂le₃jín₃ gué₄ dsa₂ i₂i₂nio₄ ne₄
 jmi₁ŋí'₄, ca₂le₃jín₃ gué₄ dsa₂ i₂'no₅ a₂dsi₂ŋí'₂ ne₄ jmi₁ŋí'₄, qui₂dsi₃náu₃
 uíng₂, 18 jě₁ma₂ca₂jág₃ jme₁ŋi₁ a₂ma₂qui₂cau₂ quió'₅, qui₃juá'₂ tiá₂ tóin'₃:
 —¿'E₂ bá₄ ciudad lé₂ le₃quin₃ quian'₅₄ ciudad juë'₂ nē₅?
 19 Jaun₂ qui₂tó'₃ ti₁jui₁ ne₄ mi₂dsi₅₄ guioin₅₄, qui'₂-o₂₃, a₂juá'₂ tiá₂:
 i'E₂ gué₄ juíg₂, 'e₂ gué₄ juíg₂
 ciudad juë'₂ nē₅!
 Quian'₅₄ ca₂le₃jě₃ a₂jme₁cha₂ quió'₅,
 ca₂rě₃chá₃ cu₄ ca₂le₃jín₃ dsa₂
 i₂qui₂le₁'io₅ barcos ne₄ jmi₁ŋí'₄.
 iQuian'₅₄ ca₂tiá₂ co₂lág₂ bá₄ ca₂'en₃ jě₂!
 20 La₁ 'nia'₂ né₃,
 i₂chan'₂ guei'₅₄ i₂juíg₃,
 jmo₄ 'nia'₂ 'io'₂ ne₄ quió'₅ juig₂ jaun₂.
 Ca₂le₃jín'₃ guë'₂ 'nia'₂ i₂tén₅ le₃quió'₅ Diú₄,
 i₂chen₄ quiáin₅, i₂qui₂'ě₂ jág₁ quió'₅ né₃.
 Ia₁ ma₂ně₂qui₃dsi₅ Diú₄ 'éi'₃ ja₁con₂ juig₂ jaun₂,
 ma₂ně₂jme₃rě₃ ca₂le₃jě₃ a₂ma₂jmái'₂ 'nia'₂ jaun₂.
 21 Jaun₂ ca₂chóg'₃ jan₂ ángel 'uan'₂ ca₂míg₂ ni₁cang₁ pa₁, a₂lě₅ jui₁lia'₂
 lě₅ ni₁cang₁ éi'₅ cuig₂ 'í₅; ca₂ton₃ ne₄ jmi₁ŋí'₄, ca₂juá'₂:
 Quian'₅₄ 'nei₂ uig₅ le₂ně₅ bá₄
 dsó₃ 'uě₃ ján₃,
 Babilonia ciudad juë'₂,
 tsá₃ ma₃a₁jaun₂ jua'₅₄ le₃cha₂.
 22 O₁líg'₂ jmig₄ tsá₃ ma₃qui₂né'₂ a₂jmo₃ dsa₂ son₅₄
 jui₁lia'₂ jě₄ calle quiáng'₂:
 jui₁lia'₂ son₅₄ tsi₁ton₅ arpas,^t
 son₅₄ 'ma₂, son₅₄ ŋí₁ trompeta né₃.
 Tsá₃ ma₃le₃chan₂ tē₅
 i₂tín₂ ta₁ 'i₁jan₂, ja₁cong'₂;
 tsá₃ ma₃qui₃né'₂ mī'₅₄
 ni₁cang₁ éi'₅ cuig₂ 'í₅, ja₁cong'₂;
 23 si₂ nng'₂;

^t22 griego: kithara.

jág₁ quió'₅ 'io₅₄,
 quió'₅ dsa₂ ñe'₂ i₂jen'₂ gu₂,
 tsá₃ ma₃o₁líg'₂ qui₃né'₂ ja₁cong'₂.
 Ia₁ dsa₂ dsen₅₄ jin₄ dsa₂ mi₂güí₃
 jme₁lín₄ dsa₂ i₂qui₂jme₁jmo₅ 'ma'₅₄ quiáng'₂,
 ia₁ ca₂jme₁gang'₂ ca₂le₃jé₃ juig₂
 të₂le₃ quian'₅₄ a₂chan₂ 'au'₂.
²⁴ Ia₁ 'éi₂ bá₄ rë₂cán'₄ jmi₂ 'an₅₄
 ca₂le₃jín₃ dsa₂ i₂tén₅ le₃quió'₅ Diú₄,
 i₂ma₂'é₂ jág₁ quió'₅ né₃,
 quian'₅₄ ca₂le₃jín₃ i₂ca₂dsan₃
 ca₂jme₃dsiog₅ dsa₂, ne₄ gua'₅₄ 'uë₃.

19 ¹ Cang₂ jaun₂, ca₂nag₃ lia'₂ lé₅ jág₁ quió'₅ juin₅ lin₃ dsa₂
 i₂tion'₅₄ guei'₅₄ i₂juí₃, i₁juá'₄ co₂mi'₅₄:
 ¡Aleluya!

Te₁gui'₅₄ Diú₄ quián₂ bá₄ jniog₄ i₂lió₂,
 i₂ca₂tín₂ gue₃ a₂jme₃juag'₂ dsa₂,
 i₂ca₂tín₂ jui₅bí₂ a₂náu₃ ne₄ 'éi'₃.
² Ia₁ dsau₅, ton'₂ dsi₂ten₅₄ bá₄ lé₅
 a₂qui₂dsi₂₃ 'éi'₃.

Ia₁ ma₂në₂qui₂dsi₂₃ 'éi'₃
 ja₁con₂ 'io₅₄ 'lin'₅₄ juin'₂,
 i₂ma₂ca₂jme₃'ió₃ ta₁caun₂ mi₂güí₃
 quian'₅₄ jág₁ 'lig'₅₄ a₂ma₂qui₂ma₂nió'₃.
 Jaun₂ 'ñiog₅ bá₄ Diú₄ ma₂në₂quion₃ 'ma'₅₄
 ja₁con₂ 'io₅₄ 'éi₂,
 ne₄ quió'₅ jmi₂ 'an₅₄ ca₂le₃jín₃ dsa₂ quián₅ Diú₄
 i₂jme₂ti₃ ta₁ ne₅₄.

³ Con'₂ siá'₂ táng₃ ca₂juá'₂:
 ¡Aleluya!

Tsau₂ jme₁ñi₁ a₂con₂ 'io₅₄ 'éi₂
 ca₂lia'₂ co₂tan₅₄.

⁴ Jaun₂ né₃, le₃guión₂-quén₂ dsa₂ can'₅₄, quian'₅₄ guë'₂ le₃quén₂ já'₂
 i₂tión₂ le₃ne₄ ne₄ta₁, qui₂ca₂tóin₂ 'uë₃ ca₂jme₃juin'₂ Diú₄ i₂guá₅ ne₄ta₁,
 qui₂ca₂juá'₂:

—iA₂méi₃! ¡Aleluya!

⁵ Jaun₂ gué₄ ca₂né'₂ jág₁ të₂ ne₄ta₁, i₁juá'₄:
 Jme₁juin'₂ 'nia'₂ Diú₄ quián₂
 ca₂le₃jín'₃ 'nia'₂ i₂jme₂ti₃ ne₅₄
 ca₂le₃jín'₃ 'nia'₂ i₂juin'₂ i₂me'₂
 i₂go₃ gain₃ 'éi₂.

Jmíg₄ ja₁jen'₂ gu₂ Guein₂ Já'₂ Cha'₂

⁶ Jaun₂ ca₂nag₃ jniá₂ co₂mi'₅₄ a₂né'₂ lia'₂ né'₂ jág₁ ja₁i₁tion'₅₄ dsa₂
juin₅, lia'₂ né'₂ ja₁ta'₂ la'₅₄ pa₁ lín₃,^u jui₁lia'₂ të₂tsi'₅₄ co₂mi'₅₄ quia'₂ ñí'₃
tiá₂ lín₃, i₁juá'₄:

iAleluya!

Ia₁ ma₂gon₂ Te₁gui'₅₄ Diú₄ quián₂ jniog₄

i₂'Uan'₂ gué'₄ lín₃.

⁷ iJui₁jmó₁ jniog₄ 'io'₂

o₂'ñió₃ o₂jñia₃ dsi₅,

jui₁jme₁juin'₂ jniog₄ 'éi'₂!

Ia₁ ca₂té₂ hora a₂jen'₂ gu₂

Guein₂ Já'₂ Cha'₂.

Dsa₂ mí₂ i₂jen'₂ gu₂ quiaín'₅₄ né₃

ma₂chain₂ co₂jñiaí₅₄.

⁸ Ma₂ñii₂ tsi₁'mi'₂ lino jlá'₁

a₂tág₅, a₂le₁jé₃ lín₃, a₂rë₂liin₅₄.

(Ia₁ jui₁lia'₂ tsi₁'mi'₂ lino jlá'₁ né₃, co₂'nió'₄ jui₅ dsau₅ a₂ma₂quian₅ dsa₂
i₂tén₅ le₃quió'₅ Diú₄.)^v

⁹ Jaun₂ ca₂juá'₂ ángel ca₂tság₃ jniá₂:

—Jmo₄ si₂ tiong₅: “E₂ gué'₄ dsen₃ ca₂le₃jín₃ dsa₂ i₂té₄ jmíg₄ ja₁jen'₂ gu₂
Guein₂ Já'₂ Cha'₂.”

Jaun₂ ca₂juá'₂ táng₃:

—Jág₁ tí₅ të₃dsón'₂ bá₄ la₂ quió'₅ Diú₄.

¹⁰ Jaun₂ ca₂tón₂ jniá₂ ja₁tióng₂ tag₄ ángel 'éi'₂ a₂jme₁jme₁juin'₂ jniá₂.
La₁ ca₂juá'₂ né₃:

—A₃ jmo₂ le₂në₅. Ia₁ jan₂ rín'₂ 'ne₂ bá₄ líng₅, i₂jme₂ti₃ ta₁ ne₄ Diú₄,
ton'₂ líng₅ jan₂ rin'₅₄ rín'₂ 'ne₂ i₂qui₂'é₂ jág₁ o₄quió'₄ Diú₄, quian'₅₄ i₂tón'₂
jui₅ jág₁ a₂rë₂'é₂ quió'₅ Diú₄ a₂tio'₅₄ ne₄ si₂ la₂. Jme₁juin'₂ Diú₄. Ia₁ jág₁
dsau₅ quió'₅ Jesús bá₄ a₂'i₄ jme₂dsí₂ quió'₅ jui₁lia'₂ i₂'é₂ jág₁ o₄quió'₄
Diú₄.

Dsa₂ i₂ñó₅ co₁dsin₅₄ cua₁ tion₂

¹¹ Jaun₂ ca₂jág₃ jniá₂ rë₂na₄ guei'₅₄ i₂juíg₃, jaun₂ ca₂jñia₃ jan₂ dsi₂cua₁
tion₂. Dsa₂ i₂co₂dsag₅₄ guë'₂ chen₂ I₂rë₂ti'₅₄, I₂dsau₅ në₃. Con'₂ dsi₂ten₅₄
bá₄ qui₂dsi₂₃ 'éi'₃, jmo₂₃ 'nei₂. ¹² Tág₅ jme₁ne₁₂ lia'₂ tág₅ si₂; tio'₅₄ 'líong₂
coronas mi₂dsi₅₄ ja₁le₁ton₅ lia'₂ chein₂, jñia'₅₄ lia'₂ 'ñiog₅ bá₄ ñí'₂, tsá₃
'ein₂ i₂sián'₂ ñí'₂. ¹³ Qui'₂ caun₂ 'mi'₂ chen'₅₄ a₂në₂jag₄ bá₄ ma₂i₂tia₃ jmi₂;
a₂chen₂ 'éi'₂ guë'₂ në₃ Jág₁ quió'₅ Diú₄.^w ¹⁴ Chi₁co'₅₄ quió'₅ 'éi'₂, të₁ja₂lén₂
juin₅ lín₃ 'lióg₂ quián₅ guei'₅₄ i₂juíg₃. Ca₂le₃jín₃ le₁qui'₂ jmá'₃ 'mi'₂ lino

^u6 o₃ “lia'₂ né'₂ 'líong₂ jmíg₂.”

^v8 lit. “a₂ma₂quian₅ dsa₂ jñió'₅.”

^w13 'Nio'₂ ja₁ton₅ Juan 1:1-14.

tiog₂ jlá'₁ a₂le₁jé'₃, a₂ca₂'uiin₂ qui₂co₂dsiin₅₄ cua₁ tion₂.¹⁵ Mi₂'o₄ 'éi₂ dsi₅₄ caun₂ a₂lé'₅ lia'₂ lé'₅ ñi₁tág₂ 'mu₃ lín₃ a₂jmaí'₂ ca₂le₃jín₃ juig₂ ne₄ gua'₅₄ 'uë₃. "Goin₃ ne₄ 'éi₂ quian'₅₄ 'ma₂'i'₅₄ a₂lé'₅ ñi₁ñí'₁ 'ua'₂."^x Qui₃tsó'₃ nē₂jag₄ bá₄ mīg₂ uvas a₂'i₄ 'nei₂ dséi₂ dsí₅ Diú₄ 'Uan'₂.¹⁶ Ne₄ tsi₁'mi'₂ chen'₅₄, ne₄ mi₂qui₅₄ né₃, chi₁ton₅ 'a₂ lia'₂ chein₂: RAG₅₄ QUIÁN₅ CA₂LE₃JÍN₃ RAG₅₄ JUIG₅₄ CA₂LE₃JÍN₃ JUIG₅₄.

¹⁷ Jaun₂ ca₂jing₅₄ jan₂ ángel chéin'₅ dsi₂jo₂ 'iog₂. 'Éi₂ né₃ ca₂juá'₂ tiá'₂ lín₃ qui₂ca₂tsí'₃ ca₂le₃jín₃ já'₂ i₂'in₅ guei'₅₄ dsi₂güig₂:

—I₂nó'₅ 'nia'₂, tión'₂ 'nia'₂ lo'₂, ia₁ le₃cha₂ má₃ pa₁ cuë₃ Diú₄,

¹⁸ ia₁jaun₂ tón'₄ 'nia'₂ quë'₅₄ jmaí'₃ ñí₅: ñi₄ rag₅₄, ñi₄ ca₂le₃jín₃ juig₅₄ 'lióg₂, ñi₄ ca₂le₃jín₃ gué'₄ dsa₂ bēn₂ né₃. Ca₂lia'₂ ñi₄ cua₁ né₃, ñi₄ dsa₂ i₂jme₁co₂dsag₅₄ né₃; ñi₄ ca₂le₃jín₃ gué'₄ dsa₂: lia'₂ dsa₂ i₂jme₂ti₃ ta₁ ne₄ juig₅₄, lia'₂ dsa₂ i₂tsá₃ 'ein₂ ne₄ jme₂ti₃; lia'₂ dsa₂ i₂juin'₂ lia'₂ dsa₂ me'₂.

¹⁹ Jaun₂ ca₂jing₅₄ i₂té'₂ Já'₂ 'Lín'₅₄, quian'₅₄ ca₂le₃jín₃ rag₅₄ chan₂ ta₁caun₂ gua'₅₄ 'uë₃, quian'₅₄ ca₂le₃jín₃ 'lióg₂ quiáin₅. Ca₂liain'₃ riin'₅₄ ca₂jmo₃ caun₂ jág₁ a₂quín'₂ quian'₅₄ i₂co₂dsin₅₄ cua₁ quian'₅₄ ca₂le₃jín₃ 'lióg₂ i₂quian'₅₄ né₃.²⁰ Já'₂ 'Lín'₅₄ né₃ ca₂'néi'₃ bá₄ co₂dsia₅ quian'₅₄ dsa₂ i₂'é₂ jág₁ a₂juí₁gain₂ i₂ma₂jmo₃ 'lióng₂ léi₄ juë'₂ o₄quió'₄ 'éi₂; ia₁ të₂le₃ quian'₅₄ tsá₃ caun₂ o₂dsain₂ ca₂jme₃jniai₂₃ jin₄ dsa₂, ca₂jme₃gain₂₃ dsa₂ i₂ma₂lín₅ léi₄ quián₅ Já'₂ 'Lín'₅₄, i₂ma₂ca₂jme₃juin'₂ nió'₄ quió'₅ 'éi₂ né₃. Le₃on₃ 'éi₂ co₂dsia₅ bá₄ ca₂tē₁dsiin₅₄ të₃jéin'₃ le₂jaun₂ ja₁'a₄ si₂ a₂cau₂ quian'₅₄ azufre, a₂juë'₂ lia'₂ juë'₂ jmi₁ñí'₄.²¹ Ca₂le₃jín₃ gué'₄ rin'₅₄ 'éi₂ né₃ ca₂dsain₃ quian'₅₄ ñi₁tág₂ a₂o₂'ag₅ mi₂'o₄ i₂co₂dsin₅₄ dsi₂cua₁ 'éi₂. Jaun₂ gué'₄ qui₂ca₂gué'₃ ca₂le₃jín₃ já'₂ i₂'in₅, lia'₂ mag'₂ dsí₅, ñi₄ i₂ca₂dsan₃ 'éi₂.

Caun₂ mei₅ ñi₂

20¹ Jaun₂ ca₂jing₅₄ táng₃ jan₂ ángel, ca₂sióin₃ guei'₅₄ i₂juíg₃. Chi₁chan'₂ ñí₁ llave quió'₅ ja₁ca₂jein₃ chi₁dsio₅₄, caun₂ guë'₂ cadena pa₁ quian₅.² Jaun₂ ca₂ñai'₃ i₂té'₂ já'₂ dragón, dsi₂mi'₂ 'ón₅ 'éi₂, i₂lín₅ i₂sē₃dsen₃ i₂chen₂ Satanás, jaun₂ ca₂'néi'₃ caun₂ mei₅ ñi₂.

³ Ca₂'liog'₃ ja₁ca₂jein₃ chi₁dsio₅₄, ca₂jnéi'₃ ja₁jaun₂, ton'₂ ca₂tióng₃ caun₂ sello ia₁jaun₂ tsá₃ ma₃lé₂ jme₃gain₂₃ gué'₄ juig₂ a₂cha₂ ne₄ gua'₅₄ 'uë₃, ca₂lia'₂ ca₂dsin₃ caun₂ mei₅ ñi₂. Cang₂ jaun₂ jē₁ma₂ca₂dsin₃ caun₂ mei₅ ñi₂, jaun₂ gué'₄ chein'₂ táng₃ co₂'na₂.

⁴ Jaun₂ ca₂jág₃ táng₃ jniá₂ ja₁tióng₂ ne₄ta₁; ja₁jaun₂ tián'₅ i₂ma₂ñi₂ jui₅bí₂ a₂qui₃dsi₂₃ 'éi'₃. Ján₃ bá₄ ca₂jág₃ jme₂dsí₂ quió'₅ dsa₂ i₂qui₂ca₂quí'₃ dsa₂ dsi₂lag₄ ne₄ 'uig₅₄ ia₁ a₂qui₂ca₂jáng'₃ jág₁ dsau₅ quió'₅ Jesús, o₄quió'₄ jág₁ quió'₅ Diú₄ né₃. Tsá₃ ca₂jme₃juin'₂ Já'₂ 'Lín'₅₄, on₃ guë'₂ ca₂gue₃ të₃ton₅₄ léi₄ quió'₅, dso'₂ chi₁quí₃, on₃ guë'₂ co'₅₄ gú₃ né₃. Jaun₂ ca₂jen'₅₄ táng₃ 'éi₂, ca₂rē₃goin₂ quian'₅₄ Cristo caun₂ mei₅ ñi₂.

⁵ (La₁ ca₂le₃jín₃ gué'₄ 'lag₄ sián'₂ guë'₂ né₃, tsá₃ ca₂jein'₅₄ ca₂lia'₂ ca₂dsin₃

^x15 Salmo 2:9.

caun₂ mei₅ ɲi₂.) Co₂'nió'₄ a₂jaun₂ bá₄ le₃jua'₅₄ jë₁le₂'uig₅₄ a₂jen'₅₄ 'lag₄.
⁶ 'E₂ gué₄ dsen₃, 'e₂ gué₄ jñi₅, jui₁lia'₂ dsa₂ i₂quen'₄ jë₁le₂'uig₅₄ a₂jen'₅₄
 dsa₂! Ia₁ ja₁con₂ 'éi₂ gué₄ né₃ tsá₃ ma₃jui₅bí₂ 'io₃ jë₁ca₂té₂ táng₃ 'mú₃.
 Dsa₂ 'éi₂ gué₄ né₃ léin₂ jme₂dsa₂ le₃ne₄ Diú₄, quian'₅₄ le₃ne₄ Cristo, ton'₂
 goin₃ ján₃ quian'₅₄ 'éi₂ caun₂ mei₅ ɲi₂.

⁷ Jë₁ma₂ɲí₂ caun₂ mei₅ ɲi₂ jaun₂, jaun₂ gué₄ chen'₂ táng₃ Satanás
 ja₁rë₂jñí₅, ⁸ a₂o₃'iin₅, dsi₃jme₃gain₂₃ juig₂ ta₁quén₂ qui'₅₄ quió'₅ gua'₅₄
 'uë₃: ca₂të₂ ja₁chei₂ Gog quian'₅₄ Magog.^y Ja₁jaun₂ gué₄ né₃ chi₃liain'₃
 a₂jmo₃ caun₂ jág₁ a₂jmo₃ 'nei₂. I₂juin₅ lin₃ lé₂, lia'₂ ja₁lé₄ mi₂tsag₄ a₂cha₂
 chei'₅₄ jmi₁ɲí'₄.

⁹ Jaun₂ ca₂i₃léin₂ ta₁caun₂ jui₅ con'₂ lé₅ 'í₂ gua'₅₄ 'uë₃, jaun₂ ca₂jë₂li'₅₄
 le₃lág'₃ ja₁tion'₅₄ dsa₂ i₂tén₅ le₃quió'₅ Diú₄, co₂'nió'₄ juig₂ ciudad a₂'nio₃
 Diú₄. Jaun₂ qui₂ca₂séi'₂ si₂ guei'₅₄ i₂juíg₃, ca₂dsiin'₂ co₂ɲei'₅₄. ¹⁰ Jaun₂
 i₂së₃dsen₃ i₂ca₂jme₃gau₅ quió'₅ dsa₂ 'éi₂ né₃, i₂'ín₃ ja₁'a₄ si₂ a₂cau₂
 quian'₅₄ azufre, ja₁ma₂'en₅₄ Já'₂ 'Lin'₅₄ quian'₅₄ dsa₂ i₂'é₂ jág₁
 a₂jui₁gain₂, a₂ɲág₃ uig₅ lia'₂ 'uë₂-jmi₂ ca₂lia'₂ co₂tan₅₄.

Jë₁të₃dsi₅₄ 'éi'₃ ne₄ta₁ tiog₂ a₂juë'₂

¹¹ Jaun₂ ca₂jág₃ táng₃, ca₂jnia₃ caun₂ ne₄ta₁ juë'₂ tiog₂, jaun₂ ca₂jing₅₄
 i₂guá₅ ne₄ta₁. Ne₄ 'éi₂ ca₂cuing₃ gua'₅₄ 'uë₃ quian'₅₄ guei'₅₄ dsi₂güig₂,
 ca₂lia'₂ tsá₃ ma₃ja₁ca₂dsáu'₂. ¹² Ja₁jaun₂ gué₄ ca₂jing₅₄ ca₂le₃ín₃ 'lag₄,
 lia'₂ i₂can'₅₄ lia'₂ i₂me'₂, jniá₂ tióin₂ ne₄ Diú₄. Jaun₂ qui₂ca₂niá₃ mi₂si₂
 rë₂bín₅. Con'₂ siá'₂ ca₂niá₃ mi₂si₂ a₂le₃chan₂ dsa₂ co₂tan₅₄. Ca₂të₁dsi₅₄
 'éi'₃ ja₁con₂ 'lag₄ lia'₂ con'₂ lé₅ ca₂jmo₃ le₂jain₂ le₂jain₂ con'₂ lé₅ le₁ton₅
 ne₄ mi₂si₂ jaun₂. ¹³ Ca₂jín'₂ jmi₁ɲí'₄ ca₂jín'₂ 'lag₄ i₂jme₁tion'₅₄ jë₄ jaun₂;
 qui₂ca₂jín'₂ 'Mú₃ quian'₅₄ guë'₂ Tau₂ 'Nio₅a qui₂ca₂jín'₂ 'lag₄
 i₂jme₁tion'₅₄ ja₁jaun₂. Jaun₂ ca₂të₁dsi₅₄ 'éi'₃ quió'₅ le₂jain₂ le₂jain₂ lia'₂
 con'₂ lé₅ a₂ca₂jmo₃. ¹⁴ Jaun₂ qui₂i₃gan'₅₄ 'Mú₃ quian'₅₄ Tau₂ 'Nio₅^z ja₁'a₄
 si₂. Co₂'nió'₄ ja₁'a₄ si₂ jaun₂, lé₅ jë₁ca₂té₂ táng₃ 'mú₃. ¹⁵ Jui₁lia'₂ i₂tsá₃
 ca₂dsán'₂ chi₁toin₂₃ ne₄ mi₂si₂ a₂chan₂ dsa₂ co₂tan₅₄, ja₁'a₄ si₂ bá₄
 ca₂i₃'ín₃.

Caun gua'₅₄ 'uë₃ 'mí₂, quian'₅₄ caun₂ dsi₄ 'mí₂

21 ¹ Cang₂ jaun₂, ca₂jág₃ táng₃ jniá₂ caun₂ gua'₅₄ 'uë₃ 'mí₂, caun₂
 dsi₄ 'mí₂ táng₃, ia₁ jë₁le₂'uig₅₄ dsi₄ quian'₅₄ guë'₂ le₂'uig₅₄
 gua'₅₄ 'uë₃ co₂dsia₅ ca₂i₃'én₂ bá₄ jaun₂, on₃ guë'₂ jmá'₃ jmi₁ɲí'₄ ma₃cha₂
 né₃. ² Jaun₂ ca₂jág₃ jniá₂^a Juig₂ Ciudad Jñi₅, Jerusalén 'mí₂, a₂ca₂jnia₃
 ca₂sio₃ guei'₅₄ i₂juíg₃ ne₄ Diú₄. Jniá₂ ma₂lé₅ co₂jnia₅₄ jlá'₁ lin₃, në₂jag₄

^y8 o₃, “Magog ja₁gon₂ Gog”. 'Nio'₂ ja₁ton₅ Ezequiel 38:2–39:16.

^z13,14 griego: hades, co₂'nió'₄ a₂juá'₂, ja₁quió'₄ 'lag₄.

^a2 Cha₂ a₂lin₅₄ chog₅₄ si₂ me'₂, a₂juá'₂: “jniá₂, Juan₅₄, ca₂jág₃.”

bá₄ jan₂ dsa₂ mí₂ i₂rē₂lin₄ quián₅ dsa₂ ηē' i₂li' ₅₄ jág₁ quiain' ₅₄. ³ Jaun₂ ca₂nag₃ jág₁ a₂já₅ ne₄ta₁ ca₂juá' ₂ tiá₂:

—Jag₄, ma₂guá₅ bá₄ Diú₄ jin₄ dsa₂ mi₂güí₃. Jin₄ 'éi₂ 'í₂ co₂tan₅₄ bá₄. Lén₂ dsa₂ 'éi₂ dsa₂ juig₂ quiáin₅, jaun₂ 'ηiog₅ bá₄ Diú₄ jme₃quiong' ₅₄ a₂léin₂ Diú₄ quiáin₅, ⁴ Jaun₂ qui₃chí₃ jme₁ne₁ 'éi₂ ca₂le₃jé₃ jmig₂ a₂le₁'ág₄. Tsá₃ ma₃le₃cha₂ gué₄ 'mú₃, on₃ guē' ₂ jua' ₅₄ nē₅ qui₃tón' ₃ gué₄ dsa₂ qui' ₂ 'o₂₃, on₃ guē' ₂ nē₅ i₃nioi₅₄ gué₄ chain₂ o₂i₁ dsi₅, on₃ guē' ₂ le₃cha₂ jua' ₅₄ qui' ₂ uig₅ quió' ₅. Ia₁ co₂dsia₅ ca₂ηí₂ bá₄ ca₂le₃jé₃ 'e₂ a₂jme₁cha₂ le₂jniá₅.

⁵ Jaun₂ ca₂juá' ₂ i₂guá₅ ne₄ta₁:

—La₂ jag₄, jmo₅₄ jniá₂ a₂'mí₂ ca₂le₃jé₃.

Ca₂juá' ₂ ján₃:

—Tiong₅ ne₄ si₂, ia₁ jág₁ dsau₅ a₂rē₂ti' ₅₄ bá₄ la₂.

⁶ Jaun₂ ca₂tság₃ jniá₂:

—Ca₂lě₃. Jniá₂ bá₄ 'éi₂ i₂lín₅ Alfa quian' ₅₄ Omega: i₂lín₅ i₂le₂ne₁, i₂lín₅ jē₁ca₂tó' ₂ né₃. Jui₁lia' ₂ i₂rē₂quein₂ dsí₅, cuē₅₄ jniá₂ a₂'ín' ₂ 'éi₂ jmig₂ a₂'ia₂ o₄tu₁ jmig₂ a₂le₃chan₂ dsa₂, on₃jua' ₅₄ a₂cha₂ quin₃ 'i₁caun₂. ⁷ Jui₁lia' ₂ i₂ca₂tió' ₃, a₂lě₁nei₃ cuē₅₄ jniá₂ ca₂le₃jé₃ a₂nē₅, jaun₂ jniá₂ bá₄ léng₂ Diú₄ quiáin₅, 'éi₂ guē' ₂ léin₂ chi' ₂-guein₂ quiáng₃. ⁸ La₁ jui₁lia' ₂ dsa₂ i₂tén' ₅, jui₁lia' ₂ dsa₂ i₂tsá₃ 'én₂, jui₁lia' ₂ i₂li' 'ηio₅, jui₁lia' ₂ i₂jme₂dsian₅ rin' ₅₄, jui₁lia' ₂ i₂nió' ₅ jág₁ a₂tsá₃ dsi₂ten₅₄ nió' ₃, jui₁lia' ₂ i₂tín₂ mí₅ a₂chan₂ dsí₅, jui₁lia' ₂ i₂jme₂juin' ₂ diú₄ lag₄, ca₂le₃jín₃ i₂co₂jmo₅ jág₁ tē₂jág₁ né₃; ca₂le₃jín₃ dsa₂ nē₅ tiin₃ dsi₃léin₂ ja₁'a₄ si₂ a₂cau₂ quian' ₅₄ azufre, a₂lě₅ jē₁ca₂té₂ táng₃ 'mú₃.

Caun₂ Jerusalén 'mí₂

⁹ Jaun₂ ca₂guan₃ jan₂ ángel i₂lě₂ i₂guion₃ i₂jme₁le₁chan' ₂ guio₃ ni₁uig₅ le₁can' ₂ le₃guio₃ jmi₁uig₅ jē₁ca₂tó' ₂ 'éi₂, ca₂juá' ₂ ca₂tság₃ jniá₂:

—Nia₅, la₂ 'ín₄ jniá₂ dsa₂ mí₂ i₂lě₂ dsi₂i₂gu₂ Guein₂ Já' ₂ Cha' ₂.

¹⁰ Jaun₂ ca₂jio₃ a₂'eng₅₄ le₃quió' ₅ Jme₂dsí₂, ca₂tē₂ ja₁lě₄ má' ₂ juē' ₂ a₂nei₅. Ja₁jaun₂ ca₂'ē₃ Juig₂ Jnió₅, Jerusalén, a₂sió₅ guei' ₅₄ i₂juí₃ ne₄ Diú₄. ¹¹ A₂jniá₂ tág₅ 'ηio₅ lín₃ quian' ₅₄ a₂co₂tág₅ quió' ₅ Diú₄, a₂jniá₂ co₂tág₅ co₂'né' ₅ jui₁lia' ₂ jniá₂ ni₁cang₁ jlá' ₁, jui₁lia' ₂ ni₁cang₁ Jaspe a₂rē₂jé₃ lia' ₂ lě₅ ni₁'i₂. ¹² Le₃lág' ₃ juig₂ jaun₂, chí' ₅ caun₂ ni₁'ia' ₂ pa₁ lín₃ a₂nei₅, a₂le₁dsi₅₄ guia₃-tín₂ o₄'né₄, tión₂ guia₃-tín₂ ángeles o₄'né₄. Qui₂le₁ton₅ o₄'né₄ lia' ₂ chen₂ le₃guia₃-tín₂ tsi₁jon₂ Israel. ¹³ 'Ni₅ o₄'né₄ le₁dsi₅₄ tē₂le₃ ja₁'ia₂^b 'iog₂, 'ni₅ guē' ₂ tē₂le₃ ca₂ton₂ norte, 'ni₅ guē' ₂ tē₂le₃ ca₂ton₂ sur, 'ni₅ guē' ₂ táng₃ tē₂le₃ ja₁rin₂ 'iog₂. ¹⁴ Jme₁lě₂ guia₃-tín₂ 'uig₅₄ ni₁'ia' ₂ juig₂ ciudad jaun₂; ne₄ jaun₂ qui₂le₁ton₅ lia' ₂ chen₂ dsa₂ guia₃-tín₂ i₂chen₄ quián₅ Guein₂ Já' ₂ Cha' ₂. ¹⁵ Chi₁chan' ₂ ángel i₂dsia₅ jniá₂ jág₁

^b13 Co₂'nió' ₄ le₃jua' ₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio' ₂ ja₁ton₅ Salmo 8:3; Romanos 1:25.

quiang'₅₄ caun₂ ni₁'ma₂ a₂quiog₂ dsa₂ 'éi'₃, a₂lé₅ jmá'₃ cu₄nióg₄,
a₂qui₃quióg₃ 'éi'₃ juig₂ jaun₂, ca₂le₃jé₃ o₄'né₄ quió'₅, dso'₂ ni₁'ia'₂ né₃.

¹⁶ Ta₁caun₂ juig₂ jaun₂ lé₅ cha₂ qui'₅₄, co₂jaun₂ bá₄ 'í₂ con'₂ cu₂.

Ca₂quiog₂ 'éi'₃ ta₁caun₂ juig₂ quian'₅₄ 'ma₂'éi'₃ jaun₂. Jaun₂
jme₁ca₂tē₁ron₅₄ 'éi'₃, ca₂dsióg₃ tin₃ mei₅ rē₂dsi₂ tin₃ 'ñiá₂-láu₂ (2,200)
kilómetros con'₂ tē₂le₃ jang₄ juig₂. Con'₂ jaun₂ bá₄ ján₃, ca₂dsióg₃ tē₂le₃
'í₂ quian'₅₄ guē'₂ tē₂le₃ ñei₅ niog₅ juig₂. ¹⁷ Jaun₂ ca₂quiog₂ 'éi'₃ jmá'₃
ni₁'ia'₂. Jaun₂ ca₂dsióg₃ caun₂ 'ñiá₂-láu₂ rē₂dsi₂ tē₂láu₃-quén₂ (144) lē₂,
'éi'₃ quió'₅ dsa₂ mi₂güí₃, 'éi'₃ a₂jmó'₂ ángel ta₁.^c

¹⁸ Ni₁'ia'₂ né₃, jme₁lé₄ jmá'₃ quian'₅₄ ni₁cang₁ jaspe; ta₁caun₂ ciudad
guē'₂ né₃, jmá'₃ cu₄nióg₄ jmá'₅, a₂tág₅ lia'₂ tág₅ ni₁'i₂ rē₂jé₃. ¹⁹ 'Uig₅₄
ni₁'ia'₂ ciudad né₃, qui₂rē₂lag₄ quian'₅₄ ca₂le₃jé₃ ne₅₄ ni₁cang₁ jlá'₁.

Jē₁le₂'uig₅₄ rē₂lag₄ quian'₅₄ jaspe;

jē₁ca₂tē₂ tin₃ né₃, quian'₅₄ zafiro;

jē₁ca₂tē₂ 'ni₅ né₃, quian'₅₄ ágata;

jē₁ca₂tē₂ quén₂ guē'₂, quian'₅₄ esmeralda;

²⁰ jē₁ca₂tē₂ 'ñiá₂ rē₂lag₄ quian'₅₄ ónice;

jē₁ca₂tē₂ jñéi₂ guē'₂ né₃, quian'₅₄ cornalina;

jē₁ca₂tē₂ guio₃ táng₃, quian'₅₄ crisólito;

jē₁ca₂tē₂ jñia₃ né₃, quian'₅₄ berilo;

jē₁ca₂tē₂ ñi₃ né₃, quian'₅₄ topacio;

jē₁ca₂tē₂ guia₃ guē'₂ né₃, quian'₅₄ crisoprasa;

jē₁ca₂tē₂ guia₃-cáun₃ né₃, quian'₅₄ jacinto;

jē₁ca₂tē₂ guia₃-tín₂ guē'₂ né₃, rē₂lag₄ quian'₅₄ amatista.

²¹ Ta₁guia₃-tín₂ o₄'né₄ né₃, jme₁lé₄ mīg₂ perlas, ia₁ jma₃cáun₃ o₄'né₄
jme₁lé₄ jma₃ca₂mīg₂ perla. Calle dse₅₄ dsi₂jo₂ juig₂ ciudad jaun₂,
jme₁lé₄ cu₄nióg₄ a₂le₁jé₃ nē₂jag₄ bá₄ ni₁'i₂ rē₂jé₃.

²² Tsá₃ ca₂jág₃ jniá₂ 'i₁caun₂ guá'₅, jua'₅₄ chí'₅ jē₄ juig₂, ia₁ 'ñiog₅ bá₄
Te₁gui'₅₄ Diú₄ i₂'Uan'₂ gué'₄ lín₃, 'éi₂ bá₄, quian'₅₄ Guein₂ Já'₂ Cha'₂, lín₅
guá'₅ quió'₅. ²³ Tsá₃ si₂ quió'₅ 'iog₂ on₃ guē'₂ si₂ quió'₅ tsi'₂ 'nió'₅ quió'₅
juig₂ jaun₂, ia₁ quian'₅₄ a₂co₂tág₅ co₂'ne'₂ quió'₅ 'ñiog₅ bá₄ Diú₄, jmo₅
jniá₂ ja₁jaun₂, quian'₅₄ guē'₂ Guein₂ Já'₂ Cha'₂, i₂lín₅ co₂'nió'₄ si₂ ni₁tsí₅.

²⁴ Jaun₂ qui₂i₃nio₄ ca₂le₃jé₃ juig₂^d ja₁tág₅ si₂ quió'₅ 'éi₂; qui₂ja₃lén₂ rag₅₄
chan₂ gua'₅₄ 'uē₃, qui₂le₁quian₅ a₂jlá'₁ quió'₅ jē₄ jaun₂. ²⁵ Lia'₂ o₁líg'₂
jmíg₄ tsá₃ jnág₃ o₄'né₄ a₂jmi₂, ia₁ tsá₃ ma₃a₂'uē₂ le₃cha₂. ²⁶ Ja₁jaun₂
qui₂dsi₃to'₅₄ ca₂le₃jé₃ a₂jlá'₁, a₂quen₅ quió'₅ juig₂ a₂te₁'i₁ gua'₅₄ 'uē₃.

²⁷ La₁ ja₁jaun₂ tsá₃ qui₂dsi₃to'₅₄ 'i₁caun₂ a₂lē₁'iog₅, on₃ guē'₂ 'i₁jan₂ dsa₂
i₂qui₂jmo₅ a₂o₂guí'₃, i₂jui₁gan₂ né₃. Jmá'₃ lia'₂ con'₂ i₂ma₂tion'₅₄ le₁ton₅
lia'₂ chein₂ ne₄ mi₂si₂ a₂le₃chan₂ dsa₂ co₂tan₅₄ quió'₅ Guein₂ Já'₂ Cha'₂
bá₄, jmá'₃ lia'₂ i₂'éi₂ bá₄ dsi₁len₃ ja₁jaun₂.

^c17 o₃, “'éi'₃ quió'₅ dsa₂ mi₂güí₃, co₂'nió'₄ 'éi'₃ quió'₅ ángel.”

^d24 A₂lin₅₄ chog₅₄ si₂: “ca₂le₃jé₃ juig₂ a₂ma₂lón₂.”

Cuá₃ ja₁ñi₅ jmi₂g₂ a₂chan₂ dsa₂

22 ¹ Jaun₂ ca₂'ë₃ ángel caun₂ cuá₃ ja₁ñi₅ jmi₂g₂ a₂chan₂ dsa₂,
a₂rë₂jé₃ lia'₂ lé₅ ni₁'i₂; a₂já₅ ja₁lé₄ ne₄ta₁ quió'₅ Diú₄ quian'₅₄
Guein₂ Já'₂ Cha'₂, ² a₂ñi₅ dsi₂jo₂ jë₄ calle dsen₅₄ quió'₅ ciudad jaun₂. Lia'₂
ca₂ton₂ jmi₂g₂ cuá₃ né₃, dsi₅₄ ni₁'ma₂ a₂chan₂ dsa₂; ^e a₂'ag₅ guia₃-tín₂ ne₅₄
míg₂, jma₃ca₂ne₅₄ mí₂g₂ le₂'í₁ tsi'₂. ^f Mog'₅₄ guë'₂ né₃, jmo₅ ta₁ a₂'lón₂
ca₂le₃jé₃ juig₂. ³ Ia₁ ja₁jaun₂ gué₄ né₃, tsá₃ ma₃jág₁ uig₅ le₃cha₂. Jë₄ juig₂
ciudad tē₃tsi'₅₄ ne₄ta₁ quió'₅ Diú₄, quió'₅ Guein₂ Já'₂ Cha'₂ né₃, jaun₂
qui₂jme₃ti₃ dsa₂ quiáin₅ ne₅₄. ⁴ Ja₁jaun₂ jág₂ dsi₁ne₁, qui₃cán₂ lia'₂ chen₂
'ei₂ le₁ton₅ chi₁quí₃. ⁵ Tsá₃ ma₃a₂'uë₂ cha₂ ja₁jaun₂; le₂jaun₂ guë'₂ táng₃
juí₁lia'₂ i₂tián'₅ ja₁jaun₂ tsá₃ ma₃si₂ ni₁tsí₅ 'nió'₅ quió'₅, on₃ guë'₂ si₂
quió'₅ 'iog₂. Ia₁ 'ñiog₅ bá₄ Te₁gui'₅₄ Diú₄ téi₂ si₂ ja₁coin₂. Jaun₂ qui₃goin₃
ján₃ ca₂lia'₂ co₂tan₅₄.

⁶ Jaun₂ ca₂juá'₂ ángel ca₂tság₃ jniá₂:

—Jág₁ dsau₅ a₂rë₂ti'₅₄ bá₄ la₂ a₂juíg₂ jniá₂ 'ne₂. 'Ñiog₅ bá₄ Te₁gui'₅₄,
i₂lín₅ Diú₄ i₂cuë₅ bí₂ jme₂dsí₂ quió'₅ dsa₂ i₂qui₂'ë₂ jág₁ o₄quió'₄, 'ei₂ bá₄
ma₂ca₂chein₃ ángel quiáin₅ né₃, a₂ca₂jme₃jniá₂₃ ne₄ dsa₂ i₂qui₂jme₂ti₃
ne₅₄, ca₂le₃jé₃ 'e₂ niog₅ lé₂ ñi'₅₄ ta₁.

Ñi'₅₄ ta₁ guan'₂ bá₄ Te₁gui'₅₄ Jesucristo

⁷ —iJag₄! iÑi'₅₄ ta₁ la₂ bá₄ guióng'₄! i'E₂ gué₄ dsen₃ i₂tón'₂ juí₅ jág₁
a₂rë₂'ë₂ quió'₅ Diú₄ a₂tio'₅₄ ne₄ si₂ la₂!

⁸ Jniá₂, Juan₅₄, jniá₂ bá₄ líng₅ i₂ca₂jág₃, i₂ca₂nag₃ ca₂le₃jé₃ cosa në₅.
Jaun₂ jme₁ma₂në₂jág₃ ma₂në₂nag₃, jaun₂ ca₂tón₂ jniá₂ 'uë₃ ja₁tión₂
mi₂tag₄ ángel, a₂jme₁jme₁juin'₂. ⁹ La₁ jaun₂ ca₂tság₃ jniá₂:

—'A₃ jmo₂ le₂në₅. Ia₁ jan₂ rín'₂ 'ne₂ bá₄ líng₅, i₂jme₂ti₃ ta₁ ne₄ Diú₄,
ton'₂ líng₅ jan₂ rín'₅₄ rín'₂ 'ne₂ i₂qui₂'ë₂ jág₁ o₄quió'₄ Diú₄, quian'₅₄ i₂tón'₂
juí₅ jág₁ a₂tio'₅₄ ne₄ si₂ la₂. Jme₁juin'₂ Diú₄.

¹⁰ Jaun₂ juá'₂ tság₅ jniá₂:

—Tsá₃ lë₁'ma₂ tei₄ jág₁ a₂rë₂'ë₂ quió'₅ Diú₄ a₂tio'₅₄ mi₂si₂ rë₂bin₅ la₂.
Ia₁ ma₂ja₂quián₃ jmi₂g₄ jaun₂. ¹¹ Juí₁lia'₂ i₂jmo₅ a₂'lig'₅₄, caun₂ juí₁jmo₂₃
a₂'lig'₁₂; juí₁lia'₂ i₂rë₂'ñi₄, caun₂ juí₁jme₂'ñi₃. Le₂jaun₂ guë'₂ táng₃,
juí₁lia'₂ i₂ñi₅ juí₅ co₂dsau₅, juí₁ñi₁₂ lia'₂ ma₂ñi₂₃ jaun₂, juí₅ co₂dsau₅;
jaun₂ juí₁lia'₂ i₂lín₅ i₂jñi₅, caun₂ juí₁lein₅₄ bá₄ rë₂jñi₅.

¹² —iDsón'₂ bá₄ ñi'₅₄ ta₁ guióng'₄! Quion₅₄ 'lia'₅₄ premio quió₃; dsió'₄
cué₄ le₂jan₂ le₂jan₂ lia'₂ con'₂ lé₅ ma₂jmo₃. ¹³ Jniá₂ bá₄ líng₅ Alfa quian'₅₄
Omega; i₂le₂ne₁, i₂jë₁ca₂tó'₂ né₃; i₂le₂'uig₅₄, i₂jë₁ca₂dsan₃ táng₃. ¹⁴ 'E₂
gué₄ dsen₃ juí₁lia'₂ i₂ma₂le₁jé₃ tsin'₅₄, ia₁jaun₂ bá₄ ñei₃ bí₂ a₂tiin₃ ni₁'ma₂

^e1-2 o₃, “a₂já₅ ja₁lé₄ ne₄ta₁ quió'₅ Diú₄ quian'₅₄ Guein₂ Já'₂ Cha'₂. Dsi₂jo₂ jë₄ calle dsen₅₄
quió'₅ ciudad jaun₂, con'₂ guë'₂ lia'₂ ca₂ton₂ jmi₂g₂ cuá₃ né₃, dsi₅₄ ni₁'ma₂ a₂chan₂ dsa₂.”

^f2 o₃, “a₂'ag₅ mí₂g₂ guia₃-tín₂ ráun₂, co₂ráun₂ le₂'í₁ tsi'₂.”

a₂le₃chan₂ dsa₂, a₂tiin₃ dsi₃toin'₅₄ le₃o₄'né₄ juig₂ ciudad né₃.¹⁵ Ca₁'né₄
 bá₄ tion'₅₄ jui₁lia'₂ i₂lín₅ lia'₂ lín₅ dsi₂ji'₅₄, jui₁lia'₂ i₂tín₂ mí₅ a₂chan₂ dsi₅,⁸
 jui₁lia'₂ i₂qui₂nió'₅ jág₁ 'lig'₅₄, jui₁lia'₂ i₂jme₂dsian₅ rin'₅₄, jui₁lia'₂
 i₂jme₂juin'₂ diú₄ lag₄, ca₂le₃jín₃ gué₄ i₂tē₅ dsi₅ qui₂jme₂gan₅ rin'₅₄,
 a₂qui₂jmo₂₃ jág₁ tē₂jág₁ né₃.

¹⁶ 'Jniá₂ Jesús, ma₂ca₂tsíng₂ ángel quiáng₃, a₂jáng'₃ jág₁ dsau₅ nē₅
 ja₁con'₂ 'nia'₂ ne₄ ca₂le₃jín₃ guá'₅. Jniá₂ bá₄ lín₅ lia'₂ cho'₅₄ lia'₂ tsi₁jon₂
 Rag₅₄ David, ján₃ bá₄ lín₅ Nei₅ 'Ióg₁ i₂tág₅ quió'₅.

¹⁷ Jme₂dsí₂ Jñi₅o₅, quian'₅₄ dsa₂ mí₂ quián₅ Guein₂ Já'₂ Cha'₂ juá'₂:

—Nia₅.

Le₂jaun₂ guē'₂ jui₁lia'₂ i₂nag₅ juá'₂ i₂nē₅, jui₁jua'₅₄:

—Nia₅.

Chi₂jua'₂ 'ein₂ i₂rē₂quein₂ dsi₅, jui₁jia₂; chi₂jua'₂ 'ein₂ 'nio₃, jui₁ja₂'én'₃
 jmi₂g₂ a₂le₃chain₂, on₃jua'₅₄ cha₂ quín₃ 'i₁caun₂.

¹⁸ Ca₂le₃jín₃ i₂nag₅ jág₁ dse₃ a₂rē₂'é₄ quió'₅ Diú₄, a₂tio'₅₄ mi₂si₂ la₂, 'é₅
 jniá₂ jág₁ dsau₅ la₂; chi₂jua'₂ 'ein₂ ca₂jmo₃ ηag₅₄ con'₂ lé₅ jág₁
 a₂ma₂tio'₅₄, Diú₄ bá₄ jme₃juē'₂ jmi₁uig₅ quió'₅ lia'₂ con'₂ lé₅ le₁ton₅ ne₄
 mi₂si₂ la₂.¹⁹ Nē₁jua'₂ 'ein₂ guē'₂ ca₂jñiá'₂, ca₂jmo₃ me'₂ jág₁ a₂rē₂'é₂ ne₄
 si₂ la₂, Diú₄ bá₄ jñiá'₂ a₂jme₁ca₂tín₂ quió'₅ ni₁'ma₂ a₂chan₂ dsa₂, quian'₅₄
 gué₄ quió'₅ ciudad jñi₅o₅ a₂le₁ton₅ ne₄ si₂ la₂.

²⁰ I₂jáng'₅ jág₁ dsau₅ la₂ juá'₂:

—Dsón'₂ bá₄ ηi'₅₄ ta₁ guióng'₄.

A₂jaun₂ guē'₂ dsón'₂. iNjá'₅ 'ne₂, Te₁gui'₅₄ Jesús!

²¹ Jui₁jme₂gu'₅₄ bá₄ Te₁gui'₅₄ Jesucristo ca₂le₃jín'₃ 'nia'₂.

Co₂nē₅.

⁸15 griego: farmakeía.